

中興小紀
二






+

+

+

+

+



紀 小 興 中
(二)

撰 克 熊

中興小紀卷十五

紹興三年秋七月丙辰。左僕射呂頤浩辭提舉國史。不允。上曰。朕觀歷代史。後人皆不及前人。遷固雖下於左氏。辭猶奇偉。范蔚宗以還。不足觀也。至唐史尤不及前人。遠甚。頤浩曰。陳壽三國志亦佳。上曰。壽頗簡略。事實多在注中。又諸家互相矛盾。席益曰。歐陽脩五代史。乃有褒貶。義例過范蔚宗等遠矣。工部侍郎歷城李擢奏。乞參紹聖大觀法。別立博學宏詞一科。己未。詔從之。時行在百官。以職之高卑。而差其人數多寡。月給雇募之直。亦是擢請之也。時大旱。上曰。和買未爲良法。今支錢一千州縣吏更不奉行。重困吾民。可下監司覈實。勿爲文具。甲子。手詔略曰。朕於民事未嘗敢緩。其和買紬絹錢已虧。而多有不支。民咨怨而傷和氣。因以致旱。可索逐路未支實數條上。言者謂艱難以來。中原隔絕。祖宗開國功臣。子孫凋喪幾盡。乞訪其後。量才錄用。從之。樞密院計議官王大智。所造戰車不可用。壬申。詔罷之。上曰。器械之利。古今異宜。古所便者。未必便於今。然古人雖用。亦或不利。如驂絙而止之類。蓋車非利器也。席益曰。古人用車。或勝。而後人用之。必敗。蓋古人彼此用車。至於彼徒我車。已有侵軼之懼。而後人每以車敵騎。其敗固宜。呂頤浩曰。房琯失利於陳濤。正坐此也。甲戌。宰執奏置孳生監牧馬。呂頤浩因論廣西買馬。雖置提舉官。須令帥司與之直。庶無乏事。上曰。固也。然當擇帥。若不擇人。而每事待朝廷處置。則雖百執亦不能辦。治天下者。要在官得人。而使之各任其事。則天下治矣。時置監於饒州。以左朝請大夫

郝漸爲提舉孳生監牧事。然馬性利高寒。鄱陽地卑溼。旣而因暑。馬死者衆。漸坐此罷。先是講筵所祇應人。經進書推恩內門下。後省私名。莫允中拔進義副尉。左司諫唐煇論以爲不當。乞追改。煇。吳縣人也。己卯。宰執進呈。上曰。此講筵所奉御寶批也。旣有例當行。席益曰。此事固有前批。然副尉而煩諫官論列。乞陛下允所奏。上頷之。徐俯曰。旣有例當如何。上曰。然。凡朝廷事旣有例。因言者論列而改。則是朝廷所行果非也。且此小事。非繫國體。呂頤浩固請從煇之說。上可之。先是久旱。中雖得雨。微潤而止。上極憂勞。省躬脩政。而圖嘉應。至於祈禱。皆蔬食以致潔誠。自此月己巳之後。屢雨。至是始足。庚辰。上謂宰執曰。日者亢陽。朕甚慮之。以爲穡事無望矣。今霑足如此。殆將有秋。春秋三百四十年。書大有年者一。有者再而已矣。以此知難得也。呂頤浩等退。而相謂曰。上至誠憫雨如此。宜豐年之來格也。初。劉豫將李成。統衆與金合兵二萬。攻盧氏縣。河南鎮撫使董先率兵五千禦之。衆寡不敵。遂棄元守州縣。將二千餘人退寓襄陽府。願聽李橫節制。許之。金僞兵復犯襄陽。橫以食盡不繼。遂引其兵棄城而遁。金僞兵南至隨郢。遠近震恐。橫欲奔荆南以俟朝命。其屬趙去疾。閻大鈞等。勸使歸朝待罪。橫曰。我有烏合之衆。所至自謀衣食。人皆指爲賊。萬一諸部不見納。若何。二人曰。我亦官軍也。何至是。旣而鄂帥鈞洪道果拒之。橫大怒。欲殺二人。皆呼曰。江西帥趙樞密可歸也。橫猶未決。而趙鼎已遣米船至。其衆遂安。董先與信陽軍鎮撫使牛皋。先渡江至洪州。鼎復以銀數千兩犒橫之衆。且檄知黃州鮑貽遜迎勞於境。橫大喜。是月。詔橫駐洪州。旣而鼎發橫赴闕。將佐以下隨之。橫至闕。爲桑仲訟冤。乃追洪州都監霍明。送大理鞫之。亦竟薄其

罪。時召德安鎮撫使陳規至行在。規首乞罷鎮撫使。又言諸將跋扈。請用偏裨以分其勢云。詔復沿海制置使。乃以殿前都指揮使郭仲荀知明州兼之。仲荀將兵三千之任。因陛辭乞解軍職。遂加檢校少保。仲荀至明。正當風汛。賊舟南來之時。卽遣小舟入海爲斥堠。屯兵港口。據要會以待之。八月己丑。宰執奏分屯軍馬遠近輕重。呂頤浩曰。第恐無糧。上曰。撫國家給饋餉。自古亦須運糧。豈有無糧之理。余塔初叛遼主。亦以讒言不給糧之故。往附女真也。時言者欲罷都轉運司。於是度支郎中侯懋等言。自發運司罷後。上供錢物頓失。遂改爲都漕。蓋緣以辨上供爲事。今罷此。亦可省吏之費。第諸路漕臣。又以上供移用。他時復置。卽非朝廷舉措。矧自置司。一歲間已增八十餘萬貫矣。第漕臣不得自便。故同忌嫉。以此見存廢利害甚明。庚子。詔從之。上以雨暘不時。又蘇湖地震。甲辰。詔中外之臣。令極言無隱。先是諸州有積年所欠禁軍闕錢。已委逐路憲司起發。上復恐不便於民。遂諭宰執。令速蠲放。繼又手詔三省樞密院行之。大指慮有追呼禁繫。蓋以不忍人之心。行不忍人之政。至是上又曰。紹興元年以後。合椿之數。亦未須起。欲與諸路招軍令填足舊數也。初。河南布衣王忠民。隱居不出。靖康中。因上書被召。又嘗以策干長安帥范致虛。致虛喜。欲致之不能。時諸鎮如翟興、董先、李彥仙。皆禮重之。劉豫僭立。忠民作九思圖。及定亂四象。遣人達金寨與故遼之境。以斷天下之疑。宣撫處置使張浚。補以官不受。復薦之。至是忠民詣行在。左僕射呂頤浩。僉書樞密院徐俯。謂之曰。上知君來甚喜。旣見上。所奏皆留中。授右宣義郎。忠民辭不獲命。則以告納於牘中。藏之七寶山下而去。後撰三國和議狀。遣使臣岳知常散於敵中。知常越豫

境被執。忠民於是編置福州。未幾得免。初同僉書樞密院事韓肖胄。工部尚書胡松年。使金。道經淮甸。

見田畝多廢。幣帑相屬。密附奏。乞展限起常賦。及立賞掩遺骸。以廣上恩。是月肖胄等至雲中。軍前與金議和。金頗見信。而有悔禍之意。給事中黃唐傳言。都漕不可罷。力營救之。於是言者論唐傳附會大臣。

九月乙卯。以唐傳爲徽猷待制。提舉太平觀。未幾落職。丙辰。兼詳定一司敕令章誼言。比修紹興敕令。

格式。書務速成。論靡專決。州縣推行。已漸見抵牾。望詔監司守臣條上新書之闕。命官審訂。去其譌謬。著

爲定法。從之。右僕射朱勝非等奏。近泉州水暴發。隳城郭廬舍。已行詰問。上曰。國朝以來。四方水旱。無

不上聞。故修省蠲貸之令。隨之。近日蘇湖地震。泉州大水。輒不以聞。何也。乃詔諸路有水旱。監司郡守。卽

時具奏。如敢隱則置之法。時天象多變。臺諫交章。論左僕射呂頤浩之過。而殿中侍御史常同疏其十

罪。戊午。罷頤浩爲鎮南軍節度。開府儀同三司。提舉洞霄宮。制下。言者又請鑄去將相崇資。於是改觀文

殿大學士宮祠如故。諡昭慈獻烈皇后曰昭慈聖獻。己未。詔略曰。昨舉祖宗之制。欲杖賊吏於朝堂。

亦以刑止刑之義。復思祖宗時。絹值不滿千錢。故以一貫三百計匹。後因論列。遂增至二貫足。今絹價不

下四五貫。豈可尙守舊制。每匹宜更增一貫足。今後賊吏犯法。夫復何言。先是皇后父邢煥卒。妻福國

夫人熊氏進狀。乞賜第及官子弟門客。皆踰常制。癸亥。上令補二子官。一子有官者。進二秩。餘悉不行。且

顧宰執曰。祖宗待戚里。皆有常憲。朕不敢踰。豈以后族故私之耶。後復以皇后受冊。乞恩。上曰。朕於外戚

不敢有私也。況待后家。又不敢與宣和皇后家等。前此官邢氏中外戚。已減於韋氏矣。乃詔追贈煥少師。

嘉國公許造進酒而已。甲子起居郎曾統言。本朝多以諫臣兼記注。且聽直前奏事。元豐更制。不復併任諫列。然有事亦許直前。頃者權臣用事。言路寢墜。居是官者。既無言責。率以出位爲嫌。甚非祖宗兼聽之意。乃詔依元豐舊制。丙寅。詔江西大帥趙鼎兼制置大使。既又詔江西制置使岳飛。駐軍江州。而舒蕲二州亦隸節制。初。飛與前帥李回不協。至是。鼎至。誠待之。飛亦心服。江陰軍進士李翰。蘇白。違詔不詣檢院。乃伏闕上書。是日。詔押赴本貫。上曰。所言者皆細務。如戢宗子之類。自可行。非有詆訐之語。願不當伏闕耳。此風皆李綱輩啓之。不可不懲也。上謂宰執曰。議者多言諸大將不可復益兵。此爲不知時宜者。如漢高祖定天下。諸將兵至數十萬。未嘗以爲疑。故能有成功。今劉光世。韓世忠。纔各及五萬。張浚不滿三萬。而議者已患其多。非也。朱勝非曰。漢初諸將最爲用者。韓信。彭越。英布。三四人。兵最多。徐俯曰。光武常中分戲下之師。以與鄧禹。席益曰。方用兵之時。御諸將當如高祖。既定之後。待功臣當如光武。上然之。上自南渡以來。每兩月輒一賞衛士。勝非及其時。則命吏爲文書置袖中。俟命而後進。久而上覺之。問何不早進。勝非曰。此異恩也。當出自陛下。若舉之。非市恩而何。上嘉歎之。殿中侍御史常同言。朝廷設官。有當廢而置。當存而罷者。近諸路屬官。寢增舊員。而寺監之官不除。臣謂當減屬官而復寺監丞。一則分掌郎曹之務。二則養人材以觀其能。三則資淺者不至躡遷。庚午。上謂宰執曰。郎官高選。前此歷寺監丞。乃得之。渡江以來。序進人材。則徑至郎官。其議復置。如同言。朱勝非等言。今歲防秋事。上曰。今有兵僅三十萬。當更精擇。止得勝兵二十萬。器械悉備。訓而用之。可以復中原。威外敵矣。豈獨防捍險阻哉。

大理少卿張杓論淮南帥臣守令當加精擇。壬申上曰：縣令尤爲近民，須一任有舉主及格，乃得爲之。比來一切之制行，或初官便爲令，已釐正矣。當謹守之。昔子皮欲使尹何爲邑，子產謂有美錦而使人學製，蓋民之師帥，非練習政經者不可爲也。中書舍人晉陵孫近言：艱難以來，軍期機速之事，先以白劄子行下，然後乃經給舍，循習寢久，凡擬官斷獄之類，亦徑下有司。今欲由舊制，乃詔非機速者，仍命給舍書牘。祕書省正字晉陵陳祖言：乞修建炎以來日歷，從之。冬十月壬午朔，詔昨者遣使出自朕意，授以手歷，澄清諸道，逮胡蒙等還朝，偶緣他事相繼而去，皆非有失使指，深慮四遠不知其由，妄意揣摩，將已行之事，苟簡滅裂，未還二使，不無疑慮。三省可下諸路所陳利害，令監司郡縣遵守，舉薦人材，取旨錄用。自南渡以來，官無籍吏，隨事立文，號爲省記，出入自如。先是言者乞令使將所省記類而成冊，從之。遂詔修七司敕令，又得廣東轉運司錄到元豐元祐吏部法，與七司所省記者參修，命禮部尙書兼吏部洪擬總之，而兵部侍郎章誼同定。擬立朝最久，諳練典故，定著曲當。至是吏部敕令格式書成，而擬除徽猷閣直學士奉祠以去。癸未，右僕射朱勝非上之。上謂宰執曰：武備在於軍器，弓甲尤爲先務。今戰士無慮三十萬，皆披堅執銳，加以弧矢之利，雖強敵無足畏也。然造弓必用良工，兼須善價。今御前所造弓，其直八千，可以爲式，宜令軍器所及張俊軍中分造，庶使盡其藝也。戊子，以工部侍郎李擢爲禮部尙書，尋除徽猷閣直學士，知婺州。時荆南制置使王夔總軍討楊幺，至鄂州，夔言湖水瀰漫，未可進兵。壬辰，詔俟水落，速去擒捕。旣又詔西北無歸之人，爲賊誘脅者，別給旗榜，付夔招收。甲午，廣西宣諭明橐

言大理國欲進奉及賣馬事。上諭宰執曰：進奉勿許，安可利其虛名而勞民乎？朱勝非曰：異時廣西嘗奏大理入貢，言者指以爲妄，事可爲鑒。上曰：彼云進奉實利於賈販，但令帥臣償其馬直，則馬當繼至，可增諸將騎兵，不爲無益也。戊戌，詔略曰：朕以眇躬親逢厄運，愧無德化，而士大夫趨向多歧，附益奔競之風不息，則朋比之勢漸成。若不以時警懼，辨其邪正，尙且曰內修外攘，得不負愧於天下，可令臺諫察其微而劾之。三省樞密差除，常加遴選，朕有賴焉。淮東宣撫使韓世忠奏：見管兵四萬四千餘人，乞揀去老弱，詔世忠軍練已精，陝西西北山東兵隨世忠累經出入，難以例汰，令存恤之初。世忠之在建康也，以金衆善射，常以騎兵取勝。世忠乃選少年敢死士爲一軍，號曰背嵬，如古羽林飲飛之類，皆以一當百，又自出新意，造克敵弓，斗力雄勁，每射鐵馬，一發應弦而倒，蓋二者皆足以制敵，至是愈精矣。初，福建鹽法以三分爲率，二分商販，一分官搬，比年商販殊少，鬻鈔不行，邵武軍判官趙不已上言，乞併令轉運司搬賣，歲認鈔錢二十萬緡，漕司以鈔錢太重，請減爲十五萬緡，從之。時虔寇竊發，多緣羣入閩，廣販鹽以致作亂，至是知梅州陳杲乞散賣小鈔，謂非特可助國計，亦使細民得販，則暗消其爲盜之端。事下權貨務，己亥，本務言福建二分客鈔，已令轉運司歲輸一十五萬緡，而廣東亦係官搬，杲所言不惟有侵漕計，兼礙成法，遂格不行。杲，建陽人也。壬寅，以龍圖閣學士曾懋爲禮部尙書，旣而殿中侍御史常同言懋不當除，遂寢前命。丙午，宰執奏廣南捕盜事，上曰：凡擒盜多緣賊首未殄，遽以奏功，兵退又復聚衆爲寇，兼監司州縣不能恤民，散而爲盜，有盜又不時奏，致使滋長，可嚴戒之。先是手詔吏部注擬姦孽事。

詔意以爲安得以皇甫鍾之流。鈐制姦吏。除其弊源。上始用鍾事。蓋獨取其初能制吏耳。鍾後作姦迎合。數貢羨餘。唐史所譏。上意深嫉。恐臣下不察。有疑御筆。改曰安得如毛玠清公。使天下之士莫不以廉潔自勵。丁未。上謂宰執曰。他時詔未當。三省可便奏陳改定。徐俯曰。陛下始用鍾事。特取其爲郎時事。後惡其姦。改以毛玠頌之天下。益足以見盛德矣。己酉。宰執奏事。席益請諸軍所造馬黃弩。改令造弓。詔從之。上曰。弩但可守。戰則須弓。朱勝非曰。前者李橫、牛皋與金人戰。旣勝之。金益兵來。橫等皆無甲。是以敗。上曰。無甲何以禦敵。今治兵所先者器甲。而弓尤急也。徐俯曰。臣見張俊云。近歲軍中。方知帶甲之利。今有甲士十萬。則無懼於強敵。上曰。俊隨朕久。士之帶甲者。俊練之也。荆南制置使王玠至岳州。水路下流。進兵。先遣統制官右世達領二千人至鼎州。與程昌禹下統制官杜湛合兵。以當上流。令世達聽昌禹指縱。世達勇而和湛。方患兵少。遂與協力攻賊。至龍陽縣之沅洲。奪賊小德山船一。賊連敗。庚戌。官軍入黃誠寨。登僞太子樓。獲龍牀龍屏之類。是日。玠在下流。船小。與賊戰不利。乃留水軍統制官崔增、吳全於喬口。而自持神武前軍。由鹽陽縣路次於下芷江口。金左都監烏珠。至鳳翔府。與萬戶薩里罕會。再謀攻蜀。又金衆東寇楚泗。時江東宣撫使劉光世駐軍在建康。扼馬家渡。光世將兵直擣廬壽。金人乃引去。崔增、吳全自喬口進兵。攻賊失利。二將皆渡。王玠與程昌禹議。方欲橫鼎江下流。植樁留船守之。以防賊衝。然後悉衆沂芷江。併力攻賊。將夏誠、劉衝等寨。會鄂州告急。戊申。玠持兵趨鄂。留統制官王渥、趙興等軍。權聽昌禹節制。移駐上芷江口。十一月丙辰。宰執奏修運河事。上曰。有言當役不堪。出戰之卒固

不可。又言調民而役滋不可。惟發旁郡廂軍壯城捍江之屬爲宜。至於廩給之費。則不當吝。朱勝非曰。開河似非急務。而饋餉艱難。爲害甚大。故不得已。但時方甚寒。役者良苦。臨流居民。悉當遷避。及富家以僦屋取貲者。皆非所便。恐議者惑之。上曰。禹卑宮室。而盡力乎溝洫。浮言何恤哉。開封布衣李漢英上書。以爲國家之弊。在於用柔太過。故敵得逞。丁巳。上曰。沈潛剛克。高明柔克。聖人之德。時剛時柔而已。光武治天下。以柔道行之。復興漢業。顧豈柔爲不可哉。漢英語雖強易。而朕不爲忤也。時劉豫調民修城運糧。又擇其壯者以備戰。戊午。諸路探至。上惻然曰。中原之民亦勞矣。吾民之不陷僞境者。雖兵興有年。朕未嘗敢以科調煩之。庶其休息。夫使民各安田業。治道之要也。朝廷當力行之。自建炎初。置司農寺。庚申。始復置丞二員。明年。又得置長貳。僉書樞密院韓肖胄。工部尙書胡松年。使金回。自上卽位。遣使入金十數輩。未嘗報聘。至是。劉豫兵敗。始遣其臣文州團練使李永壽。職方郎中王翊等九人。隨肖胄同來。詔前奉使潘致堯。高公繪。接伴之。朱勝非閒居錄曰。秦檜自初相。奏以河北河東人還金。以中原人還劉。同乃知檜之議。出於金人也。兵部侍郎趙子晝爲館伴。時敵情反側。人以館客爲難。子晝彌縫應對。而永壽驕倨自肆。又命右文殿修撰王倫與之議事。倫爲翊道雲中舊故。翊慢少損。倫卽曰。上嘉公輩遠來。特命倫相勞。此殊恩也。宜拜以謝。二人始拜就命。倫充送伴使。於是殿中侍御史常同言。先振國威。則和戰常在我。若一意議和。則和戰常在彼。靖康以來。分爲兩事。可爲鑒戒。上因從容語及武備。曰。今養兵已二十萬。有奇。同日。未聞二十萬兵而畏人者也。時御史六察所隸官司。有免隸臺察者。常同請依舊制。乙丑。詔閣門客。

省四方館並隸臺察。獨皇城司專掌禁廷。依祖宗法不可易耳。同又言六曹貳長。拘執繩墨。願少假以權。使隨事裁決。上曰。國朝以法令御百執事。故凡有司以奉法爲能。而不敢以私意更令。三代皆有所尙。兩漢而下。亦各自有制度。祖宗成憲。朕之家法。不敢改也。祕書省言。元豐官制後。國史別置院。所有日厯歸本省國史案。今乞以修國史日厯所爲名。從之。初。元祐司馬光爲政。請設十科以取人材。曰。行義純固。可爲師表。曰。節操方正。可備獻納。曰。智勇過人。可備將帥。曰。公正聰明。可備監司。曰。經術精通。可備講讀。曰。學問該博。可備顧問。曰。文章典麗。可備著述。曰。善聽獄訟。盡公得實。曰。善治財賦。公私俱便。曰。練習法令。能斷諸讞。歲令侍從以上各舉三人。紹聖以來。此科遂廢。至是三省樞密院請復舉行。乙亥。詔從之。宣和皇后弟韋淵。乞磨勘遷秩。時淵官爲橫行。吏部言橫行於法無以年勞遷者。丙子上曰。若宣和皇后来歸。勢必加恩外家。姑留此以需母后之歸可也。乃命留以俟之。吏部郎官劉大中言。鼓鑄爲國利源。度饒兩司歲鑄一百五萬緡。留四十五萬緡。循環爲本。合發五十九萬餘緡。而元二年前上鑄二十萬緡。截支外止發一十二萬緡。卻同本錢。給兵匹總三十五萬餘緡。除實鑄外。虛費一十九萬餘貫。豈止所得不償所費而已。事下工部。本路言。江州廣寧監合鑄二十四萬貫。池州永豐監合鑄三十四萬貫。比經殘破。以兩監工匠池併入饒。江併入虔。外其鑄額。合令認發。十二月癸未。詔從之。甲申。宰執奏。故侍御史洪炎葬事。朱勝非曰。此蓋近例。上曰。炎以文學稱。其死有恤典。今旣致言者當罷之。然聞其家貧。可依胡直孺例。支與銀絹。炎蓋黃廷堅之甥也。徐俯曰。庭堅自有親孫。見在臨安府爲筦庫。其家極貧也。先是

建炎中。將作軍器二監。皆併歸工部。己丑。始詔復置監。少監丞簿等員。將作乃總少府之事。時監司有闕。或以干堂壬辰言者。請遴揀公正可任之人。書於籍。庶杜其求。且去待闕之弊。上曰。奔競之風未息。每有一闕。必致干乞。可明戒不得具闕。庶少脩士檢也。癸巳。廣西經略使劉彥適言。南丹州莫公晟。領賊兵三千犯觀州。右僕射朱勝非曰。此皆崇觀政和所開新邊。近來往往棄而不守。如觀州亦下本路相度。而帥臣監司以爲所據控扼。不宜棄之。上曰。前日用事之臣。貪功欺罔。其實傷民費財。使遠俗不安也。彥適又乞與公晟一職。詔從之。乙巳。宰執奏。正旦使人入見。故事百官俱入。上曰。全盛之時。神京會同朝廷百官之富。所以夸示敵國。今整駐於此。事從簡便。舊日禮數。無庸俱入。兼元日亦未嘗受賀也。時朝廷館金使。禮既簡。而所乞還俘囚。及西北士民之在東南者。且請畫江以益逆豫之疆。朝廷皆不從。於是李永壽等褻氣而去。時將遣參知政事席益爲報使。而益以母老辭。上問誰可代行。乃薦樞密都承旨章誼。明日誼對。上諭以使金之說。誼徑承命。詔加誼龍圖閣學士以行。

中興小紀卷十六

紹興四年甲寅春正月丁巳。宰執論遣使事。上舉申包胥曰。秦伯初無伐吳存楚之志。感申包胥之誠。爲賦無衣。秦師乃出。然則合兩國之成。回難回之意。只在使人耳。鼎澧鎮撫使程昌禹。遣統制官杜洪。與制置司統制官王渥。趙與。同引兵攻楊么。己未。破皮真寨。俘賊黨陳欽等八十人。奪船三十。於是湖中小寇。皆震恐不自安矣。時殿中侍御史常同。論制置使王玘。討賊久未有功。壬戌。上謂宰執曰。王玘使據上流。可令岳飛自下流進兵。賊無所逃矣。今賊恃險與水。嘯聚甚久。譬如人病。若淹歲月。必生他疾。宜速除之。戊辰。上諭執政。論北方事。朱勝非等退而相語曰。上神武撥亂。而以至仁御世。內外歸心。清蹕所駐。億兆畢從。自然成都。敵所以不能窺者。正恃人心以爲固耳。先是宣撫處置使張浚。奏四川霖雨地震。蓋名山大川。久闕降香。乞製文付下。時浚已出蜀而奏。纔至。癸酉。工部尙書胡松年。遷吏部。端明殿學士同僉書樞密院韓肖胄。與朱勝非議不合。力求罷。詔以本職知温州。旣又辭不赴。改提舉洞霄宮。先是御史臺檢法官李元淪。論保正稅長之弊。上諭宰執曰。役法推行寢久。失其本意。致富者益富。貧者至貧。民力重困。此宜講究。甲戌。上又曰。元淪所論。乃是民事。祖宗法固不可改。然民事急務也。孟子所謂民事不可緩。其令州縣條利害上之。初。川陝宣撫處置副使王似。盧法原。同在閬州。及分陝蜀之地。責守於諸將。自秦鳳至洋川。命經略使兼都統制吳玠主之。屯和尚原。金房至巴達。命鎮撫使王彥主之。屯通

州文龍至威茂。命統制官劉錡主之。屯巴西。洮岷至階成。命統制官關師古主之。屯武都。特遣師古率統制官李進、戴鉞、王師古等。引衆打糧於河州。因襲大潭縣。叛將慕洧拔寨遁去。師古深入敵境。忽遇金兵與戰。大敗。師古歸大潭。內懷慙懼。遂隻身降敵。吳玠念其下忠義。不從師古以叛。亟撫定之。玠既併其衆。所統益以精強。然自此遂失洮岷之地。獨存階成而已。參知政事席益既辭使金。及金使對楊勣。又無一言之助。於是臺諫交論其失。二月壬午罷。以資政殿學士提舉太平觀。論者不已。尋詔落職。癸未。上曰。國家任用小人。當退之也。案二語頗不辭。緊年要錄作易曰。大君有命。開國承家。小人勿用。既審知其小人。自當退之也。朱勝非曰。陛下於天下初無愛憎。始謂其賢則用之。既知其非則退之。所以爲公也。上又曰。人或以開河爲非急務。朕語之曰。禹卑宮室而盡力乎溝洫。孔子以爲無間。然安可謂非急務。要措置有方耳。先是議廢觀州。下廣西帥司相度。未上。二月乙酉。上謂宰執曰。知其無益於國。便可廢之。然當時取之不足爲利。今日廢之亦須慮患。徐俯曰。誠如聖諭。元祐間棄渠陽。匆匆城中人未出者。爲蠻所殺。紹聖中唐義問所以被讒。蓋禍始於此也。鼎寇楊么。旣爲官軍所敗。其黨雖出降。而賊防之甚嚴。鄰居失覺者。其罪死。間有得達官地。保甲利其隨身之物。又殺而奪之。鎮撫使程昌禹。乃募人能引隨者。與獲級同。故降者稍衆。遂申朝廷。乞招安。時知樞密院張浚自蜀還。是月朔日。浚至潭州。留其屬官馮楫。同湖南帥臣折彥質。措置招安。丙戌。宰執奏其事。上曰。么等憑民嘯聚。守令之罪。苟欲自新。令王玘折彥質招之。以成朕好生惡殺之意。旣而行下招安。而賊以不堪。昌禹殺玘爲辭。尋有詔。除昌禹徽猷閣待制。知鎮江府。候招安畢日行。是月。知樞密院事張浚還朝。浚

之出使也。嘗以秦川館爲學舍。以待河東陝西之士來歸者。給衣食養之。又新復諸郡。乞鑄印。浚以去朝廷遠。亦先鑄給。而後奏聞。又浚被命。取道東蜀夔峽。其至稍遲。於是侍御史辛炳言。浚被命宣撫。不能成功。輕失五路。坐困四川。用劉子羽輩皆小人。而殺曲端。趙哲。爲無辜。以至設祕閣。以崇儒。擬尙方。以鑄印。及被詔不肯出蜀。乞行黜責。炳。侯官人也。金左都監烏珠。與萬戶薩里罕。領衆十萬。復大入。犯仙人關。宣撫司都統制吳玠。乃預爲壘於關旁。號殺金坪。嚴兵待之。統制官楊政。言於玠曰。此地爲蜀阨塞。死不可失。當臨以強弩。彼不敢捨此而犯關。且地名亦善。破之必矣。於是金人至。亦據高阜。且戰且攻。壘玠與烏珠約相見。烏珠誘玠以王爵。不從。三月辛亥朔。金兵攻壘益急。玠命統制官吳璘。領射士號駐隊者。更迭射之。矢下如雨。敵死者布地。而復踐以登。玠遣政。與統制官田晟。出銳兵。持長刀大斧。擊其左右。夜布火滿四山。大震鼓隨之。壬戌夜。壘中大兵出。敵不意。攻烏珠薩里罕兩大寨。破之。連戰皆捷。金萬戶韓常。爲官軍射損左目。金不能支。遂遁去。統制官王俊。追百餘里。至鳳州。又敗之。是役也。金自元帥以下。皆令攜孥而來。又選取豫腹心爲四川招撫使。期不徒還。旣不得聘。則還據鳳翔。授甲士田。爲久留計。不敢復妄動矣。丙辰。端明殿學士江西大帥趙鼎。在洪三年。戢吏愛民。盜賊屏息。一方賴之。至是召還。辛酉。詔舉賢良方正。能言極諫。是日福建漕臣鄭士彥進讀。上曰。閩中地狹民貧。勿縱吏槌剝以重困之。官吏姦賊者。當劾不可默也。癸未。以待御史辛炳爲中丞。時宣州奏疑獄不當奏而輒奏者。不論罪。而給事中孫近。因疏駁大理寺之失。論宣州有觀望。乞併罪之。甲子。上謂宰執曰。宣州可貸。今若加罪。則諸郡後

有疑獄。不復奏矣。趙鼎曰：此正國家立法之意也。

乙丑。罷浚爲資政殿大學士。提舉洞霄宮。尋又詔落

職。福州居住。

朱勝非閒居錄曰：張浚出使陝蜀，便宜除官至節度。雜學士樞出入主之右，竭蜀之財，悉陝之怨怒，俱叛浚。浚以身免，奔還閩州。關陝之陷自此始。今言敗績之大者，必曰富平之役，追還潯陽，詭倖居福州而已。

癸酉。知湖州汪藻編元符崇寧大觀詔旨。先

進二百卷。詔送國史日曆所。

江西制置使岳飛奏虔州盜發。已遣兵討蕩。甲戌。上曰：盜發不免加兵。然

皆理其末也。不若理其本。如守令得人。能奉行詔旨。無以擾之。卽民自安業。盜何自而作耶。時梁衛之

地悉淪僞境。河南鎮撫使翟琮以數城孤立。力不能敵。乃引部曲突圍而出。自歸於本朝。詔琮知壽春府。

琮以母老力辭。改授江東鈐轄。其衆分隸諸軍。先是僞宿遷令張澤率其邑二千餘人自拔來歸。泗州

守臣徐宗誠納之。宣撫使韓世忠奏至。僉書樞密院徐俯欲斬澤送首劉豫。參知政事趙鼎力爭。遂令宣

撫司婉詞回澤等。仍械宗誠赴闕。鼎復奏若恐妨和議。令宰執以諭世忠。密受之。卻報僞境。謂北界人

來。以朝廷約束不敢受。遂恃衆作過。已遣兵逐散。是亦兵家一術也。殿中侍御史常同言：金雖議和。而兩

界人交歸。未嘗有禁。僞齊明置歸受館。厚立賞以招吾人。旣遣李成侵襄鄧。隨郢。又遣衆兵攻川口。今乃

卻澤。人心自此離矣。況宗誠起土豪。不用縣官財賦。募兵而自養之。爲國障捍。今因受澤而械之。以阻士

氣。非策也。乃詔釋宗誠罪。命澤以官。且給閒田。處其衆於淮西。夏四月。庚辰朔。以鎮西軍節度陝西都

統制吳玠爲川陝宣撫副使。免書本司事。專治戰守。言者謂軍興以來。陛下不吝推賞。以旌戰士。而所

屬上功。類不覈實。有盜賊自去。而曰收復州縣。有寇過境。上而曰保守無虞。如惠州及東莞縣。皆經殘破。

而守令以禦寇推賞。不知何所據而奏。州縣且然。況於軍伍。似此姦罔。詎可置而不問。辛巳。詔兵部申嚴奏功不實之法。右諫議大夫唐輝等言。前宣撫司參贊軍事劉子羽。程唐。皆爲張浚主謀。而尙列從班。望行貶竄。癸未。詔貶子羽於勺州。案北盟會編作白州安置唐落職奉祠。先是浚令前宣撫司隨軍副使直祕閣榮陽張澄。統本司兵萬人出蜀。詔赴至行在。及浚以次皆貶。而澄獨入對。未幾遷直徽猷閣。除漕江西。江西制置使岳飛奏。川陝宣撫司於仙人關。與金人戰獲捷。飛奏中頗有輕敵之意。乙酉。上語宰執曰。用兵當持重。飛宜深戒之。朱勝非等曰。誠如聖訓。丙戌。詔閣門各省四方館。依祖宗舊制。並屬中書省。不隸臺察。言者乞撥免役錢以充和買。下轉運常平兩司共議。兩浙轉運司言。於本司無妨。而浙東西常平司皆言。役錢限充和買。則役人無可以給。庚寅。乃詔轉運司多方那支。丁酉。衢州奏。直睿思殿鄭弼。經由常山縣騷擾。是日詔降弼兩官。襄陽重地。旣爲僞將李成所據。湖湘之民。亦不奠枕。士大夫自蜀來者。茫然不知所向。一日宰執奏事。朱勝非謂當先取之上。曰。今便可議。就委岳飛如何。時飛爲江西制置使。駐軍鄂岳。趙鼎曰。知上流利害。無如飛者。徐俯獨以爲不然。鼎旣與俯異。卽請上令韓世忠以萬人臨泗上。爲疑兵。劉光世選精兵出陳蔡。庶幾兵勢相接。會光世乞奏事。鼎曰。方議出兵。而大將遽離本軍。非便俯欲許之。鼎力爭以爲不可。時言者以鼎爲是。俯求去。丙午。以本職提舉洞霄宮。時上欲令江東宣撫使劉光世分兵巡邊。右僕射朱勝非請遣中使齋劄子付之。庶無滯滯。上慮內侍到軍中多擾。止於急遞發行。初。南昌潘興嗣高蹈不仕。自嘉祐以來。趙抃。韓琦。唐介。交薦於朝。起爲筠州推官。辭不就。元符中。

黃履引徐復、孫侔、李泰伯例，乞官其孫淳，授星子縣尉。及蔡京用事，追奪之。淳既死，趙鼎前知洪州，奏乞加恩於興嗣之孫濤，以爲廉退自守之勸。丁未，兩浙移文婺州，市御爐炭，非若胡桃紋、鶉鴿色者，不中程。戊申，上對宰執語及，蹙然曰：「當艱難時，豈宜以此擾人？」因詔罷買，有似此類，悉禁止之。初，上欲重修神宗、哲宗兩朝實錄，殿中侍御史常同亦奏二史議論不公，所以當脩之意，且言惟故范祖禹之子沖，知其本末，時已召沖未至。五月壬子，上諭宰執曰：「二史失實，非所以傳信後世，可趣沖來，令兼史事。」朱勝非曰：「神宗史緣添入王安石日錄，哲宗史經蔡京、蔡卞之手，是所當修。今修之，足以彰二帝之盛美矣。」言者以爲祖宗朝，宰執每聚議都堂，頃駐蹕會稽，大臣會議，日至三四，自呂頤浩再相，始不相關，願復故事，以踵前世都俞之風。是日詔從之。川陝宣撫使王似等奏吳玠、仙人關之捷，是日詔宣撫司速上功狀。考功郎官孔端朝言：「唐德宗時，陸贄建言盜滿天下，宜痛自引咎，以言謝之。庶叛者格心，故所下制書，武夫悍卒，無不感涕。今陛下刻意恢復，而播告之言，或未有以發之，謂宜因事見辭，痛自引責，以收人心。」時淮西宣撫使劉光世屯建康，淮東宣撫使韓世忠屯鎮江，以私隙未下。殿中侍御史常同奏：「二臣蒙恩，不思協心報國，一旦有急，其肯相援？望分是非，正典刑，以示國威。」上以章示劉韓兩軍，至是世忠乞差劉光弼充本軍統兵官，辛酉，上謂宰執曰：「茲事未便，恐光世疑也。」光世弟光烈與世忠弟世良皆帶御器械，光烈近召世良，世良峻拒之，作世忠語及此，朕諭之曰：「世良等內諸司耳，設有不和，罷其一可也。」至如大將，國家利害所係，漢賈復寇恂，以私憤幾欲交兵，光武一言分之，卽結友而去，卿與光世不睦，議者皆謂

朝廷失駕馭之術。朕甚愧之。世忠頓首曰。敢不奉詔。他日見光世。當負荊以謝。時世忠於平江府私第。建閣寶藏御書。乞賜名。有旨賜名懋功。學士蔡崇禮奏罷之。世忠請賜閣名。見朱勝非開居錄云。時日曆所乞關內東門司取會禁中。應出納更改事務。甲子上謂宰執曰。禁中百事。皆守典故。不惟祖宗家法。不敢輕改。亦厭紛紛多事也。朱勝非曰。今日皆從簡約。自無輕改之理。自紹興初。修今上日曆。始置修日曆所。既又號國史日曆所。癸酉。復詔以史館爲名。時宰臣薦吏部尙書胡松年爲執政。徽猷閣待制趙思誠爲六曹貳。思誠高密人也。殿中侍御史常同言。松年乃王黼客。宣和間。劉安世復直龍圖閣。松年在詞掖。常醜詆之。今乃營求欲爲執政。可乎。思誠挺之子。崇寧初。挺之首陳紹述實致國禍。且與京黼同時執政。今公道旣開。豈可使其子尙當要路。是月。以同爲起居郎。六月己亥。曲赦虔州土賊。初。上命江西制置使岳飛復取襄陽。亦命淮西宣撫使劉光世發精兵萬餘人援之。飛率統制官王貴等。自鄂渚趨襄陽。右僕射朱勝非許飛迄事建節。且命司農少卿歸安沈昭遠往總軍餉。參知政事趙鼎請上親筆。飭上流監司帥守餉。飛軍毋闕。庶幾必濟。飛等進軍。於是劉豫求救於金。金僞之兵俱來。我師與遇。連戰大破之。遂復襄陽及郢隨諸州。飛分遣統制官王貴、張顯進擊敵兵。及復鄧州時。軍聲大振。先是內降以使臣王誣爲秀州澈浦巡檢。右諫議大夫唐輝上書。引康定元年詔及嘉祐中陳升之劾鎮江軍留後李璋內降轉官。正其干請之罪。以爲祖宗至公如是。今一巡檢不足道。深恐此風滋長。壬寅。乃詔罷之。時川陝無執政。爲大帥言者數上章。以謂若無大帥。必失兩蜀。上因諭朱勝非曰。西帥難其人。朕欲以趙鼎知樞密院。爲之如張

浚故事。勝非曰。聖謨如此。臣謹奉詔。先是荆南制置使王夔自鄂回。鼎奏已招到賊衆萬餘。然賊累殺招安使。臣晁遇等。且乞割州縣如溪洞故事。是月。湖南帥折彥質報賊不可招。夔乃復遣兵蹂踐賊。賊乘大水攻鼎州社木寨。破之。官軍使死者不知其數。賊愈增氣。夔與鎮撫使程昌禹皆坐降官。戶部尙書黃叔敖除徽猷閣學士。奉祠而去。初。吏部法選人改京官。而舉主有他故。則報罷之。至是。郎官王思溫始建請薦員溢格者。本部以收使不盡之數。移文所舉官別行改奏。詔從之。秋七月。戊申。建昌多壘。而軍士素驕。邀取無度。守不能制。至是。守臣劉滂以法裁之。兵不勝其憤。是日。衆集爲亂。滂及母妻皆死。滂。東陽人也。建昌叛卒嬰城自守。江西提刑司遣兵招捕。時又詔右軍統制官趙詳引兵討之。庚午。宰執奏討賊事。上曰。辛企宗自建昌使人來經營。乞委之討賊。頃嘗遣往福建。平范汝爲。怯懦無謀。養成大寇。正如王夔在湖南。玩寇卒無成功。而企宗又在夔之下。惟務交結。本無寸長可用也。朱勝非曰。陛下洞察諸將才否如此。辛未。奏趙詳已平賊。上慮官軍入城。未免玉石俱焚。趙鼎曰。未必敢殺人。恐劫財耳。上愀然曰。斯民遭此禍。可憫。令有司優恤之。旣而言者以爲國家艱難以來。閩中殺漕臣。建康杭秀之守臣。皆爲其下所囚。卒歸罪有司。以爲失於撫循。臣聞建昌兵悍。劉滂稍裁以法。茲守臣之職。乃併其家皆碎於賊。此而不懲。失刑甚矣。願錄滂之死。以白其冤。詔贈朝請大夫。官其子二人。初。樞密都承旨章誼。同給事中孫近。出使至金廷。與其左右副元帥尼雅滿。烏克紳。論事不少屈。金人諭以亟還。誼等曰。萬里衝命。兼迎兩宮。必須得請。金遣金吾蕭愛受書。併以風聞歸過吾國。誼詰其所自。金以實對。乃已。還至南京。

爲劉豫所留。誼等以計得還。上嘉勞之。乙亥。擢誼爲刑部尙書。時內侍李廙。飲於大將韓世忠家。卽坐手刃傷弓匠。事下大理寺。殿中侍御史魏劭言。內侍出入宮禁。而狼戾發於杯酒。乃至如此。其於防微杜漸。豈得不過爲之慮。建炎三年。嘗禁內侍不得關通主兵官。及預朝政。如違以軍法處之。乞申嚴其禁。以謹履霜之戒。是月。御史丞辛炳除顯謨閣直學士。與郡而去。朱勝非閒居錄曰。是夏。樞府全闕。胡松年運。數言胡叢之失。招摭細故。毫髮必聞。未幾。炳論月論奏。二公不已。疾。小愈。未能造朝。乞先供臺職。有旨從之。議者紛然。謂從官治事。而不赴朝。參爲不恭。中司如此。何以掌朝儀。卽日出知漳州。快快而卒。魏劭遷侍御史。於是劭首論自治之策。且言諸軍比日以來。或造言惑衆。或強行捉募。或劫掠財物。或殺傷農民。朝廷雖付之有司。而未能究治。自古善用將者。必宰輔因其事機。而御之有術。臺諫乘其闕失。而言之當理。是以國能御將。將能使兵。今宜訓飭諸將。謹身率下。使士皆心悅誠服。安靜不擾。仍委宰輔以馭將之方。責臺諫以敢言之義。庶幾上下交儆。紀綱克振矣。資政殿學士謝克家卒於衢州。先是淮西宣撫使劉光世入覲。頗自激昂。奏云。錢糧不乏。器甲漸足。臣官職又超衆人。所願竭力報國。他日史官紀中興名將。書臣功第一。上曰。卿不可徒爲空言。當見之行事。八月。戊寅朔。上以語宰執。於是朱勝非等。皆知上馭將得其道。因言而誨誘之也。庚辰。御劄以參知政事趙鼎爲知樞密院事。川陝宣撫處置使。朱勝非閒居錄曰。勝非在告。執政詣勝非問疾。鼎曰。今川陝兵柄皆屬吳玠。大帥無他。能制玠足矣。玠見爲宣撫副使。若官與之同。豈可制乎。勝非曰。公以元樞出使。豈論宣撫耶。鼎曰。須得一使名在宣撫上者。乃可勝非曰。偶疾不能造朝。公難自言。卽同。權吏部侍郎胡交修言。近詔六漕細務。令長貳有條者。以官可言也。時鼎除命。旣出。諸名士爭願從之。夫以例決事。吏部最多。若旋檢例。吏得爲姦。欲七司各編

爲例冊。令法司掌以備檢從之。先是侍御史魏矼論兩淮屯田事。上謂宰執曰。招集流離。使各安田畝。最爲今日急務。因舉鴻雁美宣王詩。謂中興之業。實在於此。胡松年曰。朝廷行屯田累年。惟荆南解潛略。措置其餘。皆虛文無實效。上曰。然。松年復曰。漢宣之治。總核名實而已。天下事若因名以責實。無不治者。如屯田尤不可欺。一歲耕墾幾何。收穫幾何。便足以考。上曰。卿可條上當力行之。癸未。朱勝非上屯田利害。言今日之兵。既令執兵。又令服田。終歲勤勞。所得如故。有未可者。上曰。古者三時務農。一時講武。農卽兵也。兵農之制。一分。恐不可復合。勝非所陳甚善。可卽行之。孟庾等曰。自此兵日以衆。食日以廣。饋餉不更易。容臣等與勝非熟議。上謂宰執曰。素聞岳飛行軍有律。未知能破敵如此。胡松年曰。惟其有律。所以能破敵也。乃降詔獎之。且促飛第賞將士。趙鼎曰。陛下激勵如此。其誰不勸。尋除飛清遠軍節度。湖北制置使。既而飛奏辟盧宗訓者。知德安府。侍御史魏矼言。飛新立功。朝廷當成就其美。不宜使輕儇之徒。爲其屬郡。昔郭子儀以奏請不行。謂爲人主所厚。願以臣章示諸將。因此事機以善其後。宗訓之命遂寢。魏矼請遴選羣才。隨宜器使。乙酉。上謂宰執曰。朝廷當爲官擇人。不可爲人擇官。矼論隨宜器使。正得用人之道。孟庾曰。誠如聖諭。胡松年指疏中語曰。朝廷用人。誠能無分朋類。毋徇愛憎。則至公之道行矣。天下幸甚。戊子。執政奏事。趙鼎曰。臣今西行。與吳玠爲同事。或當節制之耶。上悟。孟庾等言。趙鼎除使。名與王似等同。乞自睿旨易之。乃除鼎都督川陝諸軍事。既而鼎又奏。荆襄乃四川後門。遂并領荆襄諸軍。趙鼎事實曰。是時當國者不可否事。事多不決。吏緣爲姦。每鼎受狀之日。人皆駢集。由是見忌。初。上卽軍位。以御營使專總軍政。其後并歸樞密院。宰相得兼領。至是言者論其失。乞令參知政事。通知其事。上

以爲然。言者又謂當國者不知兵。意專以屬鼎也。於是忌者益切。至除知樞密院事川陝宣撫使。皆忌者之說也。鼎留身辭以非才。上曰。行朝之事。朕自主之。宰相苟非其人。自有臺諫。四川全盛。半天下之地。盡以付卿。遂除都督川陝諸軍事。鼎又奏曰。荆襄四川後門。勢須兼領。上以爲然。遂兼都督川陝荆襄諸軍。命下之日。識者相謂曰。只此一著。已自過人。遠甚也。上曰。朕於大臣。未嘗不進之以禮。退之以道。遂舉清人刺文公詩。以爲危國亡師之本。在所深戒也。胡松年曰。陛下於鼎。可謂任之專。責之重矣。朱勝非開居錄曰。時勝非起復。居住命殊不樂。申請數十條。皆不可行。如隨軍錢物。須七百萬緡之類。勝非參告進呈。指此一項。奏言臣昔聞玉音。趙鼎出使。如張浚故事。浚自建康赴蜀。朝廷給錢一百五十萬緡。今鼎所需。三倍以上。今歲郊恩。所費不貲。上曰。奈何。勝非曰。欲支三百萬緡。半出朝廷。已如浚數。半令所部諸路漕司應副。上可之。既退。鼎語怒云。令我作乞兒入蜀耶。於是鼎言陛下建炎中。遣張浚出使川陝。國勢百倍於今。浚有補天浴日之功。陛下有礪山帶河之誓。君臣相信。古今無二。而終致物議。以被竄逐。夫喪師失地。浚則有之。然未必如言者之甚也。大抵專黜陟之典。受不御之權。則小人不安其分。謂爵賞可以苟求。一不如意。便生觖望云。是時蜀士至於釀金募人。詣闕訟之。以無爲有。何以自明。故有志之士。欲爲國立事者。每以浚爲戒。且浚有罪。臺諫論之可也。人主誅之亦無憾也。今乃下至草澤行伍。凡有求於浚而不得者。人人投牒醜詆。及其母妻。甚者指爲跋扈。抑何甚哉。今臣無浚之功。當此重責。去朝廷遠。恐好惡是非。行復紛紛於聰明之下矣。伏望睿鑒。憫臣孤忠。使得展布四體。少寬陛下西顧之憂。鼎又言。臣隨行兵除王進外。取於密院及諸處。纔二千人。而強壯者曾無數百。又錢帛各依張浚例。初乞錢百萬。止得五十萬。度牒二萬。止得三千。再乞得萬八千。又乞始足元數。臣日侍宸扆。所陳已艱如此。況在萬里之外。惟望睿斷。不爲羣議所移。臣實萬幸。趙鼎事實曰。自鼎入參。常與諸將論防秋大計。獨張浚曰。避將何之。惟向前一步。庶可脫當聚天下兵守平江。

侯敵退。徐爲之計。鼎曰。公言避非策。是也。以天下兵守一州之地。非也。公但堅向前之議可矣。鼎蓋陰有所慮。故每日留身。必陳用兵大計。上意已悟。又使俊密爲之助。至是決意親征。留鼎不遣入蜀。以鼎久有此議。故也。鼎以俊爲助者。乃寇萊公約高瓊之意。蓋統兵官不與之同謀。事必參差。則鼎之策遠矣。初。金左右副元帥尼雅滿、烏克紳、居雲中。是夏始入見。金主晟而烏珠自川口敗回燕山。亦約鄂勒琿同覲。至是。劉豫遣人乞兵。同入寇。晟議於諸帥。尼雅滿、烏克紳沮之。惟鄂勒琿請行。晟遂以鄂勒琿權左副元帥。達蘭權右副元帥。將兵應豫。又以烏珠先嘗過江。知地險易。使之爲前鋒。於是劉豫下書僞境。略云。朕受命數年。治頗有敍。永惟吳越巴蜀。江湖嶺海。皆元議一統之地。重念生民久困。不忍用兵。故爲請於大金。欲割地封之。使永保趙氏之祀。豈圖蔑棄大德。乃敢僞遣使聘。密圖吞噬。先劫汝潁。次掠襄鄧。至有收復燕雲之謀。是用遣皇子諸路大總管左丞相麟。領東南行臺尙書令。會大金元帥大軍。直擣僭壘。務使六合混一。其吠堯之辭。悖逆如此。先是湖北制置使岳飛。令統制官王萬辛。太駐清水河。以掩敵。太不聽命。擅歸荆南。而鎮撫使解潛。不卽遣太反。妄申太先復襄陽。皆爲飛所劾。丙申。詔太特貸命。除名。令自効。戊戌。詔於臨安府餘杭縣。置孳生牧馬監。是日。以資政殿學士川陝宣撫使王似。知成都府。是日。以宗正少卿范冲。中書檢正官虞灃。並爲左右史。而侍御史魏矜言。二人乃執政趙鼎。胡松年。親黨。皆罷之。先是侍御史魏矜。薦武臣崔謹習。王宏。癸卯。樞密院擬二人差遣。上曰。臺臣爲朕耳目之官。職在彈擊官邪。若因而論薦人材。竊慮私有好惡。二人且令籍記。他日量材選用。朱勝非曰。陛下英斷。非臣等所能仰窺萬一。荆南制置使王玘。下統制官常槩。屯鼎州城外。

中興小紀卷十七

紹興四年九月。淮東宣撫使韓世忠奏。以遣使議和非使。欲進兵恢復。乙卯。上謂宰執曰。世忠爲國之心甚切。可諭以二聖在遠。當遣使通問。丁卯。合祀天地於明堂。以太祖太宗並配。大赦天下。庚午。詔朱勝非聽持餘服。候服闋。以爲觀文殿大學士。提舉洞霄宮。癸酉。以知樞密院都督川陝荆襄諸軍趙鼎。爲右僕射平章事。兼知樞密院事。趙鼎事實曰。鼎奏稟朝辭。上曰。卿豈可遽去。當相卿。付以今日大計。時必命相公。當草制。幸密報。彷彿以解我憂。近入院。諸人聚於沈與求之家。近密報取樞府細位。諸人喜而散。明日拜鼎右相。朝士相慶。甲戌。劉豫遣其子麟。姪猊。引金右副元帥鄂勒琿等。自淮陽分道入攻。舟師由清河據楚州。進攻承州。騎兵渡淮據滁州。探者未得其實。以爲敵勢甚少。趙鼎曰。金前侵我境。乃入敵國卽仇也。故縱兵四掠。其鋒可畏。今行豫境。卽官軍也。故按隊徐行。不作虛聲。然亦不足深畏。趙鼎事實曰。劉光世密遣屬官告鼎云。相公本入蜀。有警乃留。何故與他坐。江上之事。付之我輩。或不可則少避之。俟春首敵退。徐議何害。鼎聞諸將之論如此。恐上意移動。復乘間言。今日之勢。若敵兵渡江。恐其別有措置。不如向時。尚有復振之理。戰固危道。有敗亦有成。不猶愈於退而必亡者乎。且金僞俱來。以吾事力對之。誠爲不侔。然漢敗王尋。晉破苻堅。特在人。心而已。自降詔親征。士皆鼓勇。陛下養兵十年。用之正在今日。由是浮言不能入矣。淮東宣撫使韓世忠。時在承州。以援兵未至。退保鎮江府。冬十月丙子。江東宣撫使劉光世軍在馬家渡。淮西宣撫使張俊軍在采石。遂詔光世以所部兵援世忠。且令俊移軍於建康。而三大將事權相敵。兼持私隙。莫肯協心。上詔侍御史魏矼。監察御史田如鼈。分往如鼈。大庾人也。矼至光世軍中。諭之曰。敵衆我寡。合力猶懼。

不支。況軍自爲心，將何以戰？爲諸公計，當滅怨隙，不獨可以報國，身亦有利。光世意許，缸因勸之。貽書二帥，以示無他，使爲犄角。已而二帥皆復書，交致其情。光世遂以書奏於上。於是光世進軍屯太平州。己卯，淮東宣撫使韓世忠復統兵過江，駐于揚州。上將親征，詔略曰：朕以兩宮萬里，一別九年，覬迎鑾輅之還，期盡庭闈之奉，卑辭厚幣，遣使請和，比得敵疆之情，稍有休兵之議，而叛臣劉豫懼禍及身，造爲事端，間諜和好，信逆雛之狂悖，率羣偷而陸梁，警奏旣聞，神人共憤，誓挺身而效死，不與敵以俱生。今朕此行，士氣百倍，瘴彼逆黨，成此雋功，咨爾六軍，咸知朕意，自豫僭立，前此至以大齊名之，及是始正其逆罪，詔旣下，人皆鼓勇，而朝士中尙有懷疑者，或見趙鼎曰：茲事甚大，公更審處，無貽後悔。鼎不答。旣而侍從及臺諫同日請對，翌日，宰執奏事退，鼎復奏曰：今日侍從臺諫皆對，必及親征事，願勿爲羣議所移。上意益堅，而殿中侍御史張致遠亦言：今敵人敢大入，謂我猶如向來不習戰爾。若戎輅親征，必伐敵謀。上曰：正朕志也。初，知鎮江府沈晦過闕，論藩帥之兵可用，以謂唐中年平安史，用朔方太原兩軍，末年平黃巢，用忠武大同兩軍，今沿江千餘里，若令鎮江建康太平池鄂五處，各有兵一二萬，用本郡財賦，回易官田給之，敵至五郡，以舟師守江，陸軍守隘，彼難自度，五郡合擊，金雖善戰，不能一日破諸城也。若圍五郡，則兵分而勢弱，或以偏師綴我，大軍南下，則五郡尾襲，而邀擊金人，安敢遠去。頃歲金人敢越山河間，正以兵少，若太原則不敢南踰一步，此制稍定，三年移軍江北，糧餉器械悉皆自隨，所至便成全盛。晦又言：大將與帥臣各有所職，若全倚大將，恐不能辦。近年杜充總大兵在建，而帥臣陳邦光不與措置，及充

迎敵而邦光被繫。以至周望去而湯東野逃。郭仲荀去而李鄴降。皆坐此也。望撥零兵二千付臣。併令臣募敢戰之士三千。參用昭義步兵之法。葦年後。京口便成強藩。況東晉常謂京口兵可用。故北府兵號爲最精。唐亦用宣潤弩手平淮甸。時方以韓世忠屯軍在府。其言不用。至是晦乞趣張俊統兵爲世忠之援。宰執皆稱晦論議激昂。上曰。朕知其爲人。語甚壯。膽志頗怯。更看臨事能副所言否。沈與求曰。陛下用人如此。則無失矣。時趙鼎、孟庾、胡松年共薦前樞密院副都承旨馬擴有才。中因苗傅事得罪。乞復試用。擴亦請自將三千捍賊。上曰。齊小白猶能忘射鈞之讎。而用管仲。朕豈不能用擴。然既用之。止與三千人。非是。俟引見示以恩信。然後用之。彼必能效死以報。鼎曰。陛下開大度用人如此。天下幸甚。沈與求曰。陛下御將如此。何事不濟。既而引擴見復。除樞密副都承旨。鼎又曰。陛下用人如此。何患不得其死力。上曰。擴知兵有謀。不止於鬪智而已。與求曰。陛下起擴之廢。寵以美官。必能立功以報陛下。雖漢祖善將。不過如此。除擴在此月戊子今聯書之直史館范冲錄其父祖禹紹聖初報國史院問目以進。又具到朱墨本去取體式。乞降付史館。更憑衆議修定。壬午。詔送史館。初。知建康府呂祉言。今置江北于度外。非朝廷命帥宣撫兩淮之意。且乞上親征。至是。江上探報。惟祉最爲詳密。趙鼎言。祉慷慨敢爲。此等人材。實不易得。上曰。祉真有方面之才。朕留意人物。欲其協濟多難。如知鄂州劉洪道。初緣呂頤浩薦。而所對多誕謾不實。雖有蠶材。何所用之。沈與求曰。洪道知明州。脫身先遁。一城之民。盡殫於賊。至今人怨。癸未。詔鄂州乃上流。宜別擇守臣。詔簽書樞密院胡松年往鎮江。與諸將會議進兵。因以覘賊。淮東宣撫使韓世忠奏。乞過江。

拒敵。戊子。上謂宰執曰。世忠忠勇。必能成功。可令戶部支銀絹犒賞過江將士。以激其心。沈與求曰。自敵騎蹂踐中原。未嘗有與之戰者。今諸將爭先用命。此成功之秋也。既而世忠又奏。見在揚州適霖雨。未能進。而恐朝廷訝成功之遲。上曰。兵事豈可遙制。趙鼎曰。軍事不從中覆。古之制也。乃詔世忠聽機制變。

甲午。戶部侍郎梁汝嘉言。每月經費一百餘萬緡。兼調發所用倍多。請權以江浙夏稅及和買十分折納五分。二分折四緡。三分折六緡。其紬則皆折納。二分折四緡。八分折六緡。令轉運司計綱輸送。從之。淮西宣撫使劉光世。探到劉豫事。丙申。積雨月餘。戊戌。上發臨安。陰雲頓開。軍容甚整。都人欣嘆。以謂靖

康以來未有是舉。上登御舟。至臨平鎮。宰執奏事。趙鼎曰。臣等扈駕登舟。見道傍觀者皆流涕。以手加額。蓋陛下以萬乘之尊。親總師徒。履至險之地。苟心懷愛君。莫不憂此。臣待罪揆路。不寒而慄。非不欲披堅執銳。率衆推鋒。而書生不閉戰鬥。又府庫無儲。關津無備。隨宜經理。倉卒取辦。必有過差。願陛下收衆智。

降哀痛之詔。捐內帑金以賞激士氣。庶可成功。此在睿斷勉之而已。韓世忠總兵駐揚州。時奉使魏良臣過揚。世忠置酒與別。杯一再行。流星庚牌沓至。良臣問故。世忠曰。有詔移軍守江。乃命徹爨班師。良臣去。世忠度其已出境。乃上馬令軍中曰。視吾鞭所嚮。於是諸軍大集。行至大儀鎮。勒精兵爲五陣。設伏二

十餘處。戒聞鼓聲。則起而擊之。良臣至金軍。金問我軍動息。良臣以所見對。大帥烏珠喜甚。勒兵趨江口。

距大儀五里。其將貝勒托卜嘉原名李董捷也擁鐵騎過吾軍之東。世忠傳小麾鳴鼓。伏者四起。吾軍旗

與敵旗雜出。敵軍亂。弓力無所施。而我師伍伍迭進。背嵬軍各持長斧。上搯人胸。下搯馬足。金全裝陷泥。

淖中人馬俱斃。遂擒貝勒托卜嘉烏珠。走還泗上。召良臣責其賣己將殺之。良臣好辭得免。世忠提舉官董旻與金戰於天長軍。又統制官解元成閔與戰於承州。皆敗之。擒生女真百餘人。遣屬官建陽陳桷與旻等具舟載之。獻於行在。且言使人戰沒者三十餘人。壬寅。上至平江府。復下詔。略曰。朕急父兄之難。申子弟之情。師行有名。天其助順。將臨江濟。已次吳門。言念幅隕之間。共離戎馬之禍。使汝等邱墓隔絕。骨肉散亡。罪實在予一人。毒乃流于四海。咨爾將士。勿顧便安。宜各奮揚。共圖恢復。宰執奏。建炎初。黃潛善。汪伯彥。擅權專殺。將布衣陳東。歐陽徹。寘之極典。上曰。朕初卽位。聽用非人。至今痛恨之。乃各贈祕閣。修撰。官其兩子。賜田十頃。趙鼎曰。輔相非人。致陛下責躬自咎如此。誠爲盛德。潛善。伯彥。誤國之罪。天下皆知。此安可誣也。是月。以徽猷閣直學士樞密都承旨章誼。爲戶部尙書。十一月。丙午朔。上御平江府行宮。時松江既有備。商賈往來自如。通泰出納鹽貨如故。上見士氣大振。捷音日聞。欲渡江與賊決戰。趙鼎曰。退旣不可。渡江非策也。金兵遠來。利於速戰。豈可與之爭鋒。兵家以氣爲主。三鼓卽衰矣。姑守江使不得渡。徐觀其勢。以決萬全。且豫猶不親臨。止遣其子。豈可煩至尊與逆。雖決勝負哉。於是遣參知政事沈與求。按行江上。與諸將議可否。始知敵騎大集。其數甚衆。與求回言。松江居民。旋造屋爲肆。敵雖對岸。略不畏之。此據趙鼎事實。修入不得其時事。實言久之。時承楚秦三州。各有水寨。民兵合力擊敵。庚戌。上謂宰執曰。淮民不能安業。今又遭敵騎。乃力奮忠義。不忘國家。實我祖宗涵養之力。宜與放十年租稅。仍撥錢米助之。趙鼎曰。陛下德澤如此。人心益固。國祚益長矣。辛亥。上命申嚴密之事禁。仍詔漏

泄邊機處以軍法。殿中侍御史張致遠奏乞省罷營葺以繫軍民之心。壬子詔除軍兵營寨外令孫佑不得應副佑北海人時知平江府上因謂宰執曰臺諫規戒朕所樂聞常恐言者無以補助昨致遠又奏御船不計其數可速行機察朕隨行惟三十餘舟皆載書籍此外無一玩好趙鼎曰監司郡守之官猶巨艦相銜數里陛下簡約如此實帝王盛德事也上曰朕初到平江孫佑所供進饈桌子極弊朕念往日艱難雖居處隘陋飲食非薄亦所甘心若邊境已清郡邑既定迎還二聖再安九廟帝王之尊固在鼎等曰陛下規模宏遠如此太平基業指日可期天下幸甚川陝宣撫副使吳玠奏臣之功乃張浚劉子羽知臣而薦用之今蒙異數望追還成命而於浚子羽少寬典刑上曰進退大臣斷自朕志豈可由將帥之言況朕於浚既罰其過詎忘其功癸丑詔子羽自便士大夫以此多玠之義先是趙鼎薦提舉洞霄宮福州居住張浚可當大事顧今執政無如浚者陛下若不終棄必於此時用之乃詔浚復資政殿學士提舉萬壽觀兼侍讀喻樛語錄曰樛先受趙鼎辟爲川陝都督府屬官既罷行因過平江見鼎曰相公之舉未若直前有如頭重不可卻也要須有後門鼎曰有則善矣樛曰張樞密在福今只召之恐逸巡未至若直除閩浙江淮宣撫使不許辭免則命到之日便有官府軍旅錢糧樞密來路卽我之後門也鼎大以爲然明日入奏久之上曰且入經筵亦可已未浚至復以爲知樞密院事浚見鼎曰此行舉措甚當既又聞鼎諫上渡江決戰之行亦深歎服朱勝非閒居錄曰時敵侵淮泗朝廷震恐宰相趙鼎嘗失身於僞楚初無敢薦者而浚獨人鼎力薦張浚可以當之上問浚方略如何鼎曰浚銳於功名而得衆心可以獨任上卽日除知樞密院鼎曰陛下幸聽臣言驟用浚恐壘諫未悉必至交攻非陛下斷自宸衷無以息衆議上爲親書詔刊石也

觀文殿學士提舉崇福宮李綱陳禦賊之策大略謂僞齊悉兵南下其境內必虛宜擣穎昌出其不意

則必還以自救。此爲上策。召上流之兵。沿江而下。以助軍勢。此爲中策。萬一借親征之名。爲順動之計。此下策也。上曰。綱去國數年。無一字到朝廷。今豈非以朕總師親臨大江。合綱之意乎。辛酉。降詔獎之。戊辰。趙鼎言。張孝純。李鄴。子弟復在近僚。可見陛下德意。乞降詔示從僞之臣。他日來歸。亦不加罪。上曰。中原陷沒。致士大夫不幸。汙於僭逆。皆朕之過。朕備嘗艱難。不忘恢復。蓋欲拯之塗炭。咸與惟新。要使人人知朕此意。僉書樞密院胡松年曰。禹湯罪己。其興勃焉。臣知中興有期矣。右司諫趙霈言。乞令有司具一歲錢穀出入之數。以節浮費。辛巳。上謂宰執曰。霈此疏極關治體。纔過防秋。便可行之。胡松年曰。使論事之臣皆如此。何患不能協濟。正恐敵騎旣退。國家整安。虛文細務。又復出矣。上曰。趙鼎記此。可以爲戒。知樞密院事張浚。往江上視師。趙鼎事實曰。浚在江上時。敵在滁上。造舟已有渡江之耗。鼎密陳今日庶不倉猝。萬一敵渡江。卽再降指揮方始。謂之親征。陛下當親總衛士直趨常潤。督諸軍乘其未畢。併力血戰。未必不勝。或遇不住。則駕由他道復歸。臨安留兵堅守。吳江金亦安。能深入。臣與張浚分糾諸將。或腰截。或尾襲。各據地利。時出擾之。必不使之自肆。如前日也。惟不可聞渡江。卽退。卽諸將各趨常潤。合下事不再集矣。三衛楊沂中。吳錫見鼎言。探報如此。駕莫須動。鼎曰。俟敵已渡江。卽退。卽諸將各趨常潤。合諸將併力一戰。以決存亡。他無術也。二人同聲曰。相公可謂大膽。鼎曰。事已到此。不得不然。二公隨駕之親兵也。緩急正賴爲用。豈可先出此言。二人懼而退。朝論謂鼎勸上親征。固難。而此事不動。尤爲難也。奉使魏良臣等。自金回。張浚遇之。問以金事。及大帥之語。良臣謂金有長平之衆。且出大言。謂當割建州以南。王爾家爲小國。索銀絹犒軍。其數千萬。仍約良臣等再往。浚密奏不可。十二月乙亥朔。良臣等至平江府。侍御史魏矜亦言。當罷講和二字。以攻守代之。飭勵諸將。力圖外禦。遂不復遣。朱勝非閑居錄。城隨金人北去。爲彼大帥達闌任用。至是達闌統兵侵淮。旬朝廷遣魏良臣。王繪奉使至其軍。數問檢且稱其賢。速再相力薦。良臣爲都司。繼除從官。欲彌其言耳。魏良臣進奉使語錄。

言金人比至天長縣。得親筆手詔墨本。謂良臣曰。恤民如此。民心安得不歸。丁丑。上謂宰執曰。向下詔。丁寧。欲刑無冤爾。胡松年曰。臣伏覩詔書。載小大之獄。雖不能察。必以其情。忠之屬也。可以一戰。使敵人讀至此。能無懼乎。張浚奏。以樞密副都承旨馬擴。爲沿江制置使。軍于鎮江府。且令湖南制置大使席益。撥統制官崔邦弼等軍赴擴。益不從。詔落其職。淮西宣撫使劉光世奏。統制官王德獲僞官朱從己卯。上語宰執欲釋之。旣而曰。先軫有言。武夫力而拘諸原。婦人慙而免諸國。墮軍實而長寇讐。忘亡無日矣。諸將方與敵人對壘。今獻俘輒釋之。恐其意怠。勿殺可也。趙鼎曰。此皆吾民。誠不必殺。乙酉。宰執薦進士王蘋。賜出身。除正字。上曰。蘋起草茅而議論若素官于朝。大抵儒者不能通世務。所謂腐儒。胡松年曰。治天下安用腐儒。上曰。然。蘋侯官人也。庚寅。上因論十二夜。太陰犯昴宿。有司以爲敵滅之象。胡松年曰。天象如此。中興可期。上曰。范蠡有言。天應至矣。人事未盡也。趙鼎曰。正當修人事以應之。辛卯。上謂宰執曰。韓世忠近進鱗魚鮓。朕戒之曰。艱難之際。不厭菲食。卿當立功報朕。而貢口味。非愛君之實也。已卻之。沈與求曰。陛下示以好惡如此。諸將敢不用命。世忠能擒劉豫父子。羈致行闕。誅之。而分醢於諸侯。此乃足以報陛下也。乙未。川陝宣撫副使吳玠。奏夏國主數通書。不忘本朝之意。又府州折可求。族屬列狀申玠。見訓練士馬。俟玠出師渡河。當爲內援。以擊敵。戊戌。上謂宰執曰。此祖宗在天之靈。扶祐所致。亦見人心憤北敵也。知樞密院張浚。至鎮江府。召大帥韓世忠。劉光世。張浚與議。且勞其軍。旣部分諸將。乃留鎮江以節制之。於是世忠與金帥烏珠書。謂張樞密已在此矣。浚因奏捍禦次第。且言相持旣久。

恐有別生姦計。已與諸將議。凡可以克敵者。無不爲也。上曰。浚措置如此。金必不能遽爲衝突。參知政事沈與求曰。晉元帝時。石勒寇壽春。相持三月。晉臣至有勸降勒者。王導拒之。金今遠來久相持。非其利也。上曰。朕得浚。何愧王導。先是太史言來歲正月朔。日當蝕。侍御史魏矼請下有司講求故事。上曰。春秋日蝕必書。謹天戒也。己亥。乃詔百職各爲朕講求所以消變弭災者。辛丑。金人之衆屯於竹墩。會雨雪乏糧。又聞上親征。而其主晟病篤。萬戶韓嘗勸烏珠曰。士無鬪志。苟強驅之過江。必多叛者。況吾君疾篤。內或有故。惟速歸爲善。烏珠聽之。聞於諸寨。一夕遁去。方遣人馳諭劉麟。劉猷。倉皇棄輜重北走。麟旣歸。乃率僞官上言。略曰。以中原制江表。強弱之勢。何啻得百二之利。故自古王者興起。必於河北山東之地。然後爲真。若乃崛起及遁居吳越之會。計其強者。能自保一隅。有不道。則中原之兵已進。而墟其國者非一也。於是豫以其言曉示僞境。初。親征詔未至。廬州衆譁然。棄淮保江。知府仇愈得詔。急錄以示人。皆思奮。且遣其子問道告急。上命以官及敵進據壽春。愈率兵出奇直抵城下。敵戰敗。欲走渡淮。是月。金增兵復來。愈盡發戍軍千人拒之。無一還者。遂求救於京西制置使岳飛。飛遣統制官牛皋及愛將徐慶以二千餘騎造廬。旣見愈。坐未定。金驅甲騎五千且破城矣。皋與慶以從騎出城。遙謂金人曰。牛皋在此。爾輩胡爲見犯。乃展幟示之。金衆愕然。皋舞袖徑前。敵疑有伏。卽奔潰。皋率騎追之。金兵自相踐死。餘皆遁去。或問趙鼎。敵何以遽遁。鼎曰。敵衆雖盛。特因劉豫邀請而至。旣非本心。當擇利乃進。故不如前日之忘命也。是歲。道君在五國城。一日諭王若冲曰。一自北遷。於今八年。所履風俗。異事多矣。深欲著錄。未有

其人詢之蔡條。以謂文學無如卿者。高居山東。躬稼之餘。爲予記之。善惡必書。不可隱晦。將爲後世之戒。道君謙虛待下。隨行羣臣。不以大小。未嘗名呼。每有使令。則溫顏諭之。

中興小紀卷十八

紹興五年。歲在乙卯春正月乙巳朔日有蝕之。丙辰上謂宰執曰。大臣朕之股肱。臺諫朕之耳目。事均一體。或有官非其人。所當黜者。卿等宜亟以告朕。不必須待論列。書曰。股肱喜哉。元首起哉。百工熙哉。股肱得人。則萬事皆治矣。趙鼎曰。臣等驚怯。何足仰承聖訓。然爲治之要在於用人。陛下以此訓臣。可謂得其要矣。己未金兵之遁也。留程師回。張延壽爲殿後。二將彼中之驍將也。至是張俊命統制官張宗顏引兵追及之。繼又遣統制官王進等邀其歸路。薄之於淮。敵衆悉潰。墮淮而死。師回。延壽勢窘而降。初以俊爲浚。旣降。始悟曰。吾以爲張樞密。今乃關西也。行宮留守孟庾請上還臨安府。從之。金之薄淮也。劉光世遣統制官酈瓊統兵過淮。由間道徑趨光州。僞知州許約守城甚堅。又劉麟遣統領官李知柔以衆三千助之。瓊說約降。不從。卽進兵急攻城。欲破約。勢窮乃降。遂復光州。甲子奏至上。謂宰執曰。許約爲劉豫結連楊么。及劫張昂山寨。兇逆宜誅。今來歸朕。不欲失信。當貸之。沈與求曰。陛下方圖復中原。倘示大信。安反側。臣見壺漿載道以迎王師矣。初金之故主旻與今主晟相約。互傳位於其子孫。旻在日。以晟爲安班貝勒。安班貝勒者。儲嗣之位也。卽晟代旻。卽捨己之子宋王宗磐。而以旻之長孫梁王亶。小名哈爾滿者爲安班貝勒。仍領都元帥之職。是月晟卒。宋王宗磐與旻之子涼王固倫及左副元帥尼雅滿皆爭立。而亶爲嫡。遂立之。蓋尼雅滿自去歲爲鄂勒琿所代。已失兵柄。故不得立。時鄂勒琿、達蘭諸帥自江上

回至燕山。悉赴晟之喪。初晟已諡。旻爲武元皇帝。廟號太祖。至是賈諡。晟爲文烈皇帝。廟號太宗。二月丁丑。上自平江府還臨安府。己卯。上幸秀州。壬午。上至臨安府。丙戌。右僕射趙鼎除左僕射。張浚

除右僕射。並平章事。浚兼知樞密院都督諸路軍馬。趙鼎事實曰。二月回鑾。先議定張浚右揆。出使湖外。不統不必專以邊事。乃爲得體。泊兩制出。浚獨以軍功及專任邊事爲言。上既以邊事付浚。而政事及進

退人材。專付於鼎矣。喻樛語錄曰。時趙張二公相得人固知且並相。樛獨以謂且作樞密使。同心同德。亦何不可。他日趙退則張繼之。說一般話。行一般事。用一般人。如此則泰道長。若同相

議論有不合。或當去位。則一番更改。必有參商。是賢者自相戾也。已而其事亦稍如此。庚子。宗正少卿

范沖請以近詔羣臣條對。做治平故事。編類進入。乃以命學士孫近直學士院。胡交修而殿中侍御史邵

武謝祖信又言。羣臣所條利害。旣上御府。願親省覽。或俾大臣分閱。擇可用者奏行。從之。故事。左僕射

兼監修國史。辛丑。趙鼎奏直史館。范沖於臣爲外姻。願改授張浚。上曰。安可以沖故廢祖宗故事。況史館

非朝廷政事之地。可無辭。遂詔鼎兼之。於是殿中侍御史張絢言。宰相用人。不當以鄉閭親屬爲嫌。更宜

訪寒峻。癸卯。上謂宰執曰。如此則朋黨之風自破矣。趙鼎曰。用人所以立國。臣豈敢久居相位。至今立國

規模。則當爲遠計也。鼎於是以前政事之先後。及人材所當召用者。密條而置座右。一一奏稟。以次行之。鼎

謙沖待士。犯顏敢諫。凡內降恩澤。多奏格不行。號爲賢相。而深喜故崇政殿說書程頤之學。朝士翕然嚮

之。時有言。今託稱伊川門人者。卻皆進用。如選人桐廬喻樛。真其人也。乃不見知。是月。鼎始薦樛改官。除

正字。誥辭曰。頃窮西洛之淵源。遂見古人之大體。中書舍人王居正詞也。樛以此頗爲衆所嫉。徽猷閣待

制胡安國亦師頤者也。聞之。以謂西洛淵源。古人大體。雖其高弟游酢。楊時。謝良佐。諸人。尙難言之。而況

樽耶。乃敢託於詞命。以妄褒借識者憂之。居正未幾遷兵部侍郎。於是有伊川三魂之目。鼎爲真魂。居正爲強魂。言其多忿也。故工部侍郎楊時爲遷魂。言其身死而道猶行也。旣而正字襄陽張嶠。遂以元佑中五鬼配之。劉豫罷什一之法。改行五等稅法。閏二月丁未。端明殿學士僉書樞密院事胡松年請外。詔以舊職知宣州。川陝宣撫使盧法原請上供物帛。自去年以後。仍充贍軍。己酉。上謂宰執曰。祖宗內帑。本以備邊。宜從所請。趙鼎等曰。陛下捐內帑以贍軍。此帝王盛德事也。詔臨安府依舊帶浙西安撫。鎮江府帶松江安撫。旣而鎮江守臣劉寧止請撥常州江陰軍。及崑山常熟二縣屬松江安撫司。從之。寧止歸安人也。庚午。宰執奏中書舍人劉大中。繳大理評事李洪。試大法改官事。趙鼎曰。法以弼教。宜崇獎之上。曰。不崇獎之。其學將絕。沈與求曰。法家雖別一科。人命所繫。亦宜重其選也。是月。都督張浚出江上勞師。至鎮江府。召淮東宣撫使韓世忠。親諭上旨。使移屯楚州。以撼山東。世忠欣然受命。卽日舉軍渡江。於是浚至建康府。勞江東安撫使張浚軍。又至太平州。勞淮西宣撫使劉光世軍而還。侍御史張致遠。殿中侍御史張絢。右司諫趙霈。交章論新除主管馬軍王玘。討賊無功。乞正其罪。詔罷玘管軍。仍降充團練使。絢。丹陽人也。玘軍一萬五千。撥隸淮南宣撫使韓世忠。三月乙亥。趙鼎薦荆南鎮撫使解潛。召爲主管馬軍司公事。初。靖康中。潛副李綱宣撫河東。鼎在綱幕中。與潛有舊。至是引用之。先是川陝宣撫副使盧法原。以憾不濟師。不餽糧。及不給降錢幣。不應副器械。功成又不銓量獲功將士。上以手詔詰法原。法原辨數甚悉。上不以爲是。旣而法原卒于閩州。宣撫司事。令副使吳玠權主行之。淮東宣撫

使韓世忠已至楚州遣屬官陳桷等赴闕左僕射趙鼎奏臣已細詢桷據言韓世忠已過淮南視控扼之所桷今來乞兵守建康蓋欲張浚分占江上同負此責臣以通泰鹽利為重乞飭世忠且在承楚捍敵或采石等處有警即令引全軍趨江東或浙西而通泰鹽利在所不顧也桷又言世忠軍老幼在鎮江非便臣與桷議欲令遷平江桷以為然此亦張浚之意也乙酉左僕射趙鼎奏乞遣中使傳問宣撫上曰當別有所賜近劉光世進馬來問朕乞花瓶遂輟玉瓶賜之鼎曰陛下御府寶器以寵大將深得駕馭之術矣是日趙鼎奏觀文殿大學士李綱錄到建炎聖語上曰朕已閱皆實綱近日論事非往時比鼎曰綱才器過人嚮辟少年浮躁之士為屬致有所累上曰屬官須老成更練鼎曰誠如聖諭初張浚謫居福州而綱亦寓福浚與綱會既除舊隙遂相厚善至是浚入相數於上前言其忠未幾起綱知洪州兼江南

安撫制置大使朱勝非閒居錄曰舊制御膳日進一百二十品淵聖減作四十品上即祚又加裁省其後

其密侍帷幄日觀盛事固宜仰體德意而三丞相則不然李綱私藏過於國帑乃厚自奉養侍妾歌僮衣

服飲食極於美麗每饗客饋必至百品遇出則府傳數十擔其居福州也張浚被召綱驢行一百二十

合飲食朱漆鑲銀裝飾名致如一皆其宅庫所有也呂頤浩喜酒色侍妾十數夜必縱飲前戶部侍郎轉

營紛亂。排轉不行。時諸將所總。歲歲奏功。而天子親兵。久無陞遷之望。左僕射趙鼎請據三衙見管人數。彷彿舊例。立爲轉員之法。始合祖宗舊制。而軍政明矣。金主亶升所居曰會寧府。建爲上京。仍改官制。初奉使宇文虛中留其國。至是受金官。爲之參定其制。以太師太傅太保爲三師。太尉司徒司空爲三公。尙書省置令次。左右丞相皆平章事。左右丞皆參知政事。侍中中書令皆居丞相下。仍爲兼職。元帥府仍置都元帥。左右副元帥。左右都監。樞密院置使副。僉書院事。大宗正府置判同判同。僉書事。宣徽院置左右使。同知僉書事。六部初置吏戶禮三部侍郎。後置三尙書。仍兼兵刑工。既而六曹皆置尙書郎官。左右司。及諸曹皆備。國史院置監修。以宰相兼領。次修史。御史臺置大夫中丞。侍御史以下。而大夫不除。中丞惟掌認牒及斷獄會法。諫院置左右諫議大夫。補闕拾遺。並以他官兼之。與臺官皆充資而已。翰林學士院置承旨學士侍讀侍講學士直學士待制修撰。而承旨不除。殿前司置都點檢。左右副點檢。左右衛將軍勸農司置使副。記注院置修注。太常寺置卿少。祕書省置監少。以下皆備。國子監官不設。外道置轉運使。而不刺舉。故官吏無所憚。都事令史。用登進士第者。預其選。人以爲榮。官無磨勘之法。每一任則轉一官。此其大略也。初金之故主晟兄弟相約。互傳位於其子孫。時亶既立。於義當復用晟之長子。宋國王宗磐爲安班貝勒。兼元帥之職。而亶不遵初約。及定官制。以三公居都元帥上。又左副元帥。尼雅滿。右副元帥。烏克紳。皆亶所忌。至是以宗磐爲太師。領三省事。易其儲嗣之位。封尼雅滿爲晉國王。亦領三省事。又除烏克紳左丞相。皆以相位易其兵柄。而冀王鄂勒琿。魯王達蘭正。除左右副元帥。故宗磐失望。其後以

至謀變。蓋兆於此也。未幾鄂勒琿死。以達蘭代之。而進左監軍烏珠爲右副元帥。夏四月甲辰朔。言者請做景德會計錄。列紹興以來歲計。量入爲出。詔送戶部。戊申。本部先攢到去歲收支數餘。乞容續錄。從之。初。太廟神主寓於温州。歲時薦饗。委之守臣。司封郎官林待聘嘗言。原廟之在郡國。有漢故事。而太廟神主。禮宜在都。今新邑未奠。宜攷古師行載主之義。還之行闕。以彰聖孝。至是始就臨安府建太廟。遣權太常少卿沙縣張銖。迎至行在。旣而奉安。上行款謁之禮。明年親征。遂奉木主以行。先是侍講范冲。乞依仁宗邇英閣故事。寫書無逸孝經。天子四章爲圖。設於講殿之壁。上從其請。親御宸翰。寫成二圖。庚戌。上以語宰執。於是趙鼎贊上從善汲汲之意。且曰。冲以世守官。入侍經幄。乞修故事。宜也。沈與求曰。宋璟獻無逸圖。以爲元龜。今宸翰昭回。非璟所獻之比。陛下方夙夜自警。則恢復可期。天下幸甚。乙卯。詔直寶文閣。曾紆齋其父布所著正論。赴闕。中道除紆。知信州。戊午。上謂宰執曰。昨閱曾布正論。其言皆正當。趙鼎曰。臣嚮官陝西。嘗見此。乃布親筆。近復得於紆處。蓋相去二十年矣。宛然如故。沈與求曰。韓璜言紆造正論。蓋不知其詳也。上顧鼎曰。布有奏稿。薦陳瓘等十餘人。卿跋尾。具言曾見正論。鼎曰。臣誠有之。先有詔發常平倉米賑糶。己未。宰執奏。欲每日糶一千石。上曰。陰霖不止。細民艱食。官爲發廩。則穀價自平。趙鼎等曰。陛下憂民如此。臣等期有以副聖意。官旣賑濟。則富家不至閉糶。上曰。富家惟務厚藏。而不知散。鼎曰。厚藏而不知散。所以致富。及子孫驕奢。妄用。則家道往往不振。上曰。立國亦然。子孫不知祖宗創業艱難。習成驕奢。馴致禍亂。亦可以爲戒也。沈與求曰。周公陳王業艱難。以戒成王。七月之詩是也。

今陛下念祖宗創業艱難。日復一日。臣知戡定有期矣。甲子。道君皇帝崩于五國城。聖壽五十有四。後。后回鑾。知。先是道君嘗命隨行王若冲。錄北遷事迹。未克成書。丙寅。淵聖申命若冲。以謂先王嘉言善行。不可無紀。乃許隨行官吏。各具見聞。送若冲編修。仍令蔡儻提點。未幾書成。卽所謂太上道君北狩行錄是也。微猷閣待制程昌禹守鼎州。六年。賊不能犯。是月。除昌禹都督府參議官。乃移知岳州。程千秋代之。千秋在岳時。賊已願出降。及至鼎。始覺賊無就招意。時統制官杜淇。亦改爲都督府左軍統制。千秋因留淇所領蔡兵以捍賊。是夏。金主亶以其國有親喪。慮本朝乘而伐之。令右副元帥烏珠屯於黎陽。而左副元帥達蘭歸祈州。初。金攻熙河。蕃漢官盡降。隴右郡王趙懷恩。乃攜老小入蜀。至是。乞依兄懷德例。別帶一職。五月己卯。詔除懷恩正任觀察使。辛巳。上殿。官李椿年言。歲鬻度牒不下萬數。是失一萬農也。積而累之。農幾盡矣。昔越王報吳。生男女有賞。嫁娶不時有罰。今則反是。上曰。越王養兵二十餘年。然後報吳。椿年曰。陛下知此道矣。願斷而行。上首肯之。椿年。浮梁人也。己丑。左司諫趙霈言。安不忘危。治不忘亂。安危治亂之機。相爲倚伏。昨丁陽九厄運。比者皇威始震。仇讐遠遁。已肇中興之業。天其或者殆將悔禍。所謂安危治亂之機。不可一日忘也。漢光武初定天下。馮異來朝。詔曰。倉卒蕪蕪。亭豆粥。虀河麥飯。異頓首曰。願國家無忘河北之難。小臣不敢忘巾車之恩。唐太宗既平高昌。魏徵舉小白無忘在莒之事。以戒之。帝曰。朕不敢忘布衣時。公不得忘叔牙之爲人也。臣亦願陛下無忘親征時。臣無忘扈從時。則恢復可期矣。辛卯。詔霈論奏得諫臣之體。令尙書省寫成圖。進入。時貴州防禦使瑗在宮中。上嘗

以語宰執曰。此子天資特異。儼如神人。朕親自教之。讀書性極彊記。至是趙鼎得旨。造書院于行宮門內。以爲資善堂。欲令就學。上曰。朕年二十九。未有子。然國朝自有仁宗故事。今未封王。止令建節封國公。似合宜。以朕所見。此事甚易行。而前代帝王多以爲難。鼎曰。自古帝王以爲難。而陛下行之甚易。此所以莫敢歧及也。上曰。藝祖創業至勤。朕取子字行。下子鞠于宮中。庶仰慰藝祖在天之靈。孟庾曰。陛下念藝祖創業而聖慮及此。帝王所難之事也。己亥。瑗爲保慶軍節度使。建國公宗正少卿范冲起居郎朱震並爲資善堂翊善。震邵武軍人也。趙鼎事實曰。一日。上語鼎曰。欲令瑗出閣。選官教之。且就禁中置學館。便建選范冲朱震爲翊善。朝論以二人爲極天下之選。上亦嘗謂鼎曰。前日台諫因對語及資善之建。皆曰如朱震范冲天生此二人爲今日資善之用。可謂得人矣。然是時建資善及命官與出閣之日。適張浚在外。故儉人得以問之。始見疾矣。都督張浚謂楊玄據洞庭湖實占上流。不先去之。爲腹心害。將無以立國。然寇阻重湖。

春夏則耕耘。秋冬水落。則收糧于寨。載老小於船中。而驅其衆四出爲暴。前此朝廷以夏多水潦。必冬乃出師。故寇得併力而我多不利。今乘其怠而討之。彼衆旣散。一旦復合。固已疲于奔命。又不得守其田畝禾稼。則有絕食之憂。黨與必攜。可招來也。雖已命湖南制置使岳飛往討。而兵將必未喻此。或逞兵殺戮。則失勝算。傷國體。遂奏請自行。上許焉。浚因辟樞密都承旨馬擴爲都督府都統制。初。湖南制置大使席益獲楊玄探者數百人。皆傳致遠縣囚之。浚行至醴陵縣。召囚問之。盡釋其縛。給以文書。俾分示諸寨。曰。今旣不得保田畝禾稼。必乏食且餒死矣。不如早降不死。數百人歡呼而往。及潭州。而首領黃誠周倫等先請受約束。然嘗殺招安使人。猶不自安。浚令岳飛分屯鼎澧益陽。壓以兵。戊戌。飛至鼎之城外。置寨列。

艦飛素有威望而軍律甚嚴乃遣先出降人楊華入賊招安華未降時爲賊魁以寬厚得衆遂與故部曲潛結幺黨殺幺以降時大旱湖水涸如冬間六月甲辰言者謂康定初陝西用兵詔樞密院邊事與宰相同議又因晏殊言參知政事亦許同議今二府同班奏事與舊制別班再上不同而宰臣已兼知右府欲乞邊事之大者三省同批旨密院官押劄子庚戌詔從之甲寅以久旱詔禁屠以禱雨右諫議大夫趙需言自來斷屠止禁豬羊而不及鵝鴨請併禁之中書舍人胡寅見需疏曰一疏無三百言而用鵝鴨字以十數況諫職乃及此乎聞敵中統兵者號龍虎大王脫或入攻當以鵝鴨諫議拒之時人以爲名對戊午詔贈故觀文殿學士鄧洵仁五官中書舍人劉大中言洵仁兄弟相繼執政專以諂諛固寵望賜追寢戊寅詔從之自靖康初追復元祐諸臣官職後亦稍稍擢其子孫然議論不一是非混淆趙鼎夙有此志是以身任之因大中繳洵仁辭頭遂歷言熙豐祐聖崇觀政事人材善惡利害首尾甚備上嘉納卽詔榜之朝堂先是都督張浚親臨湖以觀賊勢疑未可攻復欲還朝爲防秋之計會制置使岳飛來以小圖白浚曰此易擒耳浚曰恐誤防秋之期飛請浚少留八日擒之浚乃遣飛往初湖南統制官任士安王俊郝晷領兵二萬餘慢王夔不稟其令以此無功飛始至鞭士安以折其氣使爲賊餌先揚言岳太尉兵二十萬至矣及是止見士安等軍賊併力拒之飛伏大兵四合賊敗走悉乘舟入據水寨賊將陳瑨內變劫僞太子鍾子義船獲金交牀與龍鳳輦等詣飛降楊幺赴水死黃誠周倫遂挾子義奔潭州都督府降餘黨相繼皆降飛入水寨殺賊衆殆盡惟夏誠寨恃險固守飛擇善罵者二十人夜往罵之且悉衆運

草木流下填滿。乃長驅入營。遂擒賊。誠果應飛來之讖。於是浚言除楊玄就戮外。招到黃誠、周倫等衆十餘萬。湖寇盡平。李龜年記楊玄本末曰。初賊自恃其險。官軍陸襲則入湖水。水攻則登岸。賊中爲之語。飛命軍士伐君山之木爲巨筏。無數。賊意謂以木筏塞諸港汊。賊戰敗。急趨舟欲出。湖而港汊木筏已滿。舟爲所礙。不能遁。戮死而外。盡招降之。飛來之讖於是乎驗。初張浚與淮東宣撫使韓世忠合移屯泗上。旣而世忠退屯承楚之間。與初議小異。浚遂請祠。上乃降詔諭世忠。且謂宰執曰。世忠移屯旣略如議。浚復何疑。趙鼎曰。臣等已作書報浚。而世忠將董旼亦自謂他日有警。老小必還鎮江。則積糧淮南非便。浚必曉此意。至是董旼攜親筆詔至軍前。世忠拜詔感泣。軍情共戴聖恩。

中興小紀卷十九

紹興五年秋七月壬申朔。上謂趙鼎曰。內侍亦有動人者。如軍器所。初緣內侍李至道措置有法。至今整齊。至道左右手籌計。不差毫釐。是亦人妖爾。鼎曰。惟其精敏如此。便非國家之福。丙戌。都督張浚以知徐州何洋所條屯田利害來上。癸巳。上謂宰執曰。淮北之民。極負而至。朕爲民父母。豈可使其失所。可賦田予之。更加優恤。以廣招徠之路。趙鼎曰。彼乍歸無所居。當賑助之。沈與求曰。立國不當爲朝夕計。就耕之民。若蠲租稅。更助之。五年以後。兩淮荒土已闢。亦爲無窮之利。上曰。然。內軍器庫保明前行徐才良者出職。乙未。上謂宰執曰。內諸司轉官出職文字。祖宗法並用御寶。朕守之甚嚴。但令有司依法行之。趙鼎曰。陛下雖細事。亦謹守祖宗之法。中外幸甚。自建炎兵興。四方舉子不能至行在。遂以省額分於諸路。謂之類試。所收多不當。至是始復開省闈。一如舊制。八月乙巳。觀文殿學士提舉洞霄宮。范宗尹卒於台州。時宗室趙繼之。趙不愚。皆有職。爲言者所論。而趙鼎嘗薦此二人。乃乞解機政。丁未。上曰。事有輕重。卿薦士之失甚輕。而朕之罷相甚重。況頃臺臣論季處勵罪。呂頤浩爲相。嘗薦處勵。亦自陳。今案牘在中書可見也。卿旣自劾。復有何嫌。宜體朕懷。勿再有請。己酉。詔四川比歲軍興。百姓供億不易。恐吏緣爲姦。令宣撫司按治。詔故趙普佐太祖開基。非他勳臣之比。官其五世孫六房各二資。戶部尙書章誼求去。癸丑。除龍圖閣學士。知温州。先是起居郎任申先。乞追贈其父伯雨官。且言伯雨因論章惇。蔡

卞誣謗宣仁后有廢立之意。遂被責。仍以伯雨手澤進之。乃詔贈伯雨諫議大夫。上曰。朕嘗親奉隆祐之訓。今果爾。三省可議。追貶惇節度副使。卞團練副使。子孫不得除在內職任。於是倉部郎官章傑出知婺州。太府寺丞章僅出爲江東提舉官。給事中廖剛封還詔書。謂如此豈足以示懲。乃詔僅并與外祠。而新監進奏院章保亦罷。旣而保登進士第。只補外任。試中博學宏詞科。新勅局刪定官王璧。新明州教授石延慶。並與堂除。璧。鄞縣人。延慶。山陰人也。淮東宣撫使韓世忠奏。獲到僞官王供等十人。乞推恩將士。壬戌。上曰。宿遷僞官。本是吾民。他時邊臣如此。小利不須賞。庶免生事。今世忠旣保明。姑量與推恩。知貢舉翰林學士孫近。上合格進士樊光遠等。癸亥。上御集英殿策試。上謂宰執曰。復詩賦累年。未有卓然可稱者。俟唱名。取高等陸甲。以勸多士。旣遂。賜汪洋以下二百二十人及第出身。先是有官人黃中第一。上曰。故事如何。沈與求曰。皇祐初。有官人沈文通第一。仁宗曰。朕不欲以貴胄先天下寒峻。遂以馮京爲第一。文通爲第二。上曰。此故事也。乃擢洋第一。而省闈賦魁鄭厚依第三名。光遠。錢塘人。洋。玉山人。中邵武人。厚。蒲田人。仍賜洋名應辰。時言者請賜新進士儒行及中庸篇。詔正字高閱校正。上將親書以賜。閱言儒行說詞夸大。類戰國縱橫之學。蓋出於漢儒雜記。望止賜中庸。庶使學者知聖學淵源。而不惑于雜。上乃止。賜中庸。閱。鄆縣人也。丙寅。曲赦潭榔鼎澧岳復諸州。初。詔常州布衣陳德一撰統元新曆。至是成。中書舍人朱震上之。詔震爲之序。己巳。右僕射張浚以平楊玄功。自宣奉加左金紫光祿大夫。詔祕書省以十八員爲額。自南渡以來。百司日有申明。皆臨時裁決。初無定制。三省樞密院尤爲叢冗。

至是左僕射趙鼎請委後省及都司取會前後所行之例以中制立爲定法付之有司遵守而行吏不得以爲姦矣。是月劉豫之子麟出獵于陳留有義黨百餘人欲擒麟南歸其徒首之悉斬于汴京豫又以其弟復知濟南府觀知淮寧軍。九月壬申都督張浚奏江上諸軍精強非前日之比壬午宰執進呈趙鼎曰承平時陝西並邊兵亦未必如此皆陛下累年葺治之力沈與求曰去歲陛下英斷亦恃有此可以卻敵也。上曰皆卿等協贊向使朱勝非尙爲相必勸朕退避今已無江浙矣。湖南北制置使岳飛以平楊么功除檢校少保。重修神宗實錄書成乙酉監修國史趙鼎上之。史館奏乞以故東京留守宗澤行實與前宰臣汪伯彥等所進建炎中興日曆參照俱錄斷自聖意付之史館戊子上謂宰執曰朕昨使事今年歷歷可記趙鼎曰臣聞宗澤勸陛下勿爲河朔之行信否上曰誠有之澤云肅王一去不回況敵騎已逼大王去無益澤留朕雖有功然朕不甚喜蓋淵聖委朕以事使朕不能成有遺恨也時磁人亦不放朕去然疑王雲爲姦而殺之澤不爲無力沈與求曰澤留陛下此乃天命至不能救雲豈得無過哉。案繫年要錄以此爲趙鼎之言而小有異云使澤一言以留陛下此天意也至於澤不能救雲之死豈得無過然事有輕重己丑上謂宰執曰祖宗朝人才中外迭用故無偏重之弊邇來士大夫以內爲重今身至侍從而不歷州縣者宜少革之。初元符來上書范柔中等三十人皆以直言獲罪定爲邪等壬辰上謂宰執曰此乃蔡卞之罪獻言者有可取則行無可取則容之如是則上無拒諫之名下有敢言之士何至目爲邪等其誤道君皆此類也唐馬周言貞觀初米斗直一縑而天下恬然知陛下憂之也今一縑易粟十餘斛而百姓怨以爲陛下不憂之也其言可謂切

矣。太宗亦優容之。復加擢用。先是國子監丞正平張戒上書。幾八千言。自謂恐忤聖意。願陛下容之。自南渡以來。國計所賴者爲鹽。每因闕用。卽改新鈔。以幸入納之廣。第苟目前。不知利權悉爲商賈所持。去年冬。鼎請立對帶之法。商賈聽命。而鹽法遂爲定制。除去積年之弊。是秋。加以出剩。立爲分數。計入納與對帶二法。並行。出入有常。源源不絕。始不爲巨猾所制矣。此據趙鼎事實修人冬十月。上御書車攻詩。宣示宰執。癸卯。趙鼎等入謝。上曰。車攻。宣王中興之詩。今當與卿等夙夜勉勵。以修政事。制仇敵。鼎等曰。臣等庸才。何足以副陛下此意。然陛下游神翰墨之間。亦不忘恢復。臣等敢不自勉。都督張浚。自湖湘轉由兩淮。會諸將議防秋。至是還。庚戌。入見。上曰。羣盜旣就招撫。以成朕不殺之仁。卿之功也。趙鼎曰。湖湘旣平。則川陝血脈通。他日可漸爲恢復之圖矣。時有武略郎成希靖。以策干浚。言國家阻江據關。深得禦敵之道。彼之騎兵。蓋無所施。近年北軍終不得志於吳蜀。必將遣我以破殘之地。使吾取之。則兵勢遂至分。而又約以和好。使吾信之。然後出吾不意。以此詭道而圖吳蜀。一落其計中。爲害不細。金將薩里罕郎君。常與其腹心人黃職方者。於陷蕃人賀正處言之。以謂有金國王子。定計要入川不難。第陝西棄下三四。年不顧。南兵必來作主。則一舉而四川可取。其後仔歸朝。授官爲秦鳳都監。時金已歸我河南陝川。西故地。仔始言之。壬戌。上謂宰執曰。比頻得二聖安報。朕當親筆諭四方。使知朕朝夕不忘二聖之意。還降手詔。略曰。二聖遠狩。九年于茲。迎請之使屢馳。侍膳之期尙遠。晨昏在念。忱惕靡容。間緣首敵之來歸。每喻兩宮之安報。惟孝悌之至。可通神明。而小大之臣。共堅忠義。庶戡多難。克成厥功。趙鼎等曰。陛下聖意。

如此天必降之福。迎還兩宮有日矣。時溫州有唐顏真卿之後裔居焉。詔守臣推擇遣到顏邵。顏卓各齋真卿所有書告身。又顏彥輝乃真卿直下第十一世孫。乙丑。上謂宰執曰。人有一死。或輕於鴻毛。或重於泰山。在處死爲難耳。真卿死節。可謂得所處矣。今艱難之際。欲臣下盡節。可量推恩以勸忠義。況仁祖時。曾命顏似賢以官。自有故事。趙鼎曰。真卿死節一時。而名重萬世。人安可不勉於善。旣而邵、卓、彥輝皆補初品官。先是都督府參議權川、陝宣撫副使邵溥。自閬州移司綿州。凡戰守皆副使。吳玠專行。溥槩不得與。玠急於軍食。與總領四川財賦趙開謀不合。玠欲從陸運糧。開執言不可。玠自爲之。時調夫兩川運米十五萬石至利州。費民間僱夫錢六百餘萬緡。丁卯。以端明殿學士席益爲資政殿學士。四川安撫制置使兼知成都府詔益。乃前執政。令位川。陝宣撫司之上。旣而益至成都。言蜀民已病。而軍尙乏食。圖以救弊。不一而足。欲以上流水澁之時。併運於閬利。俟春水生後。則運至軍前。如今夏頓闕。又於閬利就糴入中。庶免多支腳錢。又於瀘敘嘉黔官伐木造船。庶免拘船。致商人逃避。又於洋州就糴十萬石。庶免陸運。民多役死。上以益所陳曲盡利害。降詔從之。是月。館職高閱言。太祖欲平僭僞。嘗置神衛水軍。至真宗祥符中。以兵備不可廢。乃選水卒於金明池習戰陣。仍置營池側。號虎翼軍。當無事之日。尙爾。今添江雖有舟師。而繫於岸下。乞時令按習。以精其能。庶幾緩急可用。不至誤事也。十一月。庚午朔。中書舍人胡寅言。縣令近民之官。尤在精擇。宜依漢制。嘗爲臺省寺監官者。分宰百里。有政績則擢以不次。以增重其權。軍屯本縣者。許之節制。詔付三省。初。宣撫副使兼營田大使吳玠苦軍餉不繼。遂於洋川及

關外或鳳、岷、三州。治屯田。歲收十萬斛。又調戍兵治褒城廢堰。民知灌漑可恃。皆願歸業。至是就緒。甲戌降詔獎之。先是利路漕臣成都郭大中言於玠曰。漢中歲得營田粟萬斛。而民不敢復業。若使民自爲耕。則所得數什百於此矣。玠用其言。歲入粟多。玠又將陸運。大中曰。利路幸小熟。請以本司緡錢就糴。徐責兩路儆船之直以償。玠從之。丁夫得不死於路。而餉亦不乏。大中又患水運亡失。以策誘賈販。省費十之五。庚辰。給事中呂祉言。侍從官以論思獻納爲職。豈可與庶官論對。願勿拘時從之。甲申。以翰林學士孫近爲吏部尙書。仍兼學士。刑部侍郎兼權直院胡交修爲翰林學士。乙酉。以顯謨閣直學士李光弼。兵部侍郎都督府參謀折彥質。徽猷閣待制李彌大。竝爲尙書。光禮部。彥質兵部。彌大工部。初。總領四川財賦趙開言。總領之職。於四路漕計。或不相關。必正其名。俾知有所統。至是乃以開爲四川都轉運使。仍兼宣撫使參議。領茶馬等如故。癸巳。有親從官趙勝。自金國歸。還言二聖萬福。上悲咽不自勝。左僕射趙鼎曰。願少寬聖慮。強於自治。天必悔禍。二聖終有還期也。是月。劉豫令僞境民有鬻子者。依商稅法。計民而收其算。十二月乙亥朔。詔以湖北制置使岳飛兼湖北東西招討使。川陝宣撫副使吳玠遣其子拱來奏邊事。庚子。上謂宰執曰。玠比乞入覲。今遣子來。得事君之體矣。玠握兵在外。乃能如此。良可嘉也。是日。詔神武乃北齊軍號。久欲釐正。宜改爲行營護軍。仍分中軍。江東前軍。淮東後軍。湖北左軍。淮西右軍。川陝並聽本路宣撫司節制。後亦謂之右護軍。其中軍權隸殿前司。遂以都統制楊沂中權殿帥事。旣而左僕射趙鼎又曰。都督府軍馬。合撥隸三衙。上曰。祖宗故事。軍馬未有不隸三衙者。今釐正之。

甚善。其名既正。則軍政漸可復舊。禮部尙書李光言。江浙爲根本之地。宜卹民而寬其力。今寬其力。漕司不任轉輸之職。而趣辦于州縣。乞檢舊例。應上供及軍糧錢帛。令漕司自備腳費。癸卯詔從之。辛亥。太府少卿沈昭遠請久任計臣。是日上謂宰執曰。祖宗時三司使如陳恕任最久。號稱職。今內外計臣。儻能稱職。就加秩以寵之。不須數易。張浚曰。他官有稱職者亦兼。上又曰。孔門文學政事。各是一科。朝廷用人。若取文學而疎於政事。亦非通才。至於侍從論思獻納。尤須兼二者之長。趙鼎曰。誠如聖訓。殿中侍御史晉陵周葵言。監登聞檢院隸諫省。而敕令所刪定官爲書局。望皆俾輪對從之。初葵言。今天步尙艱。非臣子諷諫之時。臣願直言其失。大抵務虛文而無實效。因數近所行之事不當。凡二十許。上曰。趙鼎張浚爲朕任事。不可以小事形跡之。葵曰。陛下卽位已相十許人。其初皆極意委之。卒以公議不容而去。大臣亦無固志。假如陛下有過。尙望大臣納忠。豈大臣有過。而言者指陳。便謂形跡。臣願因人言使大臣易意。不唯可救朝廷之闕。亦可保全之上。上曰。此論甚奇。至是朝廷議大舉。而葵三章力言。此存亡之機。不必更論安危治亂。自古未有不先自治其國而成大功者。或言葵沮國大計。遂遷司農少卿。初。御前軍器所。所以內侍提舉。不隸工部。是年始罷提舉官。日輪工部郎官及軍器監赴本所視之。罷諸鎮撫使。劉豫遣人持海道圖及戰船樣。獻於金人。乃與燕雲兩河夫四十萬人。蔚州交牙山。採木爲楫。由唐河運入虎州。金人於雄州北立城曰虎州。意以雄爲熊。謂虎可以勝熊也。造戰船。將由海道以窺我也。自靖康以來。中原之民。不從金者。於太行山相保聚。初。太原張橫者。有衆二萬。案繫年要錄作二千。往來嵐憲之境。嵐憲知州同知。領兵一千五百人。入

山捕之爲橫所敗。兩同知俱被執。又梁小哥者。有衆四千。破神山縣。神山距平陽帥府百里而近。本府遣兵三千。付總管判官鄧奭。案繫年要錄作鄭奭將而討之。金軍遙見小哥旂幟不敢進。旣而有都統馬五者。領契丹鐵騎五百至。責奭逗遛。併將其軍與小哥戰。亦敗而死。小哥名青。懷衛間人也。

中興小紀卷二十

紹興六年

歲在丙辰

春正月詔四川都轉運使趙開親董餉至宣撫使吳玠軍前都督張浚亦奏詰開違慢又

詔四川安撫大使席益趣開行且除開徽猷閣待制復降指揮轉運使不當與四路漕臣同繫銜凡此皆

所以解間隙趣應辦也辛巳陞玠宣撫使仍罷綿州宣撫使軍馬聽玠移撥錢物委開拘收都督張浚

請親行邊郡分命諸將以觀機會上乃令浚往視師初言屯田者甚衆而行之未見其效至是浚兼領屯

田以出始置官屬凡所行之事皆畫一而去趙鼎事實曰張浚再出江上欲謀大舉深慮諸將議論不同此行未能使舉事莫若兼領屯田而出他日歸見上猶足以藉手浚大以爲然曰邊事未成當大作屯田而歸不爲無補於是置官屬畫一而去先此言屯田者甚衆至是始爲之其後歲收十萬逮今獲其利也

己丑上謂宰執曰前日三大帥屬官陳桷等引對朕諭以朝廷養兵之久國用旣竭民力已困須專意

屯田此亦自古已成之效況軍中亦須先立家計若有機會方圖進取趙鼎等曰如此措置社稷之幸時

軍需甚急故有鬻爵及配賣度牒錢引數事朝士多以爲不可於是言者論之初中書舍人任申先趙鼎

客也至是獨助張浚乃攜臺諫章示館職張戒曰此論何如戒言不知申先曰子以臺諫之言不敢論耶

於是給事中呂祉謂人曰申先姦邪第知附右相不悟人之嗤己然或者以爲社之附浚又甚於申先者

也時參知政事沈與求累乞罷癸亥除資政殿學士知明州以僉書樞密院折彥質權參知政事與

求未幾提舉洞霄宮時趙鼎張浚俱帶都督諸路軍馬置司於行在浚出視師江上以行府爲名而鼎居

中總政事表裏相應。然浚所行之事，亦有關三省樞密院者。先是與求及知樞密院孟庾，皆不能平。常曰：三省樞密院，乃奉行行府文書耶。庾已稱疾求罷，至是與求復去。趙鼎事實曰：時張浚在江上，經營與舉多故，遇人主特達之知心，惟至公務要協濟，未嘗有所疑忌。而行府所行之事，往往侵紊三省，知樞密院孟庾參知政事沈與求憤然不平，曰：三省樞密院，乃奉行行府文書耶。各稱疾罷去，鼎乃一切隱忍，未嘗計較。無分彼我所幸國事，有濟然人以此為難也。

都督張浚至江上，會諸大帥議事，乃命韓世忠據承楚以圖淮陽，命劉光世屯盱眙之計。案之計二字誤。北盟會編言命劉光世屯盱眙，命楊沂中領精兵為後翼，命岳飛進屯襄陽，以窺中原。於是國威大振。上御書裴度傳遣賜浚以示至意。浚於諸大帥中獨稱世忠與飛可倚以大事。時

劉豫頗於僞境聚眾，世忠自楚州引兵渡淮擊敗之。直至淮陽而還，上手書賜浚曰：世忠既捷，整軍還屯，進退合宜，不失事機，亦卿指授之方。卿更審虛實，徐為後圖。或遣岳飛一窺陳蔡，使賊枝梧之，不暇也。

二月庚寅，宰執奏四川制置使席益按夔路帥臣罪狀，上曰：蜀去朝廷遠，號令久不及，官吏無復知畏。前

日周祕論蜀中銓選事，朕再三勉之，云蜀中利害，久無人論及。今日方見此章，祕歷城人，時為殿中侍御史。時前宰臣汪伯彥等進建炎中興日曆，詔付史館修元帥府事實。既而纂一十卷書成，鼎上之。鼎上

府事實在四月今聯言之。先是去歲旱傷，湖南尤甚，安撫制置大使呂頤浩入境，即奏截撥上供米三萬石，及令廣

西帥漕兩司備五萬石，水運至本路，以充賑濟。又乞降助教敕度牒，誘上戶糴米，民不能耕，則借之糧種。

夏稅亦俟秋成併輸，全活甚衆。先是郴衡桂陽草盜紛起，頤浩遣統領官步諒、裴鐸、招捕悉平。鼎寇楊么既滅，有雷進者，尙據慈利縣。是春，其黨伍俊斬進首，詣知鼎州張夔降。夔遣統制官覃敵、梁吉提兵悉撫

定之。初，劉豫毀明堂，得金龍之金四百兩，大銅錢三百萬。是月，以明堂基爲講武殿，改其門亦號講武。時豫再開貢舉，取進士邵世矩以下六十九人。夏四月，庚子，戶部郎官兼主管都督行府財用張澄請依四川法造交子與見緡並行，仍先造二十萬，用于淮江。旣又詔造百五十萬充糴本，而未椿到見錢，于是右諫大夫趙霈等謂恐失信于民，且言其弊有五。望詔大臣詳議而速罷之。丙午，送戶部。時翰林學士胡交修亦上疏力陳其害，以爲寧崇大錢，覆轍可鑒。方大臣建議，舉朝無敢非者。法行未幾，錢分兩等，市有二價，姦民盜鑄，死徙相屬，終莫能勝。今之交子，校之大錢，無銅炭之費，無鼓鑄之勞，一夫日造數百，紙鬼神莫得窺焉。真贋莫辨，轉手相付，旋以僞券抵罪，禍及無辜。久之，見錢盡歸藏錕之家，商賈不行，細民艱食，必無束手待盡之理。比及悔悟，恐無及矣。遂詔不行。時臨安府火災，或數刻，燬千家。趙霈建言，請峻其刑名，仍保五均坐。庶火初作，衆亟撲滅，事下刑部立法。禮部尙書李光適兼權刑部，不奉詔，乃抗論天災譴告人君，宜修德以厭之，不當峻法濫及無知之民。朝論謂刑部有司也，抗疏爲非，而諫官之論宜略爲施行。中書舍人董弇白宰執曰：二者之論，俱不爲過，使兩易之，則各爲舉職矣。五月壬辰，正字喻樗言：祖宗制科，以待非常之才，猶許士人應選。近設宏辭科，望詔舉人有願兼應者。聽詔，送禮部。其後不行。都督張浚奏，以戶部郎官主管都督行府財用張澄爲兩浙轉運副使。時駐蹕之所，計司已劇，而淮南漕職亦命澄兼領。是月，左宣教郎平陽蕭振召對稱旨，上欲除臺官，適無闕。趙鼎欲授以樞密院副承旨，上令與祕書郎越數日，鼎薦人爲監察御史，御批除振。六月丁未，宰執奏前日地震，上曰：上天

謹告。朕亟憂恐。趙鼎曰：嚮緣地震。呂頤浩罷職。上曰：頤浩之罪非爲此。卿等但與朕協力修政事。以答天譴爾。戊申。趙鼎乞下詔求言。上可之。禮部尙書李光以疾乞祠。是日。除端明殿學士。知台州。上以襄陽府上流重地。已令帶京西安撫經略使。壬子。又詔荆府亦依例帶湖北安撫經略使。時已召襄陽帥保康軍承宣使王彥爲行營前護軍都統制。以湖南漕臣權帥事。薛弼代之。弼入境。彥遣親兵七千人來迓。其將言王太尉未有去意。弼徑馳入。彥晨未起。已報新帥入府。遽出交政。仍起彥所部八字兵一萬赴行在。人頗不樂。弼竭帑犒師。彥遂統之以行。秋七月癸酉。以吏部侍郎劉大中爲兵部尙書。初。內侍馮益以潛藩舊恩。恃此頗恣。建炎間。駕幸浙東。因與大將張俊爭渡。以語侵俊。復訴于上。事下御史臺。趙鼎時爲殿中侍御史。嘗論益之橫。以爲明州之變。本於內侍覆車之轍。不可不戒。趙鼎事實曰：內侍官而餘風未殄。其後鋒銜稍出。如馮益者。尤爲暴橫。始因詭張浚鼎常論劾。至是。奏斥去之。其黨始知畏。中外翕然稱快。是日上因論及司馬光字畫端勁。如其爲人。朕恨生太晚。不及識其風采。八月。淮東宣撫使韓世忠引兵自淮陽已還楚州。江東宣撫使張俊既城盱眙。遂進屯泗洲。湖北京西招討使岳飛亦遣兵自蔡州焚其積聚。至是。張浚承詔入覲。力請上進臨建康。以爲不可緩。然朝論同者極鮮。惟上斷然不疑。初。浚在江上。謀渡淮北。嚮惟恃韓世忠爲用。世忠辭以兵少。摘張俊之將趙密爲助。浚以行府檄俊。俊拒之。謂世忠有見吞之意。浚奏乞降聖旨。而俊亦稟于朝。鼎白上曰：浚以宰相督諸軍。若號令不行。何以舉事。俊亦不可拒。乃責俊當聽行府之命。不應尙稟於朝。復下浚一面專行。不必申明。慮失機事。時議者以爲得體。至是。浚歸奏。終以俊不肯分軍爲患。鼎謂

浚曰。世忠所欲者趙密。今楊沂中武勇不減于密。而所統御前兵。誰敢覬覦。當令沂中助世忠。卻發密入衛。俊尙敢爲辭耶。浚曰。此上策也。某不能及。趙鼎事實曰。向降指揮責張俊。自當一聽行府之命。乃朝廷主張行府及楊沂中爲泗上之行。破劉猷以成功。實肇於此也。

癸丑。宰執以郭執中遺表進。上歎息久之。張浚曰。執中當崇寧初。以上書邪等。禁錮二十年。晚遭陛下。而年已老。不得收尺寸之效。上問當時以何事入邪等。趙鼎曰。凡蔡京蔡卞所惡者。皆入邪等。折彥質曰。汴京以紹述爲說。凡承己者。盡誣以誹謗先帝。上愕然曰。上皇內禪之初。尙遣梁師成諭淵聖曰。司馬光前朝名相。今諸事當以光爲法。則上皇之意可知矣。朕今行事。與上皇時豈無修潤者。要之從百姓安便而已。百姓安便。乃上皇之意也。甲寅。上謂宰執曰。近時士大夫數言縣令多不稱其任者。朕再三思之。亦難盡擇。莫若精選監司郡守。以爲要道。正如朕深居九重之中。安能盡知百執事能否。當留意宰相耳。上殿官劉長源奏。元符人臣子孫。未必盡愚。元祐人臣子孫。未必皆賢。且引用房遺愛事爲證。乙未。上謂宰執曰。長源昨日開陳。至比戰國之士。若不用於秦。則歸楚。議論殊可怪。張浚曰。長源不學無識。疏中引事。皆非所敢聞者。況元符人臣子孫。孰爲可用而不用。折彥質曰。如蔡京王黼。乃國家之深仇。罪通于天。幸逃誅族。正使子孫真有可用。猶不當用。乃詔長源與遠小監當。時四川都轉運使趙開。復與制置使席益議不協。開以舊宣撫司贍軍財賦。不許他司移用。又言益截都轉運司錢。於閬利州糴米。非是。又言應副宣撫使吳玠軍需。紹興四年總爲錢一千九百五十餘萬緡。五年又增四百二十萬有奇。今蜀中公私俱困。事急可憂。又言軍務惟錢糧最大。欲自都督府制其調發。庶無妄動枉費。以損威勢。而將兵

所給皆宜覈實。朝廷知開難與益玠共事。是月趙開赴闕。既而益奏行轉般摺運之法。雖甚利。而玠與益相疑。上下觀望。終不果行焉。吏部尙書兼翰林學士孫近。除龍圖閣學士。知紹興府。時百司並留臨安。常程事取決於留守司。所不能決者。申行在。詔兵部尙書劉大中。翰林院學士朱震。侍讀學士范沖。中書舍人陳與義。董彝。戶部侍郎趙霈。起居郎張燾。侍御史周祕。左右司諫陳公輔。王縉。左右司郎官耿自求。徐林等。竝扈從。主管軍馬權殿前司解潛。提舉宿衛親兵劉錡。同總禁衛之職。而知臨安府梁汝嘉。充隨駕都轉運使。九月丙寅朔。上發臨安府。丁卯。上至臨平鎮。戊辰。宰執閱楊沂中下統制官王存。吳進。將所部二千人還臨安。聽留守司用。進勇於戰。常對御騎射。上曰。一好漢。進聞之。刺好漢。吳制字作榜。心。每閱兵。則披以示衆。聖駕經崇德縣。引對知縣趙渙之。而時有言渙之因緣搔擾者。己巳。上謂宰執曰。昨日渙之對。議論殊無可取。朕問民間疾苦。輒云朝廷每加寬恤。民間別無事。又問戶口多寡。亦慢不省。趙鼎曰。陛下所以延見守令。正欲知民間爾。上曰。朕猶恨累日不能親乘馬往田間勞問父老。鼎曰。陛下卹民如此。天下幸甚。庚午。上次平江府。初。劉豫因金大帥尼雅滿下高慶裔所推。尼雅滿請于故金主晟而立之。豫每歲於二人厚有所獻。而蔑視其他諸帥。故多憾焉。皆謂我等冒矢石拓土地。乃爲慶裔輩所賣。至是豫聞上將親征。遣人告急於金主亶。求兵爲援。且乞先寇江上。亶會諸帥議之。皇伯領三省事。宋國王宗磐曰。先主所以立豫者。欲豫闢疆保境。我得息兵安民也。自立豫之後。既不能自守。兵連禍結。愈無休時。今若從之勝。則豫獲其利。敗則我受其弊。況前年因豫乞兵。常不利於江上矣。今何可再

從之。賈遂卻豫之請，許其自行。且遣烏珠提兵黎陽，以觀釁焉。時金人已厭豫，然未廢之者，以尼雅滿猶在故也。豫以僞皇子左丞相麟領行臺尚書，正管殿前司許清臣權大總管府，右丞李鄴，戶部侍郎馮長寧皆參行臺謀議。與李成、孔彥舟、關師古輩悉在麾下。僉鄉兵三十萬，號七十萬，分道入寇。西路趨合肥，以麟統之。東路由紫荆山出渦口，以姪猗統之。諜報至，僕射張浚復往江上視師。趙鼎事實曰：聖駕至平江，未浹日已報賊至。右相張浚遂出，時劉麟一項趨合肥，麟弟猗一項，健及滁和、淮甸大擾。是時張浚駐盱眙，楊沂中屯泗上，韓世忠在楚岳飛在鄂，聲勢了不相及。獨劉光世大兵在太平，光世遣輕騎據廬而松江一帶更無軍馬，朝廷甚憂之。己卯，上諭宰執曰：前此大臣誤國，困百姓以供不急之物，今正用兵，未能除蜀力役，真有愧也。時將臣趙密、巨師古軍中多苦重腿之疾，上賜之藥，軍士服者一服而愈。庚辰，趙鼎奏其事，上曰：朕常留意於藥，每退即令醫者診脈，纔有虧處，即治之。正如治天下，不敢小害而不去也。史館修撰范冲言：重修神宗實錄於朱墨二本中有刊定奉詔別爲考異一書，明著去取之意，以垂後世。今重修哲宗實錄，考其議論多誣，亦乞別爲一書，以辨誣爲名。壬午，詔從之。初，詔吏部侍郎詳定一司敕令，晏敦復等修紹興祿秩敕令格式。至是書成。丁亥，右僕射張浚上之。時湖北岳飛軍初置總領錢糧，戊子，詔戶部郎官崔蠡爲之。於鄂州置司。初，飛一軍每月費錢三十九萬緡，歲計四百六十萬緡餘。至是蠡申飛軍中每歲統制統領將官使臣三百五十餘員，多請過一十四萬餘緡。軍兵八十餘人，多請過一千三百餘緡。總計一十四萬餘緡。於是左正言李誼言：蠡職在出納，理當究心。然慮點檢苛細，若行改正，卻合支券錢六萬餘貫，纔省九萬緡而已。望令依舊勘支，務存大體，以副陛下優恤將士之意。蠡武進人，端友子，誼南昌人也。

癸巳翰林學士朱震言。今以戰馬爲急。而買於廣右。深慮夷人爲姦。伺我虛實。乞諭帥臣。凡買馬必擇謹密之士。庶消患於未然。異時西路通。則漸減廣馬之數。乃詔帥臣提舉買馬官。嘗譏察之。不得。因以生邊患。時右司諫王縉。以大臣不和爲憂。乃言。今陛下所與共濟艱難。復大業者。二三大臣爾。或出而總戎。或處而秉軸。交修政事之間。進退人才之際。謀慮有不相及。則初意未必盡同。苟無私心。惟其當而已。願戒大臣。俾同心同德。絕猜間之萌。以協濟國事。至再三言之。冬十月。賊衆十萬。已次濠壽之間。張浚拒之。卽詔并以淮西軍屬浚。主管殿前司楊沂中爲浚統制官。浚遣沂中至泗州。與俊合。且使謂之曰。上待統制厚。宜及時立大功。取節鉞。或有差跌。浚不敢私。諸將皆聽命。戊戌。沂中統兵至濠州。癸卯。上謂宰執曰。劉光世之意。欲退保采石。趙鼎曰。諸處探報。殊無金人自當鏖戰。若官軍不能勝。豫賊則何以立國。但光世隨處分兵捍賊。已見失勢。今已渡淮。當遣張浚軍與光世合。乃爲得計。萬一賊得志於光世。則大事去矣。折彥質曰。誠如趙鼎所論。上顧鼎曰。卿此策頗合朕意。度金人行兵不如此。必止是劉豫之衆。合軍擊之。無不勝者。時賊軍東路。既敗。引數騎挺身逃去。西路麟所統麟。聞猊敗。亦望風而遁。光世乘勢追襲。亦捷。通兩路所得船數百艘。車數千兩。器甲金帛錢米軍需之物。不可勝計。京東金人尋亦退走朔方。大恐。上以手書賜浚。略曰。賊雖犯順。侵壽及濠。卿獎率師徒。臨敵益壯。遂使凶渠宵遁。同惡自焚。寤寐忠勤。不忘嘉歎。仍令浚具上都督府隨行官吏軍兵推賞。浚言賞或濫加。則將士解體。遂惟保奏有戰

勳者。陳官陳公補書。前日賊犯淮西。諸將用命。應香屢奏。邊上稍寧。蓋廟社之靈。而陛下威德所至。然行

賞當不踰時。廟堂必有定議。臣聞濠梁之急。張浚遣楊沂中來撓。遂初則兵此項固不可掉。魯光世不守廬州。而濠梁戍兵輒便抽回。如渦口要地。更無人防。若非沂中兵至淮西。焉可保哉。光世豈得無罪。此昭然無可疑者。又楊沂中之勝。以吳錫先登。光世追賊。王德尤爲有力。是二人當有崇獎。以爲諸軍之勸。若韓世忠屯於淮東。賊不敢犯。岳飛進破商鞅。擾賊腹脅。二人雖無淮西之功。宜特優寵。使有功見知。則終能爲陛下建中興之業矣。旣而賞功。加浚少保三鎮節度使。沂中爲保成軍節度使。殿前都虞候。除浚及沂中在十二月。今戊申。上語及張浚。平李成。得敗卒八千人。而浚纔有萬衆。明日又戰。恐其爲亂。夜遣陳思恭。盡殮之事。雖不得已。然朕今思之。尙寒心也。上又謂宰執曰。近日淮西有警。朕常夜分方寢。奏報到。輒披衣而起。或至再三。趙鼎曰。致陛下憂勞如此。臣等之罪也。時楊沂中奏捷。俘戮甚衆。辛亥。上愀然謂宰執曰。此皆朕赤子。賊迫之南來。旣犯兵鋒。又不得不殺。念之痛心。顧趙鼎曰。可更敕諸將。爾後務先招降。其陣亡者。亟瘞之。癸丑。以巡幸。隨軍轉運使梁汝嘉爲浙西淮東沿江制置使。仍兼隨軍轉運之職。先是詔湖北京西招討使岳飛往駐江州。癸酉。飛奏已至上。上曰。淮西旣無事。飛不須更來。趙鼎曰。此有以見諸將知尊朝廷。上曰。劉麟敗北。朕不足喜。而諸將知尊朝廷爲可喜也。司馬光作通鑑。首論魏斯。趙籍韓虔爲諸侯。以爲禮莫大於分。分莫大於名。何謂分。綱紀是也。何謂名。公侯卿大夫是也。又曰。貴以臨賤。賤以事貴。上之使下。猶心腹之運手足。根本之制枝葉。下之事上。猶手足之衛心腹。枝葉之庇根本。其措意深矣。有國家者。當以此爲先務也。十一月。丙辰。金人遣使問劉豫罪。豫惶懼。免狴爲庶人以謝之。於

是金廢豫之意決矣。起居舍人呂本中言。自古中興。必有根本之地。以制四方之地。有根本之兵。以制四方之兵。今根本之地。不過江浙福建。而諸路凋殘。民力已困。若根本之兵。則禁衛是也。而單弱不可用。令大臣先求二者之要。而行之。時本中權中書舍人。有益階州倉草場苗豆者。以贓獲罪。詔黥之。本中繳奏曰。近歲官吏犯贓。多抵黥罪。且既名士人。行法之際。宜有所避。況四方之遠。或有枉濫。何繇盡知。若遽施此刑。異時察其非辜。雖欲深悔。亦無所及矣。論者以嚴刑上法祖宗。夫祖宗之時。臨機制變。事有不得已者。然自仁宗而降。寬大之政。久已成風。累聖相承。不敢輒易。今一旦盡改成法。欲用祖宗權宜之制。則將重失人心。臣未見其可也。又此刑既用。臣恐後世不幸。姦臣弄權。必且借之。以及無罪。直言私議。亦不能免。何者。用之已熟。彼得藉口。不以為異也。使國家此刑不絕。則紹聖以來。儉人盜柄。搢紳遭此。殆將無遺類矣。願酌處恆罰。以稱陛下仁厚之意。凡兩奏。從之。十二月甲午朔。曲赦淮西。召龍圖閣學士孫近。為吏部尙書。三省言。昨遣使諸道。惟川陝未曾選官。乃詔右司員外郎范直方。宣諭兩路。及撫問吳玠一軍。右僕射張浚。還平江。隨班入見。具奏劉光世屯事。上曰。卻賊之功。盡出右相。時趙鼎等已議回蹕。臨安浚力請。幸建康。且言天下之事。不倡則不起。不為則不成。今四海民心。孰不思王室。而金僞脅之以威。雖有智勇。無緣展竭。比三歲間。賴陛下一再進撫。士氣稍振。今當示以形勢。激忠興懦。則三四大帥。不敢偷安。蓋天下者。陛下之天下。陛下不自致力。以為之先。則人有解體之意。日復一日。終以削弱。異時復詔巡幸。其誰信之。何者。彼知以此為避地之計。無意於圖天下故也。論者不過曰。萬一有警。難於遠避。夫

將士用命扼淮而戰破敵有餘苟人有離心則何地容足又不過曰當秋而戰及春而還此但可以紓一時之急年年爲之人皆習熟難立圖矣又不過曰敵占上流順舟可下今襄漢我有舟何自來使賊有餘力水陸偕進陛下深處臨安亦能安乎鼎言弱不敵強且宜自守未可以進乙巳鼎罷除觀文殿大學士知紹興府之策當獨任國事諷侍從台諫及其黨與攻鼎出知會稽時張浚專任國政浚首言親民

朱勝非閒居錄曰趙鼎張浚爭權浚自謂有卻敵之功與復

時張浚專任國政浚首言親民

之官治道所急比年內重外輕流落於外者終身不用經營於內者積歲得美官又官於朝者多不歷民事請以郡守監司有治狀者除郎官郎曹淺者除監司郡守館職未歷民事者除通判仍乞降詔從之乃下詔略曰朝廷設官本以爲民比年重內輕外殊失治道之本自今監司郡守秩滿考其治効內除郎官而未歷民事者使復承流于外庶幾民被實惠以稱朕意辛亥召資政殿學士提舉洞霄宮張守爲參知政事丙辰湖南大帥少保案此句有脫誤繫年要錄作呂頤浩爲浙西安撫制置大使行宮留守

翰林學士朱震請編古循吏傳一書以賜守令之有治行者上曰不若有治行者進擢無治行者隨輕重責罰自有勸懲賜循吏傳恐無補於事己未以兵部尙書劉大中爲龍圖閣直學士知處州辛酉言者請以寺監丞簿編修刪定檢鼓等院官未歷民事者竝堂除大邑下其書左右司辛酉都司言寺監丞簿已准者劄別措置外其編修刪定檢鼓等院欲堂除遇闕大邑從之遂以山陰及諸暨餘杭富陽江寧上元南昌分寧等四十處爲大邑浙東帥觀文殿大學士趙鼎在越惟以束吏卹民爲務每言不束吏雖善政不能行蓋除害然後可以興利易之豫利建侯行師謂建侯行師乃所以致豫解公用射隼于

高塘之上。謂射隼而去小人。乃所以致解。鼎之學得於易者如此。至是姦猾屏息。又場務利入之源。不令侵耗。財賦遂足。是冬。劉豫遣其僞皇子府參謀官馮長寧。請於金主亶。欲立子麟爲儲嗣。亶曰。先主立爾者。以謂有德於南。爾子亦有德耶。予當遣人諮訪之。時豫兵敗。故以此探金之意。不從。豫自知危矣。夏國馬多爲韃靼所盜。是歲。夏國興兵。自河清軍渡河。由雲中境徑之韃靼。取馬而歸。往來皆不假道於金國。初。大帥尼雅滿。烏克紳。皆鎮雲中。故夏人不敢動。二帥已罷兵柄。而左監軍薩里罕代守雲中。夏人知其無能爲。所以徑行不顧。金人亦不敢問也。

中興小紀卷二十一

紹興七年

歲在丁巳

春正月癸亥朔詔朕將親臨大江駐蹕建康以察天意時左司諫陳公輔勸上幸建康甚

力公輔又論今世尙程頤之學以鄙言怪語爲伊川之文高視闊步爲伊川之行人能習此則爲賢而舍

是皆非也上因詔學者令以孔孟爲師時錄黃下禮部吏欲鏤版中書舍人董弅權侍郎曰少俟之郎官

黃次山申臺謂弅沮格詔令於是侍御史周祕彈弅出之除集英殿脩撰知衢州

趙鼎雜記曰其後給中朝廷擬脩注上曰非告訐董弅者耶此風不可長遂令補外除

胡安國聞之與其子中書舍人寅書曰子發求去晚矣當輔公之說纔上若據正論力爭則進退之義明

今不發一言默然而去豈不負平日所學惜哉且復問宰相云某當去否旣數日又云今少定矣此何等

語遇緩急卽是爲偷生免死計豈能爲國遠慮平生讀易何爲也於是安國自上奏曰士以孔孟爲師不

易之至論然孔孟之道不傳久矣自程頤始發明之而後其道可興至今使學者師孔孟而禁不得從頤

之學是入室而不由戶也夫頤之文於諸經語孟則發其微旨而知求仁之方入德之序則鄙言怪語豈

其文哉頤之行則孝悌顯於家忠誠動於鄉非其道義一介不以取與則高視闊步豈其行哉自嘉祐以

來頤與兄顥及邵雍張載皆以道德名世如司馬光呂公著呂大防莫不薦之頤有易春秋傳雍有經世

書載有正蒙書惟顥未及著書望下禮官討論故事加此四人封爵載在祀典比於荀楊之列仍詔館閣

哀其遺書。以羽翼六經。使邪說不得作。而道術定矣。丙寅。上謂宰執曰。昨日張俊呈馬。因爲區別良否。皆不差。張浚曰。聞陛下聞馬足聲。而知其良否。上曰。然。因論觀墨。惟李廷珪墨有骨有肉。昔道君令潘谷及蔡京令張滋造墨。皆用廷珪法。而谷止得其肉。滋止得其骨。雖暗中入亦可知也。浚曰。物有易知。惟知人爲難。上曰。人誠難知。張守曰。惟以爲難。則用捨必不苟。浚曰。孔子言始吾於人也。聽其言而信其行。今吾於人也。聽其言而觀其行。此兩言爲要。上曰。是孔子於人。其始未能無失也。浚曰。聖人待人以誠。故聞其言而信之。至爲小人所紿。而後加察焉。故必觀其行。上以爲然。先是諸路贍大軍錢。令轉運司於經制權酤。征商等數內。逐月椿辦。因號月椿錢。然所椿不能什之二三。餘州縣之吏。臨時措畫。錙銖而積。僅能充數。一月未畢。而後月之期已迫。戊辰。戶部郎官霍蠡言。月椿錢病民最甚。乞詔守臣具所椿窠名。幾何。與臨時措置者若爲而辦。朝廷召諸路漕臣。稟決其可否。而罷行之。又江西南湖。南認發岳飛軍月椿錢。亦令具申省。己卯。吏部尙書孫近。請詔三省樞密院。凡所以靖中原。制敵國者。日夜講求。而常程之事。付之有司。上諭宰執曰。近所論甚當。常程事可付之六曹。張守言六曹有常法。故不敢專決。而朝廷則可取旨行之。上曰。六曹長貳不任責。則事巨細皆取決於朝廷。若任責。則朝廷事自然清簡。安當選擇長貳而已。淮東宣撫使韓世忠。與僞境淮陽軍對壘。引兵攻之。未能下。世忠奏已回楚州。召資政殿學士提舉洞霄宮沈與求。爲提舉萬壽觀兼侍讀。既至。癸未。以翰林學士陳與義爲參知政事。與求爲同知樞密院事。乙酉。詔案此下繫年要錄有樞密二字。本兵之地。事權宜重。依祖宗故事。置樞密使副。而知同僉書。亦皆仍舊。

初以道君遠在沙漠。乃遣問安使何薜等往金國通問。至是還。始知道君及寧德皇后已相繼上仙。丁亥。宰執入見。上號慟。擗踊終日不食。張浚等力請方進少粥。是時禮儀皆正。字權禮部郎官眉山孫道夫草定。方議論之際。翰林學士朱震多依違人。或罪其緘默。獨著作佐郎王蘋以謂若子發建明。是已取名而歸過於上也。子發之意。或出於此。此據呂大臨見聞志以觀文殿學士醴泉觀使兼侍讀秦檜爲樞密使。舊例宰執新除。雖到堂即時歸第。是日以何薜等回留檜議事。不許歸第。初。馬軍帥解潛與樞密院都統制王彥不協。兩軍之士嘗交鬪於通衢。中外訥訥。是月。平江民居火。潛所部入人室。聲言救火而攘其貨。有旨兵士免推治。管轄使臣劉舜臣案繫年要錄作李堯臣降兩官。給事中胡世將駁奏曰。潛統軍無律。不黜無以明賞罰。乃詔罷潛及彥。以浙西淮東制置副使劉錡主管馬軍。併兩軍以屬之。初。河南布衣尹焞漸之孫也。師故程頤。得其師學。靖康初。召至京。授和靖處士。建炎兵亂。鎮撫使翟興聘之。不就。徙居長安。劉豫僭立。使僞帥趙彬招以厚禮。焞逃去。遂入蜀。止於涪。先是范冲在經筵。力薦。召之不赴。遂用程頤故事。授左宣教郎。崇政殿說書。先是焞至九江。值左司諫陳公輔論學程氏者之弊。復辭曰。學程氏者焞也。於是右僕射張浚顯言其嘗拒劉豫之節。焞始就職。自復賢良方正科。久未有應詔者。原案此節詞意未足。疑有脫文。二月戊午。詔太尉湖北京西安撫副使岳飛爲宣撫使。時淮東宣撫使韓世忠。江東宣撫使張俊。皆已立功。而飛以列將拔起。世忠俊不能平。先是飛皆屈己下之。書數通。俱不答。及飛破楊么。獻樓船各一。兵徒戰守之械畢備。世忠始大悅。而俊益忌之。飛參議官薛弼。雖每勸飛調護。而幕中之輕銳者。復教飛勿苦降。

意於是飛與俊隙始深矣。庚申上發平南府。幸建康府。三月癸亥朔。上次丹陽縣。幸執奏岳飛下將士功賞。上曰。諸將每奏乞功賞。朕未嘗許之。一切付之有司。所以抑其僥求也。功有大小。賞有厚薄。朕何敢私。亦戒諸將不可容私。若私則有功者解體。緩急何以使人。張浚曰。陛下誠得御將之道。三月甲子。上次鎮江府。丁卯。以吏部侍郎呂祉爲兵部尚書。仍兼都督府參議軍事。己巳。上次下蜀鎮。上謂宰執曰。道中閱韓世忠背嵬軍。極驍健武藝。比往日益精矣。張浚因言諸將之才不同。要在得士心。則人肯用命。上然之。初。臨安行宮留守呂頤浩至平江。欲勸上輟行而不得朝。乃隨上西來。至是始見。上撫諭遣之。及頤浩回臨安處事。甚有緒。豪右莫敢犯禁。始奏浙江渡。以舟之大小定人數多寡。後遵用之。辛未。上至建康府駐蹕。戊寅。同知樞密院事沈與求進知院事。先是。上謂宰執曰。宣和皇后春秋已高。朕朝夕思之。不遑安處。張浚等曰。聖孝如此。可以格天矣。己卯。詔宜尊爲皇太后。中原遺民有自汴都來者。言劉豫自麟猊敗後。意沮氣喪。其黨皆攜貳。金人謂豫必不能立國。而民心日望王師之來。朝廷因是遂謀北伐。都督張浚乃出行淮上。撫諭諸軍。且築廬州城。時議者謂淮西宣撫使劉光世昨退當塗。幾誤大事。後雖有功。可以贖過。不宜仍握兵柄。又言其軍律不嚴。士卒恣橫。浚歸亦言光世不卹國事。語以恢復。則意氣怫然。於是光世屢辭疾。乞解兵柄。乃從而罷之。甲申。除光世檢校少師萬壽觀使。以其兵屬都督府。趙鼎事實曰。初。駕至建康。當軸者以光世不足仗。遣其腹心呂北歸燕山。趙鼎事實曰。初。駕至建康。當軸者以光世不足仗。遣其腹心呂夏四月丙申。權主管馬軍劉錡言。得旨撥行營前護副軍侍衛馬軍。今欲併爲十二將。每二

將爲一軍。餘兩將爲遊奕軍。從之。丁酉。詔徹猷開待制王倫奉使大金國。迎奉梓宮。以武經大夫高公繪副之。皇太后禮物。例支金一百兩。附倫等行。初靖康執政孫傅。張叔夜。從二聖北狩。至是樞密使秦檜因言。二人家屬在敵中甚貧。宜有賑給。上詔依宇文虛中例與之。上曰。靖康中。耿南仲用事。每遣使憚行。則威以軍法。及旣行。身分所請多不給。家屬至狼狽。比還。恩澤又復鑄滅。如此何以使人。張浚曰。南仲誤國。何止此事。先是上批內侍鄭謨。除帶御器械。己亥。復諭宰執未須行。朕昨召用徐俯。外議謂謨所薦。朕何嘗容內侍薦人。止緣黃庭堅集。有徐郎徐甥。後胡直孺薦俯自代。質之汪藻。藻以爲然。遂召用之。今謨新命。恐外間紛紛。不若止與在外宮祠。張浚等曰。陛下聖慮如此。敢不奉詔。癸卯。詔諸路天寧萬壽寺觀。並以報恩廣孝爲額。初。張浚與湖北京西宣撫使岳飛議不合。飛喪母。乞持服。及棄軍而去。居江州廬山。以本軍提舉事務官張憲。權管軍事。浚因請用兵部侍郎樞密都承旨兼都督府參議張宗元。爲宣撫判官。憲在告。而宗元除書下。軍中藉藉。曰。張侍郎來。我公不復遠矣。參議官薛弼。請憲強出臨軍。憲諭羣校曰。我公心腹事。參謀必知。盍往問之。羣校至。弼謂之曰。張侍郎來。由宣撫請也。宣撫解軍未幾。汝輩壞軍法如此。宣撫聞之。且不樂。今朝廷已遣勅使起復宣撫矣。張非久留者。衆遂安。上詔飛入覲。弼亦移書趣飛行。至是飛偕弼入奏事。飛以手疏言儲貳事。衝風吹紙動搖。飛聲戰。讀不能句。飛退。弼進。上視之色動。弼曰。臣在道嘗怪飛習寫細字。乃作此奏。雖其子弟無知者。此據朱勝非閒居錄。及野記與薛季岳飛之過。以張宗元監其軍。蓋浚方謀收內外兵柄。天下寒心。又張戒默記曰。薛弼以甲子正月。道由建昌。謂戒曰。弼之免於禍。天也。往者丁巳。歲被旨從鵬入覲。與鵬遇於九江之舟中。鵬說曰。某此行將陳大

許弼請之。鵬云：近講報金人，以儲貳大事入京闕，爲朝廷計，其若正資宗之名，則敵謀沮矣。弼不敢應。抵建康，與弼同日對鵬。第一班弼次之。鵬下殿，面如死灰。弼造膝上曰：飛適奏乞正資宗之名，朕諭以卿雖忠然握重兵於外，此事非卿所當與也。弼曰：臣雖在其幕中，然初不與聞。昨到九江，但見飛習小楷，凡密奏皆飛自書耳。上曰：飛意似不悅卿，自以意開諭之。弼受旨而退，嗟夫。鵬爲大將而越職及此，其取死宜哉。弼又云：不知若箇書生教之耳。岳飛字鵬舉，故戒隱其語，但曰鵬云。

丁未上與宰執言，飛求解帥事。上曰：飛頃入對，請由商虢取關陝，欲併統淮甸之兵而行。朕問何時可畢，對曰：期以三年。朕諭飛駐蹕於此，以淮甸爲屏蔽。若輟淮甸之兵，便能定中原，朕亦何惜。第恐中原未復，而淮甸失守，則行朝未得奠枕而臥也。飛無以對。飛旣復任，宗元乃還。

左司諫陳公輔言：昨今月初四親奉聖語，說及岳飛。臣前此探諸人言，皆謂飛忠義可用，不應近日便敢如此，恐別無他意。祇是所見有異。望陛下加察。然飛本麤人，凡事終少委曲。臣度其心，往往謂其餘大將，或以兵爲樂，坐延歲月。我必欲勝之，又以劉豫爲不足平。要當以十萬橫截金境，使金不能援勢。孤自敗，則中原必得。此亦是一說。陛下且當示以不疑，與之反復詰難，俟其無辭，然後令之。曰：朝廷但欲先取河南，今淮東淮西已有措置，而京西二面，緩急賴卿。飛豈敢拒命。前此朝綱不振，諸將皆有易心，習以爲常。此飛所以敢言與宰相議不合也。今日正宜思所以制之。如劉光世雖罷，而更寵以少師，坐享富貴。諸將皆謂朝廷賞罰不明。臣乞俟張浚自淮西歸，若見得光世懦怯不法，當明著其罪，使天下知之。亦可以警諸將也。

初，建康府通判楊邦乂不肯降金，爲金所害。已賜田二頃，及銀絹各一百。癸丑，詔加賜田三頃，仍贈待制。上曰：顏真卿異代忠臣，朕官其子孫。邦乂爲朕死節，可不厚褒以爲忠義之勸乎。度支郎官莊必強言，聞廬壽間微有邊警，蓋因將臣入覲，而逆雛乘間渡淮。我師初不知之，則斥堠不明甚。

矣。往歲維揚之變。前監不遠。又聞淮上之師。頗有離次而去者。此必有姦人陰間以誘我之師。願詔諸將。悉以實聞。毋有所諱。甲寅。詔關都督府。知湖州汪藻。再進大觀政和詔旨。凡六年事。且言已置史館。見修日曆。此後臣不當豫。詔藻仍續編進。都官郎中馮康國言。今天付吳蜀於陛下。爲中興之基。然蜀地狹而民貧。昔諸葛亮苦食不足。運以木牛流馬。而兵遂久駐。自兵興餽餉。已八年矣。亮所苦者。無歲無之。前年陸運始行。成都潼川利三路。調夫十萬。縣官部役。先至者賞。貪姦之吏。俾夜作晝。莫卹民苦。多斃於道。運糧一石。民間費錢數十千。夫養兵所以保蜀。而民苦如此。蜀可以保乎。嘉陵江險。夏漲冬澁。終歲水運。誠莫能給。故時起陸運之役。兼將佐請米甚厚。米價高而銀絹平。旣缺正米。不免折支。所以歲費浩大。錢糧兩不給也。臣謂宜遣官諭吳玠。於三月以後九月以前。除防關外。且移兵於內郡就糧。則蜀民稍寬。可免後患。丁巳。詔關都督府。上嘗問權左司郎官孫道夫曰。卿蜀人。宜熟知利害。水運與陸運孰便。道夫言。水運遲而費省。陸運速而役煩。向宣撫司初由水運。每石取民錢五十餘千。利害可見。上曰。水運旣便。自當行之。兵國之武備。不可不養。民乃邦本。不可不恤。恤民乃所以養兵也。初。都督府議合兵北討。命參議軍事劉子羽諭指西師。且察邊備虛實。子羽還。奏敵未可圖。宜治兵廣屯田。以俟機會。至是欲以子羽領光世兵。子羽復以爲不可。乃詔子羽知泉州。時金人以尼雅滿悟室爲相。左副元帥達蘭居祁州。右副元帥烏珠已歸燕山。左丞高慶裔者。尼雅滿之腹心也。皇伯領三事省宗。磐欲挫尼雅滿。伺慶裔以賊敗。下之大理寺。獄具。當斬。尼雅滿乞免官爲庶人。以贖其罪。國主亶不從。遂斬於都市。臨刑。尼雅滿哭。

與之別。慶裔曰：公早聽我言，豈至今日我死，公其善保之。蓋慶裔嘗教尼雅滿反也。尼雅滿於是絕食，縱飲，未幾病而死。初鎮江府呂城夾岡地勢高，久不雨，則水淺而漕舟艱。至是兩浙轉運使向子諲取唐章損、劉晏考覈狀，建言欲置斗門二石礮，一以復舊迹，度費萬緡，庶爲水利。詔從之。子諲又請於德勝橋置倉和糴，因以平價，且免腳乘，欠折每上江糧運至鎮江，冬則候潮開，占舟而坊，坊摺運綱兵亦復侵耗，乞置倉以轉般爲名，諸路綱至，卽令卸納，從之。五月乙丑，上與宰執論淮西事，因曰：兵無不可用，在主將得人爾。趙奢用趙兵，大破秦軍，而趙括將之，則大敗。樂毅用燕兵破齊，而騎劫代之，則爲田單所敗。豈不在主將得人乎？秦檜曰：陛下論兵，可謂得其要矣。後數日，左司諫陳公輔因對以南兵不可用爲疑。上慨然曰：赤壁之役，曹操敗於周瑜，淝水之戰，苻堅敗於謝元，北人豈常勝哉？越王勾踐卒敗吳王，兵彊諸國，亦豈必北方士馬耶？戊寅，上謂宰執曰：治天下須恩威賞罰並行。若有恩而無威，有賞而無罰，何以爲治？朕未嘗以私怒降人一官，所以言此者，蓋姑息之風不可長也。楊沂中、朕撫之過於子弟，去年淮西有警，朕親筆戒之，若不進便，當行軍法。沂中震恐承命，所以成功。秦檜曰：陛下英武如此，中興不難致也。初，淮西一軍皆故羣盜，平時驕悍自恣。劉光世罷後，雖隸都督府，仍駐廬州。都督張浚乃請回兵部，尙書呂祉往廬州視師。及浚還朝，留祉以護諸將。至是，祉亦回，而尙未置帥。樞密使秦檜知樞密院，沈與求以握兵爲督府之嫌，乞置武帥。時統制官王德、鄺瓊二人交惡，而德乃光世愛將，遂除德爲都統制。於是瓊等大噪，列狀都督府以訟其過。先是劉豫後苑有梟鳴，又烏數十鳴於內庭，皆作休也之聲。豫惡之。

募能捕獲一梟者賞錢五千。是月無雲而雷。有龍起。撼宣德門。滅宣德二字。豫亟命修之。初神宗實錄

已成書矣。至是乃用著作郎永康何掄刊正。譌謬。六月甲午。詔前所修詳略失中。去取未當。不足垂世。令

本省官簽貼進入。趙鼎事實曰。初因臣僚上言。裕泰二史是非失實。始命官重修。鼎去國之後。有言其非

正欲平其事。故令史官自簽貼若辭。卻恐非便。既而著作郎張嶠對罷申左右史。以所得聖語云。范冲任

申先正。恐校勘官便以爲是。故實錄多舛誤。時冲申先並爲史館脩撰。綱正閱遂再辭。史館從之。又曰。後

趙鼎再相。一日見上論及史事。曰。止是修譌錯者。非有所改也。鼎曰。但所降御筆如此。外間不得不疑。上

曰。此乃宰相擬定者。俟一併降出。卿自可見。鼎又曰。近見起居注載著作郎張嶠所得聖語亦復如此。上

愕然曰。安得有此。嶠小人也。乃敢爾耶。上駭甚。謂鼎曰。嶠所記不得存留。鼎曰。前此已修入時政記。付之

史館矣。上曰。爲之奈何。曰。俟他日修日曆。當論史官除去之上。曰。甚善。蓋此事本非上意。特重違用事者

之言。丙申。羣臣詣南郊。請道君尊諡。宜天錫之。曰。聖文仁德顯孝皇帝。廟號徽宗。知樞密院沈與求

卒。時王德亦訟酈瓊等之過。乃召德以本軍還爲都督府都統制。復命兵部尙書呂祉以都督府參謀

領之。於是中書舍人張燾見張浚言祉書生不更軍旅。何得輕付。浚不從。右司諫王縉乃請於都督府屬

官中。選知兵者助之謀議。且留軍中。撫循訓練。以通將士之情。又直祕閣詹至。前在都督府機幕時已去。

亦貽書於浚曰。呂尙書之賢。固一時選。然如此軍恩威曲折。卵翼成就。恐不及前人。前此軍已付王德。德

雖有功。而與酈瓊輩故等夷耳。恐其下不能平者。願更擇偏裨。素爲軍中所親附者。使爲德副。以通下情。

浚雖然其言。未及行也。戊戌。以祉撫諭淮西諸軍。時建康有未起左藏庫錢帛。奏乞免諭。癸丑。以侍

御史周祕爲中丞。上殿官趙子琇頗知蜀中事宜。因言今四川財貨茶鹽權酷。與夫常賦之外。可以供

公上者。經度措置。固已曲盡。在今日無復理財之策。惟有惜財之術爾。願下明詔。使主兵者念民力之易

殫。凡不急支用。當有以蠲裁。典計者知戍兵之久勞。凡經費之須。務有以贍給。則兩司相通。恤民贍軍。同濟國事。丙辰。詔劄與宣撫副使吳玠。及都轉運使李迨。宰執奏上殿。官蜀人蒲贄。乞駐蹕江陵事。上曰。荆南形勢。自古吳蜀必爭之地。故杜甫江陵望幸詩云。地利通西蜀。天文照北秦。宜諭帥臣王庶。練兵積粟。及治城塹。招流移。爲悠久之計。又曰。蜀中多士。幾與三吳不殊。如贄者極不易得也。時方盛暑。張浚一日坐東閣。參知政事張守。突入執浚手曰。守嚮言某舊德有聲。今與同列徐考其人。似與昔異。晚節必竟有患失之心。是將爲天下深憂。蓋指樞密使秦檜也。浚以爲然。

中興小紀卷二十二

紹興七年秋七月乙丑。宰執奏知虔州張巽。所陳羣盜事。張浚曰。巽有材必能辦。秦檜曰。巽向知南劍州。平賊有功。而言者以爲多殺平人。毀譽是非。不公如此。上曰。大凡人爲血氣所使。而愛憎移之。所以毀譽是非不公。在人察之爾。浚曰。士大夫少學。故如此。上曰。士大夫少時爲血氣所使。而輕任喜怒。更事既多。若能知悔。則亦知改。朕爲親王時。或因事輕用喜怒。自今不忘。常自悔責。浚等曰。陛下德過堯舜。而猶記往時一言一行之失。以自悔。此聖德所以日躋也。丁卯。湖北宣撫使岳飛。遣其屬官王敏求來奏事。委曲感恩。戊辰。上語宰執曰。飛臨行時。朕明諭之云。前日陳奏輕率。朕實不怒卿。若怒卿。則必有行譴。太祖所謂若犯吾法。惟有劍爾。所以復令卿典軍。而任以恢復之事。可以知朕無怒卿之意也。飛得朕語。胸中無疑。故耳。張浚曰。陛下御將之道。可謂有餘矣。初。上因論館閣人材。以祕書郎張戒。好資質而未更事。可令作一任。後召用之。至是戒請外補。遂除提舉福建市舶。參知政事陳與義曰。陛下惜人材。除外任以養成之。聖意甚美。上曰。中書省可籍記。他日卻召用。又曰。士大夫須令更外任。不必須在朝廷。若旣練達。而止令在外。則又不盡其材之用。卻復召歸也。壬申。宰執奏都督府幹辦公事官邵溥。進其父祕閣修撰伯溫所著辨誣書。上曰。事之紛紛。止緣一邢恕爾。數十年來。士大夫攻詆。幾分爲國。幾分爲民。皆緣私意。託公以遂其事。宣仁之謗。今已明。紛紛之議。可止矣。上平日惡士大夫之用私意。思所以厚風俗如此。

癸未以旱詔求直言。時臺臣有謂右司諫王縉曰：「上任我輩言路，而外求直言何也？」縉曰：「此故事也。豈以臺諫而廢哉？」先是起居郎永康樓炤言：「唐重理財之職，故宰相兼鹽鐵轉運使。今若使宰相兼有司之職，則不可。若參唐制，使戶部長貳兼領諸路漕權，何不可之有？」蓋內則總大計之出入，外則制諸路之盈虛。以時巡行，如劉晏自案租庸，則事皆親覩。何者可行，何者可罷，斷然無復疑矣。上從之。戊子，乃詔戶部長貳時輸一員出案，以攷州縣財賦。右僕射張浚之兄滉，奉其母自蜀至上，以浚有功，將言慰其母心。乃命滉入對，賜進士出身。中書舍人張燾曰：「政宣以來，姦臣挾子弟，往往濫得儒科。陛下方與浚圖復大業，當以公道革前弊，而滉首蒙賜第，則何以塞公議？」改送著作郎何掄行下。掄奏曰：「滉賢良之子，丞相之兄，賜以出身，不爲過也。」此據張浚彈何掄章修人於是言者論燾除集英殿修撰，奉祠而去。然滉之命亦寢。右正言李誼言：「古者天子爭臣七人，唐六典諫大夫以次六員，祖宗朝諫員並置，當其盛際，以言相高。今臣獨員供職，綿力寡助，深恐不逮，望增置一二，庶有補於聖聰之萬一也。」是月，校書郎高闕言：「春秋之法，莫大於正名。今樞密院雖號本兵之地，而諸路軍馬盡歸都督府。若曰都督專主用兵，亦宜屬於樞密，不當以宰相主之。是朝廷之上，兵柄自分爲三。又周六卿，其大事則從長，小事官屬猶得專達。今一切拘以文法，雖利害灼然可見，官長且不敢自決，必請於朝。故廟堂之事益繁，而省曹官屬乃與胥吏無異。又政事之行，給舍得以繳駁，臺諫得以論列，儻給舍以爲然，臺諫以爲不然，則不容於不改。祖宗時有繳駁臺諫章疏，不以爲嫌者，恐其得於風聞，致朝廷之有過舉。然此風不見久矣。臣恐朝廷之權反在於臺諫，且祖

宗時。監察御史亦許言事。靖康中嘗舉行之。今則名爲臺官而實無言責。凡此皆名之未正者也。兵部尙書呂祉至淮西軍。統制官酈瓊復訟王德於社。社密聞於朝。瓊等遂謀叛。八月戊戌。擁兵衆數百謁社外階。取中軍統制官張景併行營左護軍喬仲福殺之。遂執社及廬之新舊二帥趙康直趙不羣皆北去。社謂瓊曰。爾等如此負朝廷。壬寅到淮岸。社曰。豫逆臣爾。乃降之。遂爲瓊所害。統領官尙世元持其首去。於是瓊以全軍七萬人北走降豫。趙鼎逸事曰。張浚獨當國。引呂祉爲援。除兵部尙書復用韓琦爲淮南。故力建議罷光世軍。遂以社代爲宣撫判官。社爲人剛復自任。昧於應變。既代光世。謂執政可跬步而得。璣亦狠傲。志在復仇。李著王默光世所厚也。悉以罪去。王德者光世之腹心也。酈瓊者光世舊招來之盜也。光世以瓊屢立奇功。待之與德等。社慮其部曲難制。故專任德以悅軍情。瓊不自安。會社密奏朝廷。乞罷瓊及斬策軍樞書吏朱照漏謀於瓊。瓊賽懼。翼日殺社。舉軍奔僞齊。鄭克作呂社行述曰。社乞吳錫一軍駐廬州。以備緩急。又遣轉運判官韓璣詣建康言諸將反側已定。而錫猶未至。璣以疾作滯留。時有旨除張浚楊沂中劉錡三人爲淮西宣撫使副判官。軍中已傳聞而八月七日金字牌指揮令易置分屯。次日瓊等遂叛。然是時說者皆謂社簡倨自處。將士之情不達。遂致叛。今鄭克所言恐非其實。吳國長公主奏。妾選尙潘正夫三十年矣。切見祖宗以

來駙馬都尉如石保吉魏咸信柴宗慶皆除使相。見今戚里亦多得之。正夫歷事累朝。於靖康圍城中首乞迎立陛下。早正大位。又於杭州召對。嘗言陛下倉卒渡江。禁衛未集。豫宜防變。今望特除開府。仍於檢校少保落檢校字。己亥。詔付本位都監。此後不得輒有陳請。壬寅。淮西奏至。右僕射張浚等惶懼。上曰。失三萬人。不繫國之安危。卿等不可以此介意。當益盡心職事。以爲後圖。浚曰。軍將時有叛亡。亦所不免。要是臣等非才。誤國上貽聖慮。今聖志先定。臣復何憂。趙鼎事實曰。劉光世既罷。其下已不安。當軸者俾不厭衆心。既又除劉錡制置副使。王德都統張俊宣撫使。光世將酈瓊懼併其衆。遂擁全軍五萬之衆歸於豫。報到中外皇駭。莫知所措。意瓊挾豫衆爲倒戈之計。當軸者謂參知政事陳與義張守曰。萬一侵犯

使上往何地避之與義始議移駐建康氣勢不同矣案繫年要錄注引趙鼎事實無王德都統句云楊沂中制置使攷北盟會編是時王德已來朝遣張俊楊沂中往分其兵俊爲淮西宣撫使沂中爲淮西制置使此

初劉豫連遣使乞兵於金欲併力南下金懲兩淮之敗不肯輕動豫又遣僞戶部郎官韓元英

再往以我師進臨長淮爲辭元英未回而酈瓊降豫又遣僞皇子府參謀李師雄將兵納之甲辰起居

郎樓炤請奉祠上謂宰執曰朕固深知炤但言者不已須暫令去除職與郡三數月間召用未晚朕於人

材惟恐傷人張浚等奉詔退而歎曰上愛惜士類如此中書舍人傅崧卿言今歲明堂祖宗並配外請增

設徽宗以配上帝詔侍從臺諫禮官議於是吏部尙書孫近等議以爲於經及兩漢故事皆不合兼梓宮

未還宜俟恢復然後定郊明堂之議庶不失禮經之正禮部侍郎陳公輔獨言今日祇當前期一日奏告

先帝暫假吉服行事事畢喪服如初期合禮意從之右僕射張浚求去上不留之因問可代者浚辭不對

上曰秦檜如何浚曰與其事始知其闇上曰然則用趙鼎時鼎以觀文殿大學士知紹興府乃召鼎爲萬

壽觀使兼侍讀張浚行述曰時上命浚議批召鼎既出樞密使秦檜謂浚必薦已就閣子與浚語良久上遣人趣進所擬文字檜錯愕而出後反謂鼎曰上召公而張丞相疑留上使人趣始進入

檜之交類此 旣而鼎奏蒙恩還經幄方再辭而遣使宣押臣感深且泣至西興又奉宸翰趣行且諭以圖治

之意臣無地措足然先事言之則不敢昧蓋進退人材乃其職分今之清議所與如劉大中胡寅呂本中

常同林季仲之徒陛下能用之乎妬賢黨惡如趙霈胡世將周祕陳公輔陛下能去之乎陛下於此或難

則臣何所措其手也昔姚崇以十事獻之明皇終致開元之盛臣何敢望崇而中心所懷不敢自隱惟陛

下擇之九月十日

丁未宰執奏事張浚因論淮西地險可守陳與義曰見王德淮西圖路幾不可方軌上

曰地形雖險亦在將兵者如何耳。李左車謂井陘之道車不可方軌騎不得成列而韓信卒由井陘以破趙軍。要是險不足恃也。酈瓊之叛也有將官張遇不從逆黨率其麾下自拔而歸辛亥至建康詔遇轉一官又統領官劉永史衡皆不從叛爲瓊所殺乃詔贈喬仲福承宣使張景永衡並觀察使上遣樞密都承旨張宗元至廬州招叛卒始聞呂祉守節而死癸丑詔贈資政殿大學士時上於宮中行三年之喪禮部侍郎陳公輔以謂若臨講筵恐妨退朝悲慕之情乞只令講讀官供口義以進而講讀官孫近等援引古今請依舊開講詔侍從官詳議於是右正言李誼奏臣備位言責不嫌出位言之切見真宗嗣位首命崔頤正講尙書於廣福殿英宗嗣位司馬光首請開講筵以謂陛下初臨大寶宜延訪羣臣講求先王之道是祖宗於三年之制未嘗廢學也曲禮曰居喪未葬讀喪禮既葬讀祭禮又曰喪復常讀樂章是未復常之時樂章外皆可讀也又曰居喪不言樂是居喪時自樂以外皆可言也況天子之孝與衆人異儻自同於曾閔之行豈神人所望之意乎望聖志依舊間日一開經筵燕見羣臣講求至道以增聖德天下幸甚九月丁卯陳與義奏倭載老少船未足欲捐萬緡與倭自僱上曰萬緡可惜不若令楊沂中所有借之上之愛民惜費如此辛未觀文殿大學士江西安撫大使李綱奏淮西兵叛因勸上以五事其一兼聽上深以爲然謂朕讀鄒陽傳常記其兩句曰偏聽生姦獨任成亂此言最當以一人之聰明智慮豈能周天下之變誠不當偏聽獨任也詔龍圖閣直學士章誼爲戶部尙書兼提領權貨務異時國用稍匱則更鹽法誼以對帶之法信於民故不復改給事中胡世將不爲趙鼎所知時鼎猶未至改世

將爲兵部侍郎。壬申，鄺瓊至汴京。劉豫僞授靜難軍節度知洪州，以靳賽等爲統制官，次爲諸州副鈐轄。餘授準備使喚之類。正軍所請皆不及在朝廷之日，人人悔恨。獨瓊以爲得策。中丞周祕言：右僕射張浚輕而寡謀，愚而自用，德不足以服人，而惟恃其權，誠不足以用衆，而專任其數。若喜而怒，若怒而喜，雖本無疑貳者，皆使有疑貳之心。予而復奪，奪而復予，雖本無怨望者，皆使有怨望之意。無事則主威恃勢，使上下有睽隔之情；有急則甘言美辭，使將士有輕侮之志。鄺瓊以此懷疑而叛，然則浚平日視民如草菅，用財若糞土，竭民膏血而用之軍中者，曾何補哉！陛下若不逐浚，綱紀何由而張，如尙欲觀其後效，臣謂浚之才止如是而已。願早正其誤國之罪。殿中侍御史石公揆論浚輕脫寡謀，失機敗事，尙居宰府，何以率百寮。右正言李誼亦謂浚頃以樞臣宣撫，妄作威福，致全陝傾覆，健將奔亡，其罪合誅。姑從薄責，未幾召還爲相，而尙循故轍，措置乖方，致鄺瓊以數萬衆叛去，望收還政柄，置之閑散，而右司諫王縉獨言：劉光世屯淮西士卒數萬，惟王德一軍忠勇敢戰，餘皆驕怠自肆，不可用也。一旦以德踵光世之後，鄺瓊等憚其威嚴，訴於朝，旣爲之改命，而召瓊等赴行在，乃懷疑貳，相率北去，則潛爲此謀有日矣。今張浚引咎求罷，方防秋之際，二大將又入奏事，朝無宰相，無乃不可乎！時已詔都督府與樞密院，於是參知政事張守力開陳上前，未減浚罪。壬申，罷浚爲觀文殿大學士，提舉太平觀，都官郎中趙令衿獨上疏乞留浚，而令衿亦罷。旣而祕等再論乞投遠方，以爲誤國之戒，遂詔落職。時江東宣撫使張俊見都統制王德在建康，每以厚幣結之，故德以兵八千歸於俊。右正言李誼言：張浚在陝，得專黜陟，自紹興三年至

今凡二千三百七十員。便宜推恩。有自選人爲員郎。自借官爲遙刺。自副甲頭而至橫行。蓋僅踰三年。而遷補如是之衆。朝廷加厚遠人。隨其所授。與換給真本。可謂寬矣。然不可不審。今累勞當遷者。吏部必寸量尺度而後與。其他折馘執俘。上功幕府一級。或差文吏必繩以法。何獨於此闕略之甚。臣請除軍士外。文武官更攷其濫冒者。量折減之。癸酉。詔三省權以參知政事當筆。俟除相仍舊。湖北宣撫使岳飛。以酈瓊軍叛。乞提全軍進屯淮甸。降詔獎之。大理少卿薛仁輔奏。天下獄有半年未決者。乞委提刑親問。一年未決者。具事因申省。乙亥。執政張守等言。累降聖旨。催諸路結獄。不得淹滯。如仁輔所奏。則許半年或一年矣。上以爲然。且曰。獄重事也。朝廷須當留意。舜之戒曰。欽哉。欽哉。惟刑之恤哉。死者不可復生。朕未嘗送一人入獄。秦檜等曰。陛下好生。實與天地同德。此舜之用心也。先是禮部侍郎陳公輔言。淮西軍叛。或謂朝廷緣此諸事稍沮。見謀改圖。不知今日當何如耶。謂帥不應罷。將復任之耶。謂兵不可馭。將姑息之耶。謂大臣無謀。將別用之耶。謂進臨建康爲失。將回蹕耶。此皆徒爲紛紛。未見有益。臣謂正當鎮靜。使敵無所窺。上以爲然。至是公輔又言。臣嚮者妄奏。偶合聖心。則今陛下赫然改圖。所罷帥果已復召。所移兵更令姑息。大臣又以無謀賜罷。惟未回蹕臨安爾。是臣所言。上感聖聰。無一可取。當退俟竄殛。然尙有餘說。若遂不言。死不瞑目。臣竊謂光世之召。非出聖心。乃因大將之言。如此則朝廷威令可否。皆在諸將。今後大將有過。何以處之耶。張俊一軍。久在盱眙。今令過淮西。而老小不欲。遂養之於行在。議者謂俊兵祇欲住此。緩急恐難遣行。若任其自擇。何姑息之甚耶。張浚之罷。亦緣稍振紀綱。衆皆不喜。遂激

怒陛下言者乘此擊而去之。幾於助將帥而罷宰相。何倒置之甚耶。至於回蹕。則臣愚深以爲不可。臣向奏事。親聞玉音。謂建康若不可立。臨安又豈能保。聖斷如此。但恐羣臣主進者少。主退者多。則陛下不能無惑。更望陛下勿因小害而沮。則中興之功可望。臣蒙起置諫垣。今又列在侍從。乞骸以去。故卒獻此說。惟陛下貸其狂。公輔未幾。以集英殿修撰奉祠而去。時江東宣撫使張俊軍中營寨未辦。執政乞增支錢。上因言財皆出民力。若此之費。實不得已。苟可已者。須極惜之。張俊嘗奏軍中費陛下無限錢。朕卽語之。朕何嘗有一錢與卿。皆百姓膏血也。卿須知百姓膏血不可竭。務與朝廷爲一體。則中興之功不難致矣。

觀文殿大學士萬壽觀使趙鼎至行在。喻樛語錄曰。時樛至北關。見趙鼎首問相公何以處張相。鼎上第恐上意不許。謂論不然耳。其次莫若以宣撫使處之。淮上張相方以近事。不忘補過。緩急必有以報。況失賊之家。方知防賊。兼駐蹕建康。全是張相之謀。相公今日豈應獨任其責也。自來宰相之出門。人鮮有不遭逐。相公包決無此事。但恐言事。官觀望在相公包容之爾。鼎以爲然。鼎卽對於內殿。首論及淮西事。鼎曰。方得報時。臣在遠不得效所見。少補萬分。今固無及。然臣愚慮不在淮西。恐諸將竊議。謂因罷劉光世不當。遂有斯變。自此肆驕。益難號令。朝廷不可自沮。爲人所窺。上以爲然。丙子。以鼎爲左僕射兼樞密使。吏部尙書孫近除龍圖閣直學士。知紹興府。丁丑。上問趙鼎防秋大計。鼎曰。淮西雖空缺。當以壯根本爲先務。又問去留如何。鼎曰。來已失之遽去。不可復爾。今國威少挫。須勉強自振。上以爲然。且曰。初聞淮西之報。未嘗輒動。執政奏事。皆惶懼失措。反以安慰之。鼎曰。正須如此。見諸將尤須安靜。使之罔測。不然。益增其驕蹇之心矣。仍以控制之事專責之二將。曰。光世之兵。本不爲用。我之所賴。惟汝二人。彼必感陛下倚任之重。且不敢以朝廷

爲弱也。前此大臣曾以此啓否。上曰：彼皆倉皇無地措足，何暇及此。趙鼎事實曰：自鼎被召，張浚每以四鼎獨曰：今日復回臨安，四方必謂朝廷但務退縮，無與舉之意。豈知陛下聖算初不如此。今固不可戶曉。唯是他日淮上有警，卻須前進。鼓作諸軍，庶幾進退合宜。上嘉納。於是降旨先發百司，使民間豫知。乃上建康守臣兼行宮留守，示往復兩都居無常之意。蓋自十一月降旨，至明年二月始離江左。期既不迫，上然。下貼。乙酉，交趾郡王李陽煥卒，以印付其長子天祚。既而上遺表及貢方物，詔追封陽煥爲南平王。追封在明年三月。上親書晉羊祜傳，賜樞密使秦檜檜力請刻之石，以頒宰執大將從官。從之。戊子，以淮西制置副使劉錡知廬州，遂召提舉太平觀解潛爲主管步軍司公事。自金主晟既卒，高慶裔伏誅，而尼雅滿繼亡，劉豫已失助矣。至是因酈瓊投彼，豫復遣僞皇太后府參謀馮長寧乞兵於金主亶。且言瓊欲過江自效，請用爲鄉導，乘勢併力南下。時亶已議廢豫，慮其有兵之多，陽許豫行。因遣使馳至東京，以防瓊詐降爲名，立散其衆。先是徽猷閣待制王倫等奉使至睢陽，劉豫授館鴻慶宮，遲之不遣。移文取國書及問所傳何命，倫報豫國書非金主面受不授。若所銜命，卽祈請梓宮是已。彌旬而金迓使至。是月倫渡河，見金左右副元帥達蘭烏珠於涿州。達蘭問倫入境久，願來遲何也。倫具言豫邀索國書，因曰：齊豫營私，民皆嗟怨，且其心忍負本朝厚恩，使得志能保其不背上國乎。達蘭曰：我委劉齊於宋，度能制其死命乎。倫曰：吾君神武，劉齊犯天下不義，以順討逆，掃除何難也。

中興小紀卷二十三

紹興七年冬十月中丞周祕殿中侍御史石公揆右正言李誼論張浚不已丙申夜御批浚謫散官安置
 嶺表趙鼎雜記曰是月初鼎奏欲降一詔以安淮西軍民上曰當以罪己之意播告天下俟行遣張浚了
 爲相也功過自不相掩十月七日夜內降周祕等彈章後批浚授散官安置嶺表中書舊制凡御批即時
 行出至是鼎封起未即行明日鼎奏曰前日趙令裕之言外頗傳播以謂浚之出皆諸將之意今又如此
 行外間益疑矣上曰若宰相出入由於諸將即唐末五代之風今幸未至此鼎曰今諸將之意今又如此
 亦少快諸將之意矣上曰宰相出入由於諸將即唐末五代之風今幸未至此鼎曰今諸將之意今又如此
 至漏舍約諸人救解至楊前二參泛爲言秦檜曰前日御批張浚謫散官安置嶺表雖非諸將之言
 不答鼎開陳至數百言上意殊未回鼎泛爲言秦檜曰前日御批張浚謫散官安置嶺表雖非諸將之言
 母爲死罪乎上猶未解鼎又曰殊未回鼎泛爲言秦檜曰前日御批張浚謫散官安置嶺表雖非諸將之言
 曰凌之罪不過策耳凡入計慮豈不欲萬全倘因其一失便真之乃曰來日再將上商量鼎又留身再懇
 事利害自關朝廷非獨私凌也上意遂令分司居永州也見鼎躡蹻退縮鼎慰之曰鼎不負德遠德遠
 勾龍如淵馮康國及上憐德遠母老有復淵起居郎康國右司郎官機太常少卿如淵報上意三人退鼎又
 目鼎三人愧謝鼎曰上憐德遠母老有復淵起居郎康國右司郎官機太常少卿如淵報上意三人退鼎又
 縉求外補除直祕閣遠溫州於是石公揆言縉懷竊願上直禁宮自有日課早朝退即閱章疏食後學
 望且有後圖望職還之銓曹丁酉詔落職與宮觀願上直禁宮自有日課早朝退即閱章疏食後學
 書未後讀春秋史記晚食閱內外奏牘夜讀尚書率以二鼓罷是日因前給事中胡安國乞宮祠左僕射
 趙鼎言安國昨進春秋解必經聖覽上曰安國所解朕置之座右朕喜春秋之學率二十四日讀一過鼎
 曰陛下聖學如此今雖寒士亦鮮能之非異代帝王所及戊戌張浚責授祕書少監分司南京永州居
 住都官郎中馮康國求去庚子趙鼎言自張浚之罷蜀士多不自安今留者十數人皆一時選臣恐臺

諫或以浚里黨論之。望陛下垂察。上曰。朝廷用人。正當論才不才。頃臺諫好以朋黨罪之。如罷一相。則凡所薦不問才否。一時俱黜。此乃朝廷使之爲朋黨。非所以惜人才厚風俗也。鼎曰。陛下聖慮如此。羣臣敢不自竭。御史中丞周祕累乞外任。辛丑。除徽猷閣直學士。知秀州。先是淮東宣撫使韓世忠圖上淮東形勢。云賊於彼築堡。欲遣偏師平之。使其屬官溫濟諗於朝。上戒濟曰。歸語汝帥。當出萬全。不宜輕動。以貽後悔。濟旣稟命。復要他日將士之賞。上曰。有功則當賞。但須覈實。然後有功者勸。世忠旣以狀來上。朝廷不欲違。如去年攻淮陽。賞一萬七千餘人。人不以爲當。濟悚然懼。奉詔而退。癸卯。左僕射趙鼎奏。濟已行。上曰。昨呼來。略戒之矣。權主管殿前司楊沂中。乞以諸路所起弓弩手。揀刺上四軍。辛亥。趙鼎因論及南兵可教。參知政事張守曰。止是格尺不及耳。上曰。人猶馬也。馬之能行不在大。故兵無南北。顧所以用之如何耳。自春秋時。申公巫臣通吳於上國。遂霸諸侯。項羽以江東子弟八千。橫行天下。以至周瑜之敗曹操。謝元之破苻堅。皆南兵也。趙鼎言。士人有不可爲郡守而必欲得之者。往往不肯就宮祠。上曰。爾則不肯。其如一方赤子何。鼎退而歎曰。大哉帝王之言也。時有進士劉瑜。上書乙卯。上謂宰執曰。瑜論十事。皆民間疾苦。可擇而行之。趙鼎曰。所論皆善。然法已具。但當申嚴。上曰。申嚴未必濟事。須去其不便於民者爲善。如向來浙右。困於水腳錢。後造成綱船。遂免此患。右正言李誼奏。昨扈從臣寮不多。止令輪對一次。今已輪徧數月矣。望準建隆故事。日輪二員。俟百官俱集。則依舊例。丁巳。詔遇六參。日輪一員。時趙鼎再相。已逾月未見所施。朝士或以此責之。鼎曰。今日事如久病虛弱之人。再有所傷。元

氣必耗。惟當靜以鎮之。若大作措置。煥然一新。此速死之術也。張德遠非不欲有爲。而其效如此。亦足以爲戒矣。詔徽猷閣待制提舉太平觀常同爲禮部侍郎。時趙鼎所薦者。皆以次用之。閏十月庚申。資政殿學士王綯卒於平江府。先是詔知廣州連南夫。條市舶之弊。辛酉。南夫言市舶司惟藉蕃商往來貿易。大商蒲亞里者。昨至廣州。有武臣曹訥利其財。以女適之。亞里遂留不歸。上因令南夫勸其歸國。運蕃貨往來。上曰。市舶之利最厚。若措置合宜。所得動以萬計。豈不勝取之於民。朕以留意於此。庶幾可以少寬民力耳。癸亥。上曰。朕每論將帥。須責其挽弓騎馬。人未知朕意。必謂古有文能附衆。武能威敵。不在弓馬之間。抑不知不能弓馬。何以親臨行陣。而率三軍使之赴難。況今時艱。將帥宜先士卒。此朕之深意也。上數令江東宣撫使張俊。盡以舟師分布控扼。然後引兵渡江。左僕射趙鼎曰。淮西寂然無警。似不必爾。外間便謂朝廷棄淮西矣。當一向勿顧。不發一兵。彼未必敢動。上以爲然。趙鼎事實曰。初劉豫軍西一帶。無軍馬。朝論紛紛。臺諫交章。以爲淮西無備。可憂。鼎獨顯言於衆曰。今行朝握精兵十餘萬。使敵騎直臨江岸。吾無所懼。唯是安靜不動。使人罔測。渠未必輒敢窺伺。何至自擾。擾如此。倘有他虞。吾當身任其責。俊軍久在泗上。勞役良苦。還未閱月。居處種種未定。乃遣使之復出。不保其無潰亂也。鼎欲使俊出不意。徑趨壽春。取其城。措置已定。會金人廢豫。乃已。淮上卒不遣兵。竟以無事。上御諸將。凡事皆留意。而聖意無彼此輕重。時殿前楊沂中乞三綱馬。丙寅。上謂宰執曰。川廣馬到。朕未嘗留悉。均給諸將。若小不均。卽謂朕有偏矣。沂中馬少。而張俊近以老馬數百匹納樞密院。遂以兩綱付沂中。一綱付浚。己卯。龍圖閣學士知處州劉大中爲禮部尙書。庚辰。趙鼎奏淮東安撫使韓世忠保明統制官許世安功賞事。上曰。世安勇雖不如呼延通。而曉事過之。居平議論。多有補於世忠。時通亦隸世忠軍。

上駕馭諸將。至於偏裨。亦知其材之所長。蓋照臨無遺如此。戶部尙書章誼言。自權貨務。復置提舉官。見係臣獨領。緣無同官商議。竊恐誤事。望仍隸戶部。壬午。詔從之。時權貨務。賣度牒。而遠方不能就買。宰執欲付之諸路。上曰。如此則州縣將苛於民矣。趙鼎等曰。不限以數。則無此弊。上曰。宜嚴爲約束。毋使民受患。初。江西大旱。而觀文殿大學士知洪州李綱。乃課民修城。一方頗怨。至是。侍御史石公揆言。綱妄自尊大。恣爲苛擾。初。張浚謫居於福。綱與之交驩。意其復用。以爲己援。近乃遣書痛詆。傳至行在。欲以取譽。復冀相位。繼知已用趙鼎。其意大沮。又稱感時憂憤成疾。聞者笑之。又殿中侍御史金安節。左右正言辛次膺。李誼。亦論綱違法虐民。毒流一路。乞再詔綱提舉洞霄宮。旣而公揆等再論。乞鐫職。上曰。前宰執朕所禮貌。已罷帥足矣。趙鼎等曰。陛下遇臣如此。誰敢不竭心圖報。安節。歛縣人。次膺。掖縣人也。是日。宰執奏復置川陝茶馬官。舊有主管。有同提舉。有都大提舉。凡三等。上曰。此轉運副使判官之比。當擇人考其資歷。而命之。茶本以博馬。而近乃易珠玉紅髮之類。須禁止之。趙鼎奏來春去留之計。望更留聖慮。恐回蹕之後。中外謂朝廷無意恢復。上曰。張浚措置三年。竭民力。耗國用。何嘗得尺寸之地。而壞事多矣。此等議論。不足恤也。趙鼎因奏事。論及修神宗實錄。上曰。止修訛謬。非有所改也。鼎曰。所降御筆如此。上曰。乃宰相議定者。鼎曰。起居注載著作郎張嶠所得聖語亦然。上駭曰。安得有此。卽詔嶠所記勿存。留鼎乃知是事。本非上意。鼎言何掄本與祕閣修撰曾統所進本小異。掄乃蜀本有朱字處。統本卻無之。自合重修。其李彌正。胡聖。不應引嫌避史職。令依舊兼之。上曰。未勾去者。大宄。鼎曰。此乃美事。蔡卞輩不

學故不知去取。如吳圭傳載有曰：臣願陛下爲堯舜主，不願爲唐德宗。卞乃刪去。臣謂主聖則臣直，載之乃見神宗之聖也。使魏徵、王珪傳不載其直言，則後世不知太宗納諫也。上曰：然。鼎又曰：臣自去國半載，今觀聖意稍異前日。上曰：尋常造膝，每以孝悌之說相搖撼，其實紹述之謀也。鼎曰：莫有正論否。上曰：無之。自卿去，惟朱震不改其舊。鼎曰：臣觀持中論者皆惑聖聽，乃是沮善之術，故以爲不可太分。當兼收而用，則得人之路廣。臣謂君子小人並進，何以爲治。與其多得小人，寧若少得君子之爲愈也。蓋分善惡，惟恐不嚴，稍寬則落其姦，便君子於小人常恕，小人於君子不恕也。上復以爲然。是月，工部尙書李彌大出爲廣西安撫使。初，淮西軍中諸使臣爲酈瓊劫去，至是復歸者甚衆，有司以文券不明，例降所給。趙鼎與執政議不合，乃密白於上曰：此曹去僞歸正，當優假之。今乃降其所請，反使悽悽有不足之歎。上卽批出，各還其本。於是人心忻然，來者相繼。劉豫不得而防之也。江東宣撫使張俊引兵還建康府。十一月丙午，俊入對，因言劉光世解軍政，閑居自適，有登仙之歎，上不樂，因諭之曰：卿初見朕時，何官。曰：脩武郎。是時贊如何。曰：貧甚。嘗從陛下求戰袍以禦寒。上曰：今日貴極富溢，何所自耶。曰：皆陛下所賜。上曰：卿旣知此，宜思自效，而有羨於光世何耶。俊惶懼頓首。至於流涕，誓死以報。乙未，宰執奏事，上以此語之。趙鼎等曰：陛下御將之道，可謂盡矣。丁酉，宰執奏臨安府火禁，放火者行軍法，遣火延燒數多者亦如之。上曰：放火遣火，豈可同罪。大凡立法太重，往往不能行。趙鼎曰：遣火延燒者，取旨可也。上曰：止於徒足矣。庶可以必行。兼刑罰太重，非朝廷美事。先是川陝宣撫使吳玠遣使臣呂政來求軍中犒賞，上諭政曰：

歸語吳玠。自小官拔擢至此。皆出於朕。非緣張浚也。大丈夫當自結主知。何必附託人以進。朕已撥一百五十萬緡。非因浚進。退有所厚薄也。他所闕可具奏。朕一一應副。又諭以川茶自來博馬。今聞盡易珠玉紅髮無用之物。政曰。吳玠則不敢。諸將恐或有之。上令博馬外不可別易一物。是日上語宰執。以此趙鼎等曰。玠聞聖訓。不惟感激眷遇。亦仰服聖德矣。壬寅。上謂宰執曰。張俊臨事不易得。獨好營土木。朕數鑄諭。莫能改也。比因入對。而諭以建康行宮。皆因張浚所修。寢殿之後。雖庖溷皆無。朕不免葺數間爲居。當與卿觀之。初不施丹雘。俊曰。略加雅飾。不過三二千緡。朕諭以財方艱窘。不忍三二千緡。以崇土木之飾。俊感歎而去。有使臣李發者。齎到奉使朱弁書。報金國尼雅滿等相繼而死。樞密使秦檜曰。金國多事。勢須有變。上曰。金人暴虐。不亡何待。秦檜曰。陛下但積德中興。固自有時。上曰。此固有時。亦須有所施爲。然後可以得志。金主亶欲廢劉豫久矣。至是金尙書省劾豫治國無狀。亶詔左右副元帥達蘭、烏珠提兵以寇江爲名。徑之東京廢豫。而豫方請兵入寇。金示以難色。而豫請愈堅。金若不得已而應者。乃令先調發山東兵會於淮上。約其子麟。以二百騎至濬滑間。卽爲金所擒。二帥徑引從騎入東華門。逼豫入見。達蘭以鞭壓命羸馬載之而去。囚於金明池。廢爲蜀王。時豫弟益守陝西。又別遣左監軍薩里罕提兵。聲言攻蜀。卽長安擒益。其廢豫之詔。略曰。建爾一邦。逮今八稔。尙勤吾戍。何以爲國。豫旣廢。達蘭逼其北行。至上京。給舊夫子廟以居之。張浚行述曰。浚嘗遣人齎手榜入僞地。誘劉豫。略曰。如能誘至金人。使之榜以疑豫。八月。豫聞王師北向。遣韓元英告金乞兵。同舉金謂豫終欲困己。益疑之。會劉瓛叛去。浚復多遣間持蠟書入僞地。故遺之。大抵謂豫已相結約。故遺瓛等降。而豫再乞兵於金。十月。金副元帥烏珠徑

領兵來廢豫。惜其有此機會而浚已去位矣。

豫初僭立。作楮幣。自一貫至百貫。皆識其末。曰。過八年不在行用。蓋其數已兆

矣。金遂於汴京建行臺尙書省。以張孝純、蕭三寶弩原作蕭三寶。今改正。爲左右丞相。張通古爲左丞。又恐汴人不安。曰。汝舊主人少帝在此。於是民心稍定。而北軍亦不敢擾民。豫之廢也。汴京有錢九千八百餘萬緡。絹二百七十餘萬匹。金一百二十餘萬兩。銀一千六百餘萬兩。糧九十萬石。而方物不在此數。初。達蘭久居山東。回易屯田。徧於諸郡。每認山東以爲己有。其立豫也。深有悔割山東之意。故達蘭屢畫山東河北圖。獻議於故主晟。曰。膏腴之地。鹽鐵桑麻所出。盡在舊河以南。我初與議。以河爲界耳。今新河且非我決。彼自決之。以與我。豈可棄之。當以新河爲界。晟不從。及達蘭專權。遂議取山東。諸將曰。獨取山東。恐驚豫之心。不若廢豫以取之。豫之廢也。不惟結怨於諸帥。亦以山東爲累耳。初。薩里罕在雲中。嘗因軍事。召知府州。折可求至。密諭以將廢豫而立可求之意。至是。達蘭之意。欲割河南以歸本朝。薩里罕恐可求失望。生變。罪歸於己。一日。燕可求而真壽。可求食之。既去。卒於路。初。宣和間。進士王問。進書萬卷。補承務郎。上卽位。有越州布衣諸葛行仁。亦因進書得迪功郎。至是。吏部以爲不倫。追問兩官訴之。詔與改正。中書舍人李彌遜。以爲不當改正。丙午。上謂宰執曰。求遺書自美事。朕方多難之時。故行仁之賞薄。宣和承平。留意墳典。授京秩不爲過。然既有論駁。可鐫一官。十二月己巳。詔淮東宣撫使韓世忠。移司鎮江府。仍留兵守楚州。樞密使秦檜曰。老小旣得所。萬一有警。諸帥當盡力捍寇。上曰。朕竭民膏血以養之。緩急豈容不盡力。正使無內顧之憂也。於是世忠奏乞留全軍於楚。以蔽江淮。從之。先是紹興初。劉大中宣諭

江南薦臨川布衣鄧名世召對。賜出身。除刪定官。是月以名世爲校書郎。禮部侍郎常同請令大臣屏去細務。專意帷幄之謀。責任六曹。隨事裁決。凡禮文及法令。悉令裁定。以趣簡便。乙亥。上謂宰執曰。聞三省文書極繁。卿等省閱。日不暇給。皆由六部官不任責。事事申明故也。豈有爲尙書不能任一部之事。朕若擢爲執政。便可裁天下之務。昨常同亦奏此事。陳與義曰。今日事比承平時極多。趙鼎曰。承平時朝廷尊嚴。上下有分。昨一小使臣馬前喧呼。臣恐其訴冤。乃求差遣耳。政由臣等不才。致朝廷之勢陵夷。上曰。此須與行遣。天下事賞罰而已。若有罪不罰。漸成姑息之風。誠爲不便。劉豫旣廢。金國左副大帥達蘭送王倫等回。謂曰。好報江南。旣道途無梗。和議自此平達。至是倫還。丙子。泗州奏至上。鑿謂趙鼎等曰。朕以皇太后未還。夙夜憂懼。未嘗去心。若金人能從朕所求。其餘一切非較也。鼎等曰。仰見陛下孝心。焦勞。上曰。國家但能自治以承天心。豈無復振之日。癸未。倫等還。上錫予特異。丁亥。以倫爲徽猷閣直學士。樞密都承旨。充迎奉梓宮使。借拱衛大夫高公繪副之。知泗州劉綱。乞調滁州。千夫修城。有旨從之。言者以爲非是。甲申。上謂宰執曰。百姓誠不可勞。但邊城利害至重。天下之事。亦權輕重而爲之。朕愛民力。一毫不敢動。惟此役不得已也。趙鼎曰。昨得旨。已令優給錢米矣。是月。以禮部侍郎常同爲御史中丞。

劉豫之將有宋超者。帶兵千餘。詣知廬州劉錡。降詔。錡帶兵入奏事處。超等旣定。錡復還合肥。趙鼎事既廢。鼎密遣諜者散之。沿淮一帶。誘其守將。由是壽寧。陳。蔡。諸郡。率其部曲來歸者。相繼不絕。兩月間。得精兵萬餘。西馬數千。朝士相謂曰。前日大作措置。未進一步。潰亡者五六萬衆。今不動聲色。自致士馬如許。盛可謂過人矣。時徽宗小祥近。且逾七月之期。而迎請梓宮使者未有來耗。禮官謂不可久停常祀。於是綿

蕝其儀。返虞祔廟。以左僕射趙鼎爲禮儀使。金主亶以皇伯領三省事。宋國王宗磐乃先主晟之長子。豪猾難馭。而東京留守堯王宗雋。案繫年要錄作宗雋卽亶親叔。且素有才望。乃除太保領三省事以制之。初。金有國。自旻晟以來。雖名爲帝。而與其下無尊卑之別。其主所獨享者。惟一殿曰乾元。四隅栽柳。作禁園。邊壁皆設大坑。時與諸臣雜坐於坑。后妃躬持飲食。自亶初時。詞臣韓昉已教之學。稍能賦詩。染翰。旣卽位。左右儒士日進。諂導以宮室之壯。侍衛之嚴。出則清道警蹕。入則端居九重。視舊功大臣如草芥。非時且莫得見。盡失女真之故態。至是宗雋入相。顧與宗磐等合謀而亂作矣。

中興小紀卷二十四

紹興八年。歲在戊午。春正月。言者請今後從官作守。不許衝見任人。壬辰。宰執奏事。趙鼎曰。祖宗以來。侍從官如此。上曰。若遇從官無異庶官。遇宰執無異從官。則非朝廷之體。陳與義曰。人臣何有重輕。但堂陛之勢。不得不存。秦檜曰。嚴堂陛。乃所以尊朝廷也。奉使王倫之還也。言金人廢劉豫之謀。自己使人發之。癸巳。起居舍人勾龍如淵言。倫迎梓宮。問諱。日使指也。梓宮未還。諱日猶祕。而一言之合。遂使廢豫。此其可信哉。上曰。不然。倫奉使時。朕嘗以此意諭之。渠果能游說。亦未可知。如淵曰。此固臣之所不知。如淵導江人也。參知政事張守。乃張浚所引。浚罷相。人知守必去。時已議還都臨安。守力請且留建康。以爲遠圖。議不合。戊戌。以資政殿學士知婺州。趙鼎事實曰。張浚永州之命既下。張守。陳與義。乞罷。上皆許其去。秦日告上求解職務。上曰。趙某與卿相知。可以少安。檜相公如此。更不敢言去。二參在坐。聞之極不憚。二人既銜怨而去。其後秦檜獨相。鼎亦不免。辛丑。詔復幸浙西。初龍圖閣直學士汪藻罷知撫州。奉祠而去。翰林侍讀學士范冲言。日曆國之大典。比詔藻纂集未成而中止。恐積久散逸。後人益難措手。今藻就間。願詔令勿輟。俾三朝文物。著在方策。非小補也。詔許藻辟官屬二員。且賜史館修撰餐錢。力辭不受。至是藻又進政和三年以後詔旨未成者。乞從史館論譏。癸丑。藻仍就纂集。先是以歸朝官馬欽。人馬隸張俊軍。旣而親筆欽差江南鈐轄。俊堅欲留之。不遣。乙卯。樞密院奏趣欽赴任。上曰。昨俊入見。朕嘗諭之。聞馬欽於卿素懷不足。卿必欲留之軍中。萬一欽病死。人必謂卿殺於

卿亦便乎。俊悚然謝曰：臣慮不及此，不敢復留欵矣。上平日訓諭將帥，皆切於理，使其利害曉然於胸中，可謂盡駕馭之道也。是月，四川謀帥上問刑部侍郎胡交修，廷臣孰可將者。交修曰：臣從子世將可用。時世將爲兵部侍郎兼直學士院，遂除樞密直學士。四川安撫制置使兼知成都府、自重兵聚關外以守蜀，而餉道險阻，漕舟出嘉陵江，春夏漲而多覆，秋冬涸而多膠。紹興初，玠行陸運，調成都潼川利州三路夫十萬，縣官部送，徼賞爭先，倍道而馳，晝夜不息，十斃三四。至是，交修言養兵所以保蜀也，民不堪命，則腹心先潰，尙何保蜀之云。臣愚欲三月以後，九月以前，第存守關正兵，餘悉就糧他州，如此則給守關者水運有餘，分戍者陸運可免。上乃命學士院述交修意，詔宣撫使吳玠行之。既而世將至蜀，玠以軍無見糧，奏請踵至。世將被旨，約玠於利州會議。異時制置使以文臣多事邊幅，而玠起行伍，不十年爲宣撫，故莫肯相下，誠意不通。初，水運泝江千餘里，半年始達，率以七十五斛而致一斛。至是，世將與玠反覆共論，玠亦曉然知利害所在，乃復前大帥席益轉般摺運之法，軍儲少充，公私爲便。金主亶肆赦，改元天眷。時左右副元帥達蘭、烏珠、左都監托卜嘉，並在汴京。左監軍薩里罕居長安，右都監巴克實原作拔束，今改正居鳳翔。旣而達蘭歸祈州，薩里罕歸雲中，而烏珠、托卜嘉、巴克實皆留如舊。先是，左僕射趙鼎以徽猷閣直學士王庶爲知兵，召歸除兵部侍郎。二月丁巳朔，遷庶爲尙書。癸亥，上發建康府，至東陽鎮行宮，幸執奏事。上曰：昨日六宮旣發，張俊來奏事，朕召至宮中，與論邊事，因戒之曰：朕來日東去，卿在此，無與民爭利，無興土木之功。俊悚懼承命，見地無甑面，再三嘆息。朕諭之曰：艱難之際，一切從儉，庶幾少紓民力。

朕爲人主。雖以金玉爲飾。亦無不可。若爾非特一時士大夫之論。不以爲然。後世以朕爲何如主也。先是上將回鑾。詔知建康府張澄陞職。改知臨安府。澄受命星馳而至。不數日。前所缺者率皆辦焉。中丞常同奏吳玠頃行屯田。常得褒詔。願問玠近來積穀幾何。減餉幾何。趙開李迨相繼爲都漕。先後運至幾何。各令條上。然後案實講究。以紓民力。從之。戊寅。上至臨安府駐蹕。三月庚寅。台州有匿名書。稱長平主管官李椿年刻薄。欲率衆作過。言頗不遜。壬辰。上謂宰執曰。兵興以來。官物皆陷失。旣差官檢察。若稍留心。便生誣毀。此必州縣吏所爲。萬一作過。當遣官勦殺。於是趙鼎以下退而服上之英明。以樞密使秦檜爲右僕射平章事兼樞密使。時朝士皆相慶。惟吏侍郎晏敦復有憂色。或謂敦復曰。檜之作相。天下之福。公獨不悅何耶。敦復曰。姦人相矣。時刪定官都陽方疇。聞是語。其後以告給事中張致遠。吏部侍郎魏玘而二人亦以敦復之言爲過也。趙鼎事實曰。一日鼎留身奏事。上曰。堂中必無異議者。又曰。秦檜自有闕。是日遂鎖院。檜再相。上旣與議。久在樞府。莫懷怨望。否。鼎曰。檜大臣必不爾然。用之在陛下耳。況過然後相。檜是以鼎未敢違爲去就。參知政事陳與義乃張浚所引。以久病乞退。甲午。爲資政殿學士。知湖州。起居舍人勾龍如淵言。戶部非擘劃財賦之地。宜置一使以總諸路漕臣。蓋諸路權輕勢分。

但見一路利害。若一使總之。則可通有無。審虛實。爲朝廷久長之計。又言。此事當以戶部長貳判諸道水陸度支轉運等使爲名。如蘇如洪。可以置司。若以外官爲之。則事必掣肘。不能久矣。上然之。壬寅。工部侍郎趙霈。不爲趙鼎所知。是月。以徽猷閣直學士出知袁州。以兩浙都轉運使徽猷閣待制向子諲爲戶部侍郎。子諲言。安邊固圉。必資儲蓄。江西宜於洪州置糴。於江州置轉般倉。以給淮西。湖南於潭州置

繕於鄂州置轉般倉以給襄陽湖北於鼎州淮西於廬州淮東於眞州仍多造船則遣戍出兵往無不利。又言今天下急務在考兵籍究戶版汰老弱升勇健創簿正言使諸州上帳於兵部諸將上帳於樞密府。著鄉貫書事藝季申歲考所以除詐冒也。凡詭名挾戶典買推收進丁退老分烟析產田畝升降貨殖盈虛必以時覈實所以革欺弊也。此其大略耳推而行之則在乎人焉。金人又於燕京建行臺尙書省改燕山樞密院爲之以三司使杜充僉書省事先是金人主計之任在燕山曰三司在雲中曰轉運在京中曰度中在上京曰鹽鐵在東京曰戶部時充在燕京就任之也。是春金左右副元帥達蘭烏珠皆在祈州奉使王倫行至祈見二帥時韓世忠岳飛吳玠軍各遣間招誘中原民金得其蠟彈旗榜出以詰倫曰議和之使來而暗遣諜如此君相給且不測進兵也。倫言所議靖民乃主上誠意邊臣見久而無成或乘時希尺寸爲己勞則不可保主上決不之知若上國孚其誠意確許之平則朝廷一言戒之誰敢爾者二帥相視無語。夏人乘金人有折可求之喪攻府州奪之可求子彥文攜其家走河東其後金令彥文知代州。夏四月上旋蹕臨安中丞常同言今去淮益遠邊民多不安宜遣重臣出按兩淮有荒田縱民耕勿收租數年之後粒米狼戾百姓足而國用足矣。又言江浙民困於月椿幾不聊生上憮然遂減月椿數千緡至是詔遣樞密副使王庶視師淮上調諸路兵預爲防秋計且以同奏付庶行之自酈瓊叛諸將稍肆庶條上請臨發犒軍於都教場庶便服坐壇自三衙大將而下雖身任使相悉以戎服步由轅門庭趨受命拜賜而出蓋自多事以來未嘗行也。時主管殿前司楊沂中怒其統制官吳錫收繫之獄戶部侍郎

向子諲力言於庶謂錫可用。庶奏釋之。使統兵屯淮西。丙寅。庶辭上。因論王霸之道不可兼行。當以三王爲法。今之諸將不能恢復疆宇。他日朕須親行。不殺一人。庶幾天下定矣。祕書少監尹焯於經筵留身。乞致仕甚力。上許除內祠。癸酉。上語宰執曰。焯云士大夫不知進退。安用所學。劉大中曰。焯學有淵源。且老成。若得之。亦是朝廷氣象。趙鼎退至閣子。誦杜甫詩。文物多師古。朝廷半老儒之句。秦檜曰。老成人重於典刑。劉大中曰。蔡京惟用少年。所以誤國。可爲戒也。戶部侍郎李彌遜言。祖宗之法。有可行於今者。發運一司是也。大概權六路。豐凶以行。平糴之故。然今比昔少異。當師其意。損益行之。臣謂宜復此司。別給糴本數百萬緡。俾廣儲以待恢復之用。數年必見其效。丁丑。詔從之。王庶奏辟屬官。戊寅。上謂宰執曰。昨王庶辭。朕諭之云。張浚待諸將以狎昵。取侮。呂祉以傲肆取敗。皆可爲戒。劉大中曰。庶到堂亦誦陛下之言。深佩聖訓。初。胡寅自中書舍人出知嚴州。其父徽猷閣待制安國。以書諭之曰。汝在桐江一年矣。大凡從官當郡。經年未遷。卽有怠意。汝今宜作三年計。日勤一日。思遠大之業。若有遷擢。自是朝廷非我所覬也。旣而移守永州。未上。至是。詔寅除禮部侍郎。尋丁憂去。朱勝非聞居錄曰。胡寅者。兇惡躁進之

事乖謬。衆論不容。乃稱父安國老病。遠在湖湘。乞歸省。於是差知永州。寅攜妾居。久之不去。有朝士范伯奮亦寓。貽書責之。寅以妾就學爲辭。伯奮復曰。妾產與父病。執重。寅訴於鼎。改知嚴州。鼎旋罷。累月復相。欲召寅。議者以不省父止之。復除永守。星夜南奔。未及到家。召命已下。比見其父。疾困不能言。寅留數日。將行。告之安國。攬衣垂涕而已。寅至行朝。除禮部侍郎。又兼經筵。又直學士院。尙未踰月。安國果凶問至。寅匿之。伴爲父書。與交黨翰林學士朱震言。久疾垂死。寅尙猶在路耳。五月。戊子。監察御史張戒入

對。因言諸將權太重。上曰。若言跋扈。則無迹。兵雖多。然聚則強。分則弱。雖欲分未可也。戒曰。去歲罷劉光

世以致淮西之變。今雖有善爲計者。陛下必不信。然要須有術。上曰。朕今有術。惟撫循偏裨耳。戒曰。陛下得之矣。得偏裨心。則大將之勢分。上曰。一二年間自可了。戒曰。陛下既留意。臣言贅矣。張戒默記曰。初淮西之變。時祕書省在臨安。一日校書郎范如圭謂戒曰。諸大將不可制耶。戒曰。此自張丞相之失。且劉光世一軍偏裨無慮十數。不知此曹果欲大將壓已否。若使各得自達。豈復思光世如圭曰。善。是秋戒新除福建提舉官。待次嚴陵。待制常同因過戒。問曰。諸將權太重。張丞相既失。今當何以處之。戒曰。茲甚不難。但當擢偏裨耳。吳玠既失。而曲端受死。楊沂中建節。而張俊勢分。自然之理也。同大喜曰。此論可行。既而同被召首薦戒焉。

初。徽猷閣直學士王倫奉使金國。見左副元帥達蘭。乃命逆使偕倫至北地。見其主亶。倫首謝廢劉豫方致上旨。金主始密與羣臣定議許和。至是遣倫與副使高公繪等還。又遣福州觀察太原少尹烏陵阿思謀。太常少卿石慶元與倫等偕來。思謀者。乃金人始與吾通好海上所遣之人。今再來。示有復和之意。丁未。詔吏部郎官范同帶御器械劉光遠。接伴之。同江寧人。光遠。光世弟也。樞密副使王庶措置江淮。遂移張俊下張宗顏將七千人軍淮西。巨師古將三千人屯太平洲。張戒默記曰。戊午夏。王庶視師淮上。宜撫使張俊特不悅。大理寺丞劉時者。秦人。庶辟以行。俊飲之。醉曰。鄉人能爲我言於子。尙否。易置偏裨。似未宜遽先處已可也。不知身在朝廷之上。得幾日。其已安乎。庶聞之。復曰。爲我言於張。七不論安與未安。但一日行一日事耳。分韓世忠二軍屯天長泗洲。使緩急互爲聲援。以劉錡軍鎮江。爲江左根本。至是庶條上江淮事。上曰。淮南利源甚博。平時一路上供內藏細絹九十餘萬。其他可知。參知政事劉大中曰。淮南桑麻之富。不減京東。而魚鹽之利。他處莫比。上曰。以此淮甸不可不葺也。時金使入界。上謂宰執曰。館待之禮宜稍厚。若早遂休兵。免令赤子肝腦塗地。此朕之本意也。趙鼎曰。用兵所費。比之館待殊不侔矣。上曰。若無軍旅之事。使朕專意保民。十餘年間。豈不見效。鼎同秦檜對曰。陛下此言。神明感格。必

有平定之期矣。詔徽猷閣直學士王倫就爲館伴使。倫辭。乃以命太常少卿吳表臣。而令倫往來就館。

議事。倫奏金使烏陵阿思謀元在海上結約。與馬擴相熟。乞召擴赴行在。擴時知鼎州。乃趣召之。中丞

常同論新知蘄州錢觀復。除郎不當。案繫年要錄六月己卯御史中丞常同論新知蘄州李

以予人。雖蔡京王黼不至是也。趙鼎因造膝具言。觀復無過。且求去。上曰。卿不須爾。言官易得。宰相難求。

時同之眷已衰矣。六月乙卯。試博學宏詞科。選人玉山詹叔義。金華陳岩肖。麗水王大方。中選。詔叔義

大方並與堂除。岩肖賜出身。先是故知閣門事潘永思家。以財興訟。御史臺牒送大理寺。旣而有旨放

出。於是中丞常同言。事干內侍梁珂。乞仍付寺結案。上卽依同奏。趙鼎曰。臨安府自不相妨。參知政事劉

大中曰。陛下初不欲繫無辜。今因臺臣所論而從其請。仰見陛下未嘗容心上。曰。朕亦何心。丁巳。臨安府

勸到永思幹人郭壽之。用過錢三千緡。餘七人各認一二千緡。上曰。旣無文約。必是壽之妄攤。可除壽之

外餘並免。於是鼎以下退而讚上之明。上曰。此一事朕疎決多矣。蓋時盛暑。方涓日疎決。故鼎有是言也。

重修哲宗實錄書成。癸亥。監修國史趙鼎上之。旣而鼎因辭免轉官。奏曰。昨日伏讀詔語。載修書本末

甚明。上曰。乃朕批諭開。令具述宣仁保祐之功。蓋欲士大夫知朕修書之意也。先是故相曾布之孫惇

上布所著三朝正論。有旨惇增秩賜金。言者謂布爲王安石腹心。朝廷頒其書。號曰正論。臣竊惑焉。願明

諭史官筆削之際。無惑其說。乙丑。詔付史館。知舉翰林學士朱震。上合格進士黃公度等。上以亮陰。依

祖宗故事。更不臨軒策試。壬申。乃御射殿引見。參以四川類試人。遂賜公度以下二百九十五人及第出

身震出院而病。同知舉給事中張致遠起居舍人勾龍如淵入對。上問考試事。如淵曰：大抵所取皆當。惟第二人陳俊卿賦自落卷中得之。上曰：何故如此相遠？如淵以其詞工而晦。細閱方見工處。上然之。公度俊卿皆莆田人也。癸酉樞密院編諸班直諸軍及親從親事官轉員格成。接伴官范同申金使已到常州。上謂宰執曰：昨日王倫對云：命使烏陵阿思謀說國書中須是再三言武元帝與上皇通好事。庶得國中感動。朕因記當時如尼雅滿不肯交燕雲。皆用欲兵。惟武元帝以謂我與大宋海上信誓已定。不可失約。待我死後。由汝輩卒如約。以此知創業之人設心積慮。必有過人者。丁丑思謀等見執禮甚恭。且欲以客禮到都堂。見宰執趙鼎抑之。如見從官之禮。時上因事撫循。莫不中節。遠人歸心焉。於是留月餘。乃去。戊寅上愀然謂宰執曰：先帝梓宮果有還期。雖待三二年尙庶幾。惟是太后春秋已高。朕曉夜思念。欲早相見。所以不憚屈己講和。秦檜曰：陛下不憚屈己講和。案原鈔本無秦檜以下十一字。誤脫。今據繫年要錄增入。此人君之孝也。羣臣見人主卑屈。懷憤憤之心。此人臣之忠也。君臣用心兩得之矣。上曰：雖然。有備無患。縱使和議已成。亦不可弛兵備。趙鼎曰：假使金人與我河南地。亦須嚴備江南。劉大中曰：和與戰守自不相妨。若專事和而忘戰守。則墜敵計中矣。趙鼎事實曰：初行朝聞烏陵阿思謀之來。物議大訕。羣臣登對。率以不可深信。爲言上意堅甚。往往峻拒之。或至震怒。鼎因請問密啓。上曰：陛下與金人有不共戴天之讎。今乃屈體請和。誠非美事。然陛下不憚爲之者。凡以梓宮及母兄耳。羣臣憤懣之詞。出於愛君。非有他意。不必以爲深罪。陛下但好謂之曰：講和誠非美事。以梓宮及母兄之故。不得已而爲之。議者不過以金人不測。不可深信。但得梓宮及母兄今日還闕。明日渝盟。吾所得多矣。此意不在講和也。羣臣以陛下孝誠如此。必能相諒。上以爲然。羣議遂息。翰林學士朱震卒。戊寅上曰：楊時旣物故。胡安國與震又亡。同學之人。今無存者。朕痛惜之。趙鼎曰：尹焞可繼震。上曰：震亦嘗薦

焯代資善之職。但焯微賸。恐教兒童費力。俟國公稍長則用之。朱勝非聞居錄曰：先是戶部尚書章誼禮

政宰相趙鼎。知新除建康留守呂頤浩。必不赴。乃請以誼權守建康。泊頤浩改命。誼遂即真。悒悒復疾。兩

月卒。會當省試。鼎引故事。以震知貢舉。既錄院大中。遂作參政。震聞之。即病。謁告出院。不復供內職。累章

求去。詞語躁妄。詆誚鼎與大中。初章求外祠。次章復求行在宮祠。顛錯可駭。先是鼎初相。以其姻家范冲

與震同兼資善堂。爲鼎交結近聞。鼎罷冲亦去。震如故。及其復相。震自以爲於鼎有功。意圖執政。至是大

失望。怨鼎刻骨。月餘疾危。猶作詩詆鼎。遣人傳示。遂不起。一執政死。二從臣可歎也。癸未。戶部侍郎向子誼奏事稍久。而吏部侍郎晏敦復待對

未得。中書舍人潘良貴權侍立殿上。案權侍二字疑有脫誤。繫年因奏子誼無益之言。久勤聖聽。揖退之。

甲申。子誼乞致仕。良貴且得罪。中丞常同奏。良貴嫉子誼曼辭。衆以爲直。不可罪之。願許子誼補外。上詰

同曰。子誼之貳版曹。乃卿所薦。今良貴犯分沾激。復上章稱述何也。乃除子誼徽猷閣直學士。知平江府。

良貴集英殿修撰。奉祠而去。朱勝非閒居錄曰：向子誼進不以道交結北司。頗事貢獻。是日對甚久。論說

無益之言。不宜久勤聖聽。因厲聲叱子誼退。子誼駭愕而下。於是良貴罷。與外祠。子誼出知平江。中丞常

同論奏。以謂良貴忠直不應出前此。同嘗於上前。聽子誼蓋觀望北司也。至是上責其反覆。噫。從官方奏

對柱史。遽造前叱。下古未聞也。叱者。固非而被叱者。其人可知矣。初。四川制置使席益奏。以湖南等處諸軍屯於成都。至是校書郎孫

道夫白於宰執。謂漢唐以來。亂蜀如公孫述與孟知祥輩。皆非蜀人。成都無警益。乃移軍屯之。昨幾有竊

發之變。願還之舊處。以減糧餉。又比年使蜀。冠蓋相望。如劉子羽方出。而范直方又行。往來之費。公私騷

然。未聞有能宣德意者。願止之以息浮費。又四川元無都漕。自宣撫司以隨軍漕兼總領四川財賦。俾措

置茶鹽酒息。通融贍軍。今之都轉運司。但四分歲數。以付四路趣辦而已。願罷之以寬民力。或以其言爲

中時病。是夏。金元帥府下令諸欠公私債無可還者。沒身及家屬爲奴婢以償之。

中興小紀卷二十五

紹興八年秋七月己丑。以御史中丞常同爲顯謨閣直學士。知湖州。先是左僕射趙鼎嘗奏向子諲無罪當留。同與潘良貴誠有罪。不宜因子諲之故顯出之。俟少定。令外補。不惟爲同良貴。亦所以爲子諲。蓋外議猶以子諲久對爲非。而良貴實出於愛君也。二人旣出。給事中張致遠駁詔。謂不應以一向子諲出。二佳士上怒作色。顧鼎曰。固知致遠必繳駁。凡再言之。鼎曰。陛下何由知之。上曰。致遠與諸人善。趙鼎事實先入之言。上聞鼎奏。由是不樂。後數日。右丞相秦檜留身奏事甚久。旣退。鼎扣之曰。上毋以前日之言有語否。檜曰。上無他。但患相公不樂耳。鼎乃信而不疑。辛亥。宰執奏淮西張宗顏乞遣統制官吳錫軍馬回。別請濟師。上曰。吳錫有膽勇心計。然不可獨用。可趣歸。令楊沂中別發一軍。趙鼎曰。沂中已嘗有此請。蓋上知人能駕馭。皆出於談笑之間。所謂善將將也。於是樞密院令殿前司追回錫。仍依其數別撥一軍往廬州。權隸於宗顏。俟防秋過取旨。舊制三衙管軍。未嘗內宿。上駐蹕揚州。始日輪一員內宿彈壓。至是殿帥楊沂中已免宿直。又缺馬帥。惟權步帥解潛一員。與兩司使臣互輪。潛奏乞依東京舊例。乃詔潛權免。只分輪使臣。於是右諫議大夫李誼言。案魏置中衛將軍。晉武分爲左右衛。宋齊謂之二衛。各領營兵。每暮一人宿直。又唐右衛大將李大亮。自兼三職。宿衛兩宮。每番直。嘗假寐。太宗勞曰。公在。我得酣寢。則三衛宿直尙矣。太平無事。不以三衛宿直可也。今萬騎時巡。宮闕則非曩之壯大。禁衛則非曩之衆多。內外之患。可備非一。而管軍夜居於外。是潛等之寢則安。爲宗社慮則未也。望

令沂中與潛依舊輪宿仍權差馬帥通作三衙以次寓直上嚴宸極從之既遂以龍神衛四廂都指揮使

韓世良權馬帥時有御批宗子防禦使璩建節封國公入資善聽讀方疇嶧山語錄曰時左相趙鼎語

之後議論鼎者專以資善堂藉口鼎今日當避嫌公可面納此御筆如何納之檢當同數奏也鼎約檢與劉大中各作一劄子明日鼎與大中各將劄子至惟檢無之鼎遂參酌只

傳萬世陛下仁孝子孫千億未可量也但宗子某已封建國只是小國今某封吳國公卻是全吳臣欲且御筆曰待三五箇月別商量既下殿樞密王庶西人氣直語鼎曰公錯了也檢曰檢明日留身數奏明日

檢與大中有何奏上曰大中之說與卿一耳八月戊午詔疆場之臣無弛邊備庚申以利州觀察

使馬擴為沿海制置副使鎮江府置司先是朝請大夫吳說嘗與苗傅款密言者屢劾之十年不調辛

酉上因語宰執曰說累赦不得自新非朕用人之意可諭言官負釁之人已行者勿再論於是趙鼎等仰

服主上洪度兼容所謂國君含垢此其至也甲子宰執奏馬擴將到本使錄記海上之盟約金人夾攻

事上以為敵國之與中國如陰陽消長豈能偏廢若可勦除漢唐之君行之久矣趙鼎等三復上語謂此

豈特中國之幸亦敵國之幸也辛巳著作佐郎李彌正高閔皆除郎官而著作郎何掄張嶠尙未遷樞

密副使王庶疑之以問趙鼎鼎曰少需處之要職至是以掄為祕書少監殿中侍御史張戒言昔張浚入

蜀掄為之鷹犬去歲浚獨相自以黃潛善乃王黼之黨每持邪說以司馬光為非王安石為是至再修神

宗實錄掄攘臂其間略無忌憚浚敗乃焚毀簽帖國家大典豈宜屢易以徇權臣之私意詔以掄知邛州

案繫年要錄作邛州嶠不自安亦求去遂除福建轉運判官徽宗既祔廟禮畢是月始詔修徽宗實錄以左僕射

趙鼎兼提舉。鼎奏曰：先帝以仁厚之德，涵養天下，幾三十年，其間法令有未盡者，皆出於羣臣貪功冒賞之私，而有司壅於上聞，非先帝本意也。劉大中宣和初，知如皋縣，有旨，卽隱者徐神公所居，建爲觀，觀基包士民墳墓甚衆，大中顧有司不能決，乃具圖申省。且束裝待罪，洎取旨，先帝愕然曰：豈可發民墳墓，卽詔移之別地。則知當時有不便於民者，使先帝悉知，未有不改之者。此羣臣之罪，而蔡京爲之首也。上深然之。以至泣下。鼎又曰：崇觀之失，不歸之蔡京，使何人任責？今士大夫力主京者，皆厚私恩而薄祖宗之人也。願陛下深察之。時臨安府任同京邑，而守臣集英殿修撰張澄，有治劇之才，甚得時譽。是月除徽猷閣待制。九月丁亥，侍御史蕭振言：近除發運使，令糴米以待闕用，其價雖隨時低昂，常使官價高於民間，仍不加耗。及卽時支錢，則有以助國寬民，詔從之。旣而右諫議大夫李誼言：祖宗時發運所領，乃轉輸東南之粟以實中都，又制茶鹽香礬百貨之利，今皆所不及。惟是給以本錢，使之糴買，然復興一司，豈專爲此哉？如營田經理之制，市易懋遷之法，又州縣錢物之限，無所拘賦，斂之橫無所考，監司廢格詔條，漫無有稽察。臣願俾總六路而調其盈虛，內與戶部相爲表裏，則劉安之策可展而不爲虛文。不然，則糴買一事，自可責之諸路漕臣，何必創此司哉？望下臣之說於三省，講而行之。蕭振一日奏事，上因語臣下之姦者，且曰：朕所不欲以語卿，恐人謂朕令卿言也。振曰：臣與陛下所共者理耳。理之所在，臣安敢自默。時新除沿邊守臣王默等辛丑，上謂宰執曰：今日邊壘，內則撫綏，外則斥堠，二事至大，未易得人，宜精擇之。乙巳，金遣左監軍薩里罕，自雲中馳之陝右，見左都監拔朶議割地事，路由同州。先是青澗李世

輔陷僞境。時爲同州守。世輔怒。薩里罕無禮。因殺其從者百人。將擒以歸本朝。會敵騎追逼。世輔折箭爲誓。縱之去。於是世輔不克南歸。亡入夏國。初。召秦檜之來。道出婺州。時左朝散郎王次翁致仕居婺。與檜遇。旣而中書舍人樓炤爲檜言。次翁甚貧。因曰。呂頤浩。次翁郡人也。頤浩再相。次翁困一至此。檜笑曰。非其類也。遂落次翁致仕。以兵部郎官召之。是月。移爲吏部郎官。是秋。金人括京畿及陝西錢穀。皆轉移北去。蓋有割地以歸本朝之意也。冬十月。重修祿秩。敕令書成。丙辰。右僕射秦檜上之。侍御史蕭振論參知政事劉大中與父不睦。何以事君。望正典刑。以厚風俗。大中亦累草乞罷。丁巳。以爲資政殿學士。知處州。振復論。遂改提舉洞霄宮。趙鼎事實曰。初。監察御史蕭振。力求外補。且託其鄉人吳表臣。薛徽年七十。求去。至是不復以親爲詞。尋除南臺。是必有鷹爲鷹犬者也。未論月。論劉大中。至三章不已。鼎謂意不在大中。行且及臣矣。方囑稽山語錄曰。時召蕭振入臺。振奏檜死黨也。首攻劉大中。大中旣去。趙鼎亦巧去。正人端士。掃地盡矣。論者云。檜秦竊柄十有八年。毒流天下。皆自振發之。故曰。振曰老蕭云。蕭振言。經制司糴米。而發運使程邁一例拋與諸州。則諸州不免拋下諸縣。科之百姓。卽非創司寬民之本意。宜令官自置糴場。丁卯。詔從之。辛未。趙鼎入辭。從容奏曰。臣昨罷相半年。蒙恩召還。已見宸衷所嚮。與向來稍異。臣今再辭。而後人必有以孝弟之說脅制陛下矣。臣謂凡人中無所主。而聽易惑。故進言者得乘其隙而惑之。陛下聖質英邁。洞見天下是非善惡。謂宜議論一定。不復二三。然臣甫去國。已稍更改。如修史本出聖意。非羣臣敢建言。而未幾復修。此爲可惜。臣竊觀陛下未嘗容心。特旣命爲相。不欲重違其意。故議論取舍之間。有不得已而從者。如此乃宰相政事。非陛下政事也。上曰。朕深會此矣。趙鼎之去也。樞密副使王庶送鼎登舟。曰。公欲去。盍早

爲庶言鼎曰去就在樞密鼎豈敢豫庶西人氣直卽曰庶會此矣 召龍圖閣直學士孫近及端明殿學

士李光乙亥以近爲翰林學士承旨光爲吏部尙書既而給事中張致遠以徽猷閣待制出知廣州中書

舍人呂本中奉祠而去二人皆趙鼎所厚者二人之去皆在十一月今聯書之 辛巳宰執奏北使約仲冬至泗州上曰

所議殊未可解但可和則和不可和則否可督諸將爲之備也 十一月甲申以學士承旨孫近爲參知

政事 龍圖閣直學士汪藻復進宜和以後詔旨己丑除藻顯謨閣學士 有旨少師劉光世賜第中書

舍人勾龍如淵繳奏上曰今財力困匱營繕實難但以光世罷兵柄奉朝請恩禮稍加於舊則諸將知後

福之有終皆效力矣於是宰執秦檜等退而稱上馭將帥深得漢光武遇功臣之意 前宰執趙鼎之求

去也殿中侍御史張戒以謂大臣進退國家安危所係陛下他日必悔乞留鼎於經筵詔戒爲耳目之官

附下罔上可與外任朱勝非居錄曰趙鼎復相植黨益急凡凶險刻薄之士無不收用使造虛譽而排

濺運殿院鼎失眷巧罷知其決去即露章請留以徵後福其言狂躁愚弄鼎既罷猶知其決去即露章請留以徵後福 接伴使范同奏金使遣人議過界上曰若使

百姓免於兵革之苦得安其生朕亦何愛一己之屈勾龍如淵退朝錄曰時金國遣二使攜書來書中蓋

號其書曰詔書指吾國曰江南見吾館伴使必欲坐堂而欲上再拜親受之一隅所歷州縣必欲使

迎其書如吾國中迎天子詔書之禮且言其書到行在必欲上再拜親受之一隅所歷州縣必欲使

付館伴范同途中稍生事當議編置而朝廷禮益不決如淵再奏今日和議實陛下以徽宗顯肅皇后

梓宮與母兄之重在人國中宸心朝夕不遑寧處遂遣王倫奉使請和今日和議實陛下以徽宗顯肅皇后

不受必致歸曲於我一日與師彼則有辭此議和固不可壞而禮文之間動輒過當倘不度利害勉而從

之則堂堂中國一旦遂爲金人屈已如臣管見必遣王倫與使人反覆商議取得金書納入禁中則禮不

行而事自定矣上曰果如此 樞密院編修官廬陵胡銓上書言王倫無故誘置金使以詔諭江南爲名

是欲臣妾我也。倫論我一屈膝，則梓宮可還，太后可復，嗚呼！自來主和議者，誰不以此說昭陛下，然卒無一驗。則敵情亦可知矣。向者陛下間關海道，危如累卵，尚不忍北面臣敵，今無故而反臣之，百官軍民皆欲食倫之肉，倫不足道，而秦檜亦爲之。近者曾開引古誼以折檜，檜厲聲曰：侍郎知故事，檜獨不知耶？檜畏天下議已，又令侍從臺諫僉議以分謗。孫近傅會檜議，遂得執政。臣謂倫可斬，近亦可斬也。願斬三人頭竿之藁街，然後羈留使者，而興師問罪。則三軍之氣不戰而自倍，不然，則臣有蹈東海而死耳。辛亥，詔銓狂妄上書，意在鼓衆，除名勒停，昭州編管。時銓有孕妾臨月，遂寓湖上僧舍，欲少遲行，而臨安府已差使臣挾錮身來矣。館職范如圭與刪定官方疇同見吏部侍郎晏敦復，爲銓求緩。敦復曰：某嘗言秦檜之姦，諸公不以爲然。今方專國，便敢如此。趙元鎮雖無狀，不至是也。此人得君，何所不爲。敦復卽往見知府張澄，語之曰：銓論宰相，天下共知。祖宗朝言事官被謫，開府必不如是。澄愧謝曰：卽追回矣。方疇稽山語

見趙鼎於稽山誦晏敦復有趙元鎮無狀之語，鼎曰：景初亦出此語乎？疇曰：某親聞之。疇又曰：敦復久在銓通，故

銓鼎於稽山誦晏敦復有趙元鎮無狀之語，鼎曰：景初亦出此語乎？疇曰：某親聞之。疇又曰：敦復久在銓通，故

不遁之也。

於是秦檜、孫近、上章待罪，詔無罪可待。檜等又奏：若銓重竄，則臣等有所不安。遂寢前命，送吏部與廣南監當。右諫議大夫李誼言：陛下臨御於今一紀，所用相凡十人，執政三十三人，然皆不允而去。規模數易，士夫知其不久，則肆爲同異而無忌憚。吏知其不久，則專爲苟簡以幸蔽欺。陛下夙夜憂勤，而治不加進，殆必由此。今左相虛位，參政闕員，乃擇賢之時，望考以聖心，參以公論，倘選而得天下之材，則責之專任之久，可革數易之弊。臣備位言責，不敢復避形迹，惟陛下察焉。是月，資政殿學士陳與義卒。

於湖州。禮部侍郎張九成求去。面奏曰：外議以臣爲趙鼎之黨。雖臣亦自疑之。上問其故。九成曰：臣每造鼎。見其議論無滯。不覺坐久。則人言臣爲鼎黨。無足怪也。於是九成除祕閣修撰。提舉太平觀而去。十二月。右僕射秦檜乞差官前路與金使計議。使名未正。當以江南爲宋。以詔諭爲國信。至如不受封冊。不泛遣使。皆先事豫約。戊午。上謂宰執曰：朕承祖宗二百年基業。爲臣民推戴。已踰十年。豈有受其封冊。兼畫疆之後。惟正旦生辰。遣使非時。不訂往來。於是檜等皆仰嘆。上沈幾遠慮。非羣臣所及。己未。秦檜言：趙鼎修哲宗史成。加特進。直學士院。呂本中行詞云：合晉楚之成。不若尊王而賤霸。鼎爲首相。於議和未嘗不僉同。今命詞如此。皆鼎風旨。欲伺和議不成爲脫身之計。上因諭己酉年。金人南驚。鼎時爲臺臣。尙欲與金人畫江爲界。豈以和議爲非。此事張守備見檜曰：更可錄此聖語付史館。於是檜等退而竊嘆。上明知照臨。洞見臣下反覆之態。豈可欺哉。中丞勾龍如淵言：資政殿學士王庶嘗營救趙鼎。乞罷潭州之命。丙寅。詔庶落職。與宮祠。金國左副元帥達蘭遣其使張通古來朝。己巳。入見。通古言先盡還河南地。徐議餘事。殿中侍御史金華鄭剛中言：今日之勢。尤急於邊郡。如楚泗通泰滌濠江鄂。以至荆襄關陝之地。不過二十餘郡。願詔大臣精選二十輩。分而布之。使其招徠牧養。朝廷又時遣使。按行無狀者。易之處。處處得人。則須以持久增秩。賜金之事可行矣。庚午。詔從之。參知政事李光請罷常平主管官。辛未。上謂宰執曰：常平法本漢耿壽昌。今豈可以王安石而廢之。其提舉官自可復置。庶幾不陷失一司錢穀。秦檜因奏：光言諸路月椿錢。漕司不以上供及移用等錢椿辦。又一路諸郡輕重不均。致不免敷之百姓。

上曰。朕屢諭趙鼎。更不肯行。若悉將上供等錢。樁辦。自不必科敷。兼江東既闕。劉光世一軍。其錢糧亦通用。蓋上哀憫元元之意。其切如此。甲戌。以端明殿學士韓肖胄爲僉書樞密院事。乙亥。詔肖胄充金國報謝使。以樞密都承旨錢愐副之。是月。以起居郎劉一止爲中書舍人兼侍講。太府寺丞莫將。賜出身。爲起居郎。一止亟言將丞九列。驟綴從班。人以爲將上書助和議而得之。臣之誤恩。與將同制。臣若不言。人必謂臣自爲地而不忠。乞併臣罷之。不報。將歸安人也。先是左僕射秦檜嘗因語國事云。此事大係安危。禮部侍郎曾開於坐中抗聲曰。丞相今日不當說安危。止合論存亡耳。檜矍然驚其言而罷。是月開以寶文閣待制出知婺州。此據呂大麟見聞志初吏部郎官黃祖舜。以父憂去位。至是免喪。自度與時論不合。卽乞奉祠。浮湛里中。以著書自娛。家貧屢空。而處之常晏如也。時淮東宣撫使韓世忠。伏兵於洪澤。詐令爲寇。俟金國使回。則劫之以壞和議。而世忠將郝卞。密以告漕臣胡紡。紡白之奉使。僉書樞密院韓肖胄。故金國使。由淮西以去。世忠不得而劫焉。金人旣割河南之地以歸本朝。遂移行臺尙書省於大名府。仍遣行臺左丞相張孝純還。上詔孝純赴闕。孝純自慚。乃白右副元帥烏珠。願歸徐州。致仕而卒。時金人以舊嘗臣劉豫者李鄴。爲翰林丞旨。馮行寧爲戶部使。戶部在平陽府。二人受命。皆便服以赴焉。初北使之來也。校書郎范如圭。上書於右僕射秦檜。責以曲學倍師。忘讎辱國之罪。且曰。公不喪心病狂。奈何一旦爲此。若不早改。必且遺臭萬世矣。檜怒。至是如圭輪對。言南京版圖旣入。則九廟八陵。瞻望咫尺。而朝修之使未遣。何以仰慰神靈。下遂民志。上悽然曰。非卿不聞此言。遂命遣使。檜以其不先自己。益怒。久

之如圭奉祠而去

中興小紀卷二十六

紹興九年歲在己未春正月甲申上諭宰執曰朕每有意候邊事平與民休息如月椿錢之類宜悉蠲之祕書少監永州居住張浚上言今敵中有故上下分離故天屬盡歸河南遂復我必德其厚賜將來內變既平指瑕造隙肆無厭之欲發難從之請其將何辭以對臣罪戾之餘深不欲論事顧利害至重不敢自默惟陛下留意乙酉宰執奏赦條事上曰凡臣僚抵罪大則竄黜小則停降雖其才可用而資實小人亦不可輕赦而復進蓋世無用小人之理或偶因微罪既霑霈澤豈可不滿洗收錄若以前事論列不已乃使人材終廢亦可惜也上甄別賢否愛惜人材如此丙戌詔監察御史莆田方庭實宣諭三京癸巳上謂宰執曰今當創宮殿以俟太后之還秦檜等曰漢有長樂宮所以奉母后也臣聞聖人之德莫大於孝自輿地將歸陛下出令皆以祖宗母兄爲先有以見聖孝通於神明宜乎上天悔禍而強敵之革心也時經制發運司纒糶米四十萬斛言者以謂舊發運使總六路財賦而餉中都兵興以來既無轉輸但以糶事委之自朝廷給本錢無慮五六百萬緡又諸路常平既使香鹽司兼領又別差主管官有司莫知適從今欲將發運使並常平主管官罷之丁酉詔去發運二字命戶部長貳一員兼領仍別置副使或判官一員不時巡按諸路其常平官並改充經制某路幹辦官尋以戶部侍郎梁汝嘉兼江淮荆浙閩廣經制使司農卿霍蠡爲判官先是鹽法屢變其課寢虧自汝嘉貳版曹課乃復登戊戌名徽宗陵曰永固

以同僉書樞密院王倫爲東京留守昭化軍節度使。郭仲荀副之。以少師萬壽觀使劉光世爲陝西宣撫使。移四川制置使胡世將副之。仍加世將寶文閣學士。會光世弟光遠疏光世之短於言路。於是中丞勾龍如淵言。光世不可遣。乃罷其行。勾龍如淵退朝錄曰。時朝廷擇帥。以人材難得。遂搜至於仇愈。陳規賢於愈。規輩其意。蓋欲取練達如呂頤浩者。處之關中。靜重如朱勝非者。處之汴京。而張浚素有威望。宜處之建康。方言及頤浩。上曰。頤浩若不去。趙鼎。河東人。亦可去。上獨不及張浚。如淵曰。浚動在社稷。陛下豈能終忘之。上曰。亦須付之一路。持不可去。陝西耳。明日。宰執對。遂以此意宣諭。而朝廷大不悅。後旬日。有旨除劉光世陝西宣撫使。朝廷似欲以此遇呂頤浩之行。而如淵再論。光世不可遣。乃罷之。

川陝宣撫使吳玠改爲四川宣撫使。初玠軍中所用激賞錢。每歲下四川都轉運司應副一百八十萬緡。至是玠言。今不廢兵。乞省其半。詔獎之。詔李上謂宰執曰。河南新復。宜命守臣專拊遺民。勸農桑。各因其地以食。因其人以守。不可移東南之財力。虛內以事外也。於是秦檜等竊嘆。上規模素定。皆萬世之計。非臣下所能及。既而東京副留守郭仲荀請兵及糧。上曰。朕今日和議。蓋欲消兵。使百姓安業。留守司豈用多兵。但三二千人。彈壓內寇足矣。錢糧亦祇據所入贍之。豈可虛內以事外耶。朕見前朝開邊。如陝西燕山。曾不得尺帛斗粟。而府庫已竭。此可爲戒矣。仲荀乞兵糧在二月一日。今聯書之。初起居舍人薛徽言爲前宰臣趙鼎所厚。一日因右僕射秦檜於上前論和議事。徽言自殿直前引義固爭。反復數刻。遂中寒疾。是月卒。

初宗正少卿范冲。寺丞孫緯等奉詔在紹興五年修祖宗仙源圖。宗藩慶系錄。宗支屬籍。凡三書。以太祖太宗及秦王各爲一總。號曰總要。又以母氏。姓生。宗婦。宗女。宮院。官爵。壽考。賜諡。各爲一條。分類成書。復被旨俟二三年續修。去冬本寺已請得旨。至是宗正少卿鄭剛中言。見與寺丞陳確同修。緣三京宗司所

報與舊書有抵牾處。乞許新舊俱存。庶他日可考。仰稱陛下厚本之意。剛中。金華人也。二月壬子朔。史館進祖宗實錄。上曰。朕要見景德中興契丹講和後故事。今日可遵行者。每於靜中留意機務。頗覺有得。於是宰執秦檜等退。而贊上心虛靜。萬幾之暇。留意典籍。每行一事。必以祖宗爲法。規模宏遠矣。以給事權直學士院樓炤。爲翰林學士。上欲用太常少卿邵武謝祖信。爲臺官。癸丑。諭宰執曰。朕恐祖信不知今日事幾。可召赴都堂。與之議論。秦檜等奏。臺臣乃天子耳目。恐召至朝堂。然後授。外間不知陛下之意。不能無嫌。上曰。大臣朕股肱。臺諫朕耳目。若使臺諫譏察大臣。豈朕之意。時檜等雖荷上眷。迄不敢召祖信。退而相勉曰。上開懷待遇如此。其忍負之哉。監察御史方庭實。奉使回。奏邊事不合。己未。改祕書少監。秦檜曰。凡進擬差除。未嘗敢分朋黨。因陳辛亥歲。席益行赦文不工。爲諫官所論。緣此怏怏。後守平江。適呂頤浩爲都督過郡。遂離間同列。卒成黨與之禍。上曰。士大夫豈有不由宰相進擬。卿等能平心用人。甚善。御史中丞勾龍如淵。與起居郎施庭臣。因私忿交爭。奏其惡。如淵謂庭臣指斥。壬戌。上謂宰執曰。如淵身任臺綱。自合早論。至一月後。因忿方奏。此告訐也。告訐之風。出於末世。三代所未聞也。以朕觀之。庭臣之罪小。如淵之罪大。乃命秦檜先召庭臣詰問。癸亥。檜奏。陛下若欲存國體。先黜庭臣。仍改除如淵。俟其乞出。然後補外。上欲正其事。乃詔庭臣語言狂率。責嶺南監當。如淵失風憲之體。罷與外任。命下。人皆服上之英斷如此。其後檜擬除如淵。知遂寧府。上曰。此人用心不正。遂已。擬除如淵在明年三月。今聯書之。初。諸路月椿各有窠名。其後多爲漕司占留。遂不免敷民甲子。宰執請均於諸路。不得偏重。上曰。若所發窠名。

錢不足。自合從朝廷給降。不得一毫及民。朕欲養兵。全藉民力。若百姓失業。則流爲盜矣。上知月椿之害。每每宜諭。憂形於色。此臣下所當奉承也。丁卯。上諭宰執曰。太后歸。略備從物。務從質朴。如器皿塗金可也。朕自卽位。飲食器用。未嘗妄費。卿等所知。秦檜等退。相謂曰。上天資儉德。雖奉太后。猶不欲過。漢文履革烏衣。弋綈不能過也。時內侍黃冕辭免製太后褱衣事。上曰。太后聖性恭儉。服用簡素。今回鑾有期。朕得盡東朝之養。時上喜見辭色。檜等退而贊上之聖孝。出於天性。其屈意求和。實緣太母。宜乎上天悔過。強敵革心。誠非常之慶也。癸酉。詔史館見修徽宗實錄。今以實錄院爲名。右僕射秦檜兼提舉。其修撰檢討官。令檜辟差。於是吏部侍郎范同。爲修撰。禮部員外郎劉昉。爲檢討。昉。潮陽人也。上嘗謂宰執曰。徽宗內禪之事。誠意素定。非因人言。初築北宮夾城甬道。嘗諭梁師成曰。吾他日釋下重負。欲與嗣聖往來其間。抱孫自娛。宣和末。遂踐此言。而小人乘時多事。貪天之功。以爲身謀。秉筆之士。不可不知也。檜等曰。當時玉音如此。臣等疏遠。若非聖諭。實所未知。戊寅。殿中侍御史謝祖信言。今天意助順。輿地自歸。而朝廷乃在江吳。道路遼邈。所以宣至意。收人心。惟在號令。宜推誠引咎。使叛者革心。詔劄付詞臣。時已遣內侍陳成之往陝西撫諭。仍先至吳玠軍。次之逐路。於是右諫議大夫李誼言。成之素不與諸將相識。情未易通。訪聞知金州郭浩。父成舊爲邊將。張中孚。中彥。皆出其門。案要錄慕容洵之父。亦成部曲。而趙彬貧時。又嘗依浩。實於諸將有契。望詔成之。與浩同去。所冀衆心早得以定。上欲得元臣調護陝西諸將。是月。召少傅醴泉觀使呂頤浩赴行在。頤浩以年垂七十。力辭不至。具附奏。金人無故歸地。其必有

意。臣記五路元是張中孚中彥慕洧之徒爲帥。今必仍舊。然皆久據一方。慮亦難令。當諭以德意。許之久。任庶不致疑。旣而再趣頤浩至闕。竟聽其辭。及將東歸。復言秦爲天下脊。今宜於長安。興元。襄陽。各置宣撫司。而重兵屯襄陽。且建行臺。仍卽五路選精騎三萬赴行在。請上親提萬騎。不時勞軍。使金人罔知六飛所在。以伐其謀。自爾不敢復窺江淮。而中興之業。由茲起矣。詔提舉洞霄宮張浚復資政殿大學士。知福州。召徽猷閣直學士知漳州廖剛。旣至三月丙戌。除御史中丞。戊子。殿中侍御史謝祖信言。和豫買爲民之病。有司變爲折錢帛。又甚患者也。祖宗時。官俵錢於春。而民輸縑於夏。故公私兩利。其後官無本可俵。則名爲豫買。其實白著。是歲於常賦之外。又輸倍軍興。久而財益絀。遂行一切之政。數歲前。縑價高而折錢。或至十千八千。今價減而有司猶執前直。一例折錢。使民鬻縑而求錢。此又甚病也。二病固未能去。求以少紓民力。惟在均而已。欲下諸路。各具所敷之宜。或以稅錢。或以畝頭。使戶無高下。依夏稅法。則姦民猾吏。詭名折產。無所容其倖。而所出均矣。詔戶部措置。甲午。士謂宰執曰。士卒暴露。累年菴廬下。寒暑燥溼之苦。豈人情所堪。俟疆事稍定。當爲蓋營屋。使各安居。於是秦檜等退而竊嘆。上恤士卒如此。人豈得不樂爲之死也。中書門下言。京城已差留守外。其南京。西京。兩處留守。乞權以本府守臣充從之。丁未。上謂宰執曰。河南新復。州縣官當擇豈弟慈惠之人。庶爲朕撫養凋瘵。使不失職。秦檜等曰。陛下仁意惻怛如此。臣等敢不承也。夏四月。庚戌朔。上以陝西新復。不宜置宣撫使。當遣大臣諭以德意。辛亥。乃詔僉書樞密院樓炤往焉。以祕書少監鄭剛中爲參謀官。初。環慶將官慕洧叛。至是安撫。

使趙彬奏已殺洧。餘衆多降。癸丑，秦檜奏曰：「陝西已無事，皆陛下聖德所致。」上曰：「朕何以致此？」乃祖宗在天之靈默佑。然朕自來，惟持不殺之說。於是秦檜等贊曰：「此乃陛下爲天人所歸也。」孟子曰：「惟不嗜殺人者能一之。」陛下堅守和議，不煩干戈，坐得中原，豈非不殺之功乎？右諫議大夫曾統、殿中侍御史謝祖信，皆論趙鼎久位宰司，專權植黨，在靖康未嘗受張邦昌僞命，近上章納節，敢以富弼自列。臣子共憤，望加流竄。時鼎以少傅奉國軍節度使、知泉州，乃詔落節。吏部尙書晏敦復力請奉祠，詔除寶文閣直學士、知衢州。戊午，步帥解潛爲趙鼎所厚，至是請奉祠，出爲福建路副總管。初二，聖北狩，上每遇朔望，率羣臣遙拜。自徽宗升遐之後，遙拜淵聖如故。至是中丞廖剛言：「兄弟同列，方兄爲君，則君事之，及己爲君，則兄事之而已。今淵聖之歸，有期望罷遙拜，唯淵聖節，百官仍舊祝壽，下禮部太常寺卽而討論，欲遇朔望，上用家人禮遙拜於禁中，郡臣於宮門外遙拜從之。」東京留守王倫奏：「金國元帥謂所降赦文，載割河南地，不歸德於金國，倫一面改定，謂元降赦文非真，卻要國書意與符同。」甲子，上曰：「待外國當以誠，因舉寶訓故事，契丹使耶律元在館，嘗詢左右，館中日聞鼓聲，豈非習戰耶？」或對以優人戲場，真宗聞之，謂宰臣曰：「不若以實諭之。」諸軍比無征戰，習武藝耳。宰執秦檜等退，相謂曰：「上每推誠待物，動法祖宗，庶永保和好，使敵人無隙之可乘也。」庚午，殿前司募鈞容樂工，上慮其擾，令但留舊人，不得增募。上曰：「朕未嘗好世俗之樂，少頗善彈琴，自居亮陰，久亦忘之。」蓋上清心寡慾，無聲色之娛，免喪後不許募樂工，蓋防微杜漸，規模閔遠如此。知綏德軍劉議自言嘗污僞命，乞放歸田里。壬申，宰執擬依赦仍舊任。上曰：

新復州軍。他時悉用文臣。卿等爲朕擇循良之吏。武臣不曉法。直不可與郡。上久勞於外。深達治體。更屬文武之意。同符藝祖矣。是日。宰執又奏。京城親從官王琪。以三朝御容來。上曰。近有司自京城來獻。眞宗御容。有司辨其非眞。復獻筆百官。雖微物。朕不欲受。恐來者不已也。是月。資政殿學士席益卒。原本缺

庚辰。右諫議大夫曾統言。自去冬以來。凡七遣使。初命韓肖胄報聘。又命王倫交地。又遣方庭實宣諭三京。郭仲荀留守東都。周聿宣諭陝西。士儂張燾恭謁陵寢。樓炤又至永興。布宣德意。所攜官吏軍兵甚多。借請不知其數。竊聞熙寧初。宰臣韓絳宣撫陝西。纔費十八萬緡。時論沸騰。以爲大咎。今一使之費。已數倍於昔。蓋自崇寧權臣用事。務爲華侈。以悅人情。至今未革。將來兩宮南還。其費不少。謂宜擇忠實通練之臣。以舊制裁定。庶無妄費。從之。時新復州皆免賦役三年。而亳州民自願輸以助國用。上曰。中原遺民。久困暴斂。今喜於來歸。誠意樂輸。然乍出塗炭。尤當加恤。兼信豈可渝。乃令依敕蠲免。仍降詔獎諭。新復諸州進天申節銀絹。癸巳。上謂宰執曰。新復州無餘財。此寧免於擾民。可悉退回。秦檜曰。陛下誕節。人臣皆致享上之誠。而聖意加恤新民。卻而不受。可謂盛德之事也。丙申。上謂宰執曰。鋪翠銷金之飾。屢詔禁止。今宮中雖無敢犯。而有司奉行不虔。市肆公然爲之。可重立告賞。務在必行。秦檜等曰。陛下以儉德理天下。而風俗尙習故態。官吏格詔。宜痛加繩治。戊戌。資政殿學士宇文粹中。卒於成都府。癸卯。上謂宰執曰。太祖時強藩悍鎮。與方面之臣。旣歸朝。皆貸之。今中原官吏復還。朕方以天下爲度。凡舊染之污。一切兼容。秦檜曰。陛下天覆之德。如此四海孰不歸心。上曰。今羣臣正當叶心。共成治道。然在

外者輒辭難避事。在內者議論多徇私立異。風俗如此。何以求治。卿等當分別之。明示賞罰。檜曰。陛下聖明。灼知治道。臣等敢不奉詔。乙卯。上諭宰執曰。近除邢孝揚團練使。朕思顯肅皇后家。尙未推恩。乃先及孝揚。恐失先後之序。秦檜等退。檢會顯肅聞訃曰。其家已推恩。上曰。今與鄭藻落階官足矣。上每行一事。反覆精思。務協公議。雖戚里間。未嘗以私意行之也。時以觀文殿學士汪伯彥知宣州。仍趣朝行在。伯彥將至國門。丁巳。上謂宰執曰。伯彥相見。便會之官。庶免紛紜。且曰。伯彥潛藩舊僚。去國十年。漢高光不忘豐沛南陽故舊。皆人情之常。秦檜退而竊嘆曰。伯彥遭遇聖主。乘風雲之會。致位宰輔。雖勳烈無聞。然上終始眷之。可謂至矣。初。伯彥未第。有祁門縣令王本者。築館曰英材。延之授經。檜與其兄弟皆從。伯彥游。至是。伯彥蒙異寵。亦檜之力。詔伯彥元帥府舊臣。特依見任執政給俸。於是給事中劉一止曰。節度使俸借減尙不薄。況郡有供給圭田之厚。以郡守而依執政。殆與異時非待制而視待制。非兩府而視兩府者類矣。乃詔罷之。詔徽猷閣直學士仇愈爲陝西都轉運使。愈以病固辭。言者論其避事。詔褫職。尋責居全州。殿中侍御史周葵論國用軍政士風三事。己未。上謂宰執曰。國用當藏之於民。但百姓足。國用非所患也。上於百姓涵養休息。雖兵興未嘗橫斂。宜中興之民。戴之愈久而不忘也。時有被召人鮮于參到闕。丙寅。秦檜奏參乃王庶所薦。人材似可取。乞令上殿。臣備位宰司。人材苟有可用。不敢輒分黨與。上曰。朕豈能盡知天下人材。但付之宰相。宰相賢則賢人皆聚於朝矣。檜退而竊嘆曰。上任相之意。可謂得其要矣。開府儀同三司士儂。兵部侍郎張燾。歸自西京。己巳。入朝。士儂等曰。諸陵下石澗水。自兵

與以來久。二使到日。水即大至。父老驚嘆。以爲中興之祥。於是上以語宰執秦檜等。謂燾必不妄言。檜等退朝。相謂曰。石澗水至之祥。可謂異矣。燾之言能使人主信重。雖甚異事。不以爲妄。其立身行己無愧矣。張燾奏徽宗山陵。乞不用金玉。辛未。上曰。前此厚葬之意。如循一軌。金玉之物。朕意不用。或謂朕以天下之富而薄於親。如後世譏議何。朕既灼知薄葬之益。使先帝神靈有萬世之安。雖以朕爲不孝。不敢辭。蓋上通經博古。見利害之實。非流俗之言所能奪也。初。僉書樞密院事韓肖胄充報謝使。既入北境。其接伴者謂當稱謝恩使。肖胄以使名敕授。不敢輒易。論難三四。卒不能奪。辛未。肖胄還至東京。壬申。僉書樞密院事樓炤至。永興軍留十餘日。初。僞齊將李世輔亡入夏國。其家悉爲鄜延帥宗雋所害。世輔欲從夏國借兵復讎。夏國主曰。爾能爲吾立功。則不靳借兵。時有酋豪號青面夜叉者。恃衆擾邊。乃屬世輔圖之。世輔請精騎三十。晝夜疾馳。奄至其穴。擒之以歸。國主大悅。即出兵授之。世輔至延安府。殺宗雋等二人。因剖心以祭。會金國已還三京。世輔說夏人南歸。而夏人多懷疑懼。與願從者二千人來。而夏國招撫使王樞反說世輔還夏。世輔遂擒樞同來。纔入境。即望闕遙拜。言本國主喜甚。再三感聖恩。將遣使入貢。奏至上。謂宰執曰。夏人既有此意。其待遇之禮。令有司舉故例行之。上諭在三月丙申。今聯書之。至是。樓炤與宣諭使周聿皆招納世輔歸朝。甲戌。上諭新除京畿都轉運使李迨令速行。不然須重貶。蓋迫於公議。雖與朕有潛藩之舊。不得而私也。迨惶懼上道。蓋上之威斷足以警偷惰。懲傲慢也。時同僉書樞密院王倫尙留守東京。先是金國右副元帥烏珠歸其國。徑之祁州。元帥府密奏於國主。亶云。河南地本達蘭宗磐

主謀割於南宋。二人必陰結彼國。今宋使已至汴京。未可令過界。倫有雲中舊吏隸烏珠帳下。嘗來謁倫。言烏珠謀誅達蘭。倫卽馳奏。乞早爲之備。上以示宰執。而秦檜但趣倫過界。乙亥。倫始解留鑰。將使指北行。是月。川陝宣撫使吳玠卒於仙人關。後諡曰武安。玠馭下嚴而有恩。故士樂爲之死。川陝宣撫副使胡世將。嘗問玠所以勝者。於其弟龍神衛四廂都指揮使璘。璘曰。金令酷而下必死。先兄每與之戰。非累日不決。大抵舉中國所長而用之耳。蓋中國弓矢勁利。金士卒堅耐。吾常以長技洞重甲於數百步外。又選據便利。出銳卒以更撓之。使不得休。彼雖堅耐。亦不能無弛。此待之之要也。吏部侍郎謝祖信。除徽猷閣待制。知潭州。趙鼎事實曰。先是謝祖信作言官。力論鼎落節。於是章氏諸孫咸集闕下。再謀理訴。併出朕意。趙鼎何豫。聞有從宜爲之主議者。執政奏謝祖信。章氏子壻也。上曰。亦知之。遂出祖信知潭州。祖信聞之大駭。歸家。詎其妻凡數日。曰。由爾家累我。以至鬱鬱而死。識者評之曰。使鼎在朝。日收拾祖信。而用之。未雖不出其妻。小人唯利所在。初不以親爲意。雖父子之間。有所不顧。況妻黨乎。是夏。金國左副元帥達蘭之蔚州避暑。達蘭下令。諸藏避我而逃者。家長罪死。籍其產及人口。半以充賞。四鄰之家。共追賞錢三百緡。仍發番軍分諸路搜捕。民間大擾。羣起爲盜。以拒番軍。遂復止之。達蘭在諸帥中。最號寬恕。今顧爲此。蓋陰與皇伯宗磐同謀。將以致亂。使民嘯聚。則藉之起兵。又令中山府拘奉使王倫於館。且會諸路僉事。以復取河南爲名。皆所以應宗磐也。初。南安李乾德。有庶子智之。奔大理國。改姓趙。號爲平王。至是。知李陽煥卒。其子天祚襲封。大理國遣兵三千送智之歸。要代天祚。天祚不肯。領兵與戰。又敗之。智之欲進奉朝廷。仍乞借兵。廣西經略司以聞。詔令諭以婉辭。勿引之生事。

中興小紀卷二十七

紹興九年秋七月己卯朔金國有郎君仲和什

案原鈔本作烏克紳注云原名吳矢今改正語當有誤下

與之同名致擊年要錄作仲和什今據改

者反擒獲之下大理獄事連宋國王宗磐、竟國王宗雋、虞國王宗英、滕國王宗偉、

年要錄作滕國王宗英、虞國王宗偉

殿前左副點檢罕都今改正

時金主亶與右丞相陳王烏克紳室謀誅諸父因朔旦

伏兵於內宗磐等入見擒送大理獄辛巳悉夷其族詔略曰周行管叔之誅漢致燕王之辟惟茲無赦古不爲非翰林韓昉作也時左副元帥魯國王達蘭方握兵在外難遽誅之乃除達蘭爲燕京行臺左丞相

又以僉書杜充爲右丞相仍擢右副元帥烏珠爲都元帥命下達蘭語使者我開國功臣何罪而與降奴

杜充爲伍耶不受命而叛初欲歸本朝不克既而北走沙漠烏珠遣右都監托卜嘉追獲之下祁州元帥

府獄具殺之達蘭臨刑謂烏珠曰我死之後禍必及爾宜速圖之烏珠俛首無言遂囚達蘭子泰伊原名太洩

今改久之因赦得出東京父老百餘人詣闕稱賀乙酉上臨軒以見皆補官遣之甲午上謂宰執曰

朝廷惟要辨君子小人君子小人既辨則治道無不成秦檜等退而竊歎聖謨切見立政用人爲帝王之

先務蓋堯舜禹湯文武之治何以出此吏部侍郎張巖遷尙書時久早上齋居蔬食以祈雨澤己未

秦檜奏曰攷之典禮陛下惟當損太官常膳上曰雖損膳豈免日殺一羊檜曰陛下推不忍之心如此何

患天意不格旣而甘雨應禱霑足先是奉使王倫至中山府留十四日倫以九日丁亥至中山傳云魯

王達蘭見在草地。後月半方來。庚子始聞其國內變。倫以下皆憂。俄傳四太子烏珠作都元帥。昨夜抵城外。已回祁州矣。少頃引接者至。令倫等悉赴元帥府。卽趣之行。是晚達祁州。初右護軍凡七萬三千人。馬九千匹。時宣撫副使胡世將置司於鳳州之河池縣。熙河帥吳璘總二萬人。秦鳳帥楊政總三萬人。戊申世將奏二人皆故吳玠大將。威名素著。乞命璘於鳳翔及寶雞以來。命政於鞏州及白石以來。駐軍則應接川陝。其勢兩便。仍乞璘充右護軍都統制。政充宣撫司都統制。既又請命永興帥郭浩以所統九千人於邠耀二州捍禦。皆奏以俟朝命。僉書樞密院事樓炤會諸帥議移軍事。秦鳳經略使吳璘言。移軍陝右。則蜀口空虛。金或逾盟。自南山擣蜀。邀我陝右。則我不戰自屈矣。當且依山爲屯。以控要害。俟敵情見力疲。則漸可進。璘遂止。以牙校三隊赴秦州。且飭階文等寨以備之。至是世將使事畢。己酉離秦鳳翔。府以歸。陝西雖號新復。然白金僞變易之後。軍民尙懷本朝。時諸路禁軍得三萬四千有奇。而涇原八千人尤勁。雖分隸諸帥。然各有將分。仍存正副。蓋祖宗之軍政猶在。又弓箭手亦得七萬。時御營右護軍自蜀出者。皆駐西秦兩路。而諸郡見管之粟。與和糴相當。足以支一歲之食。先是轉運使張深上言。乞裁減軍士廩賜。於是諸軍出關。歸怨於建議者。洵洵幾變。而閬州戍卒欲殺其守臣孫渥。會謀泄不果。宣撫副使胡世將亟下令。悉如舊數不減。卽條利害上之。議者謂當待報。世將曰。朝廷置大將。事有待報不及者。固許之。不然。某上章乞罪。以罪去無憾也。先是樓炤奏。差環州保安軍守臣乙卯。上諭宰執曰。陝西沿邊控制夏國。最爲要害。當擇久在軍中。諳練邊事。或本土武人。方能保固障塞。民得安業。可劄付炤。令諭

諸帥秦檜等退而竊歎。上留意疆場。愛惜生靈。可謂明見萬里之外矣。先是夏國將李世輔與僞招撫使王樞同至長安。時環慶路又獲夏國一百九十餘人。於是僉書樞密院樓炤奏陝西新復。正與夏國爲鄰。此等留之無益。還之可使知恩。遂遣樞等歸夏國。旣而世輔至闕。上獎其忠義。授護國軍承宣使。龍神衛四廂都指揮使。兼樞密院都統制。賜名顯忠。言者謂宣撫司便宜補官。歲約一千員。乃倍於三歲科舉補蔭之數。今旣罷便宜。而又陳換給。其來不已。乞限以年。庶息姦弊。詔限一年。言者謂蜀宿重兵。一歲供億無慮四千萬緡。民力殫矣。賴陛下念之。徙兵隴右。謂此可以寬民力。而官吏多擇善地。至新疆則固辭。今後避事之人。當重黜之。淮東宣撫使韓世忠奏。金人近誅宗族大臣。國內紛擾。淮陽所屯兵皆抽回。世忠意欲乘虛襲之。丙寅。上謂宰執曰。世忠武人。不識大體。金人方通好。若因其無備襲之。是乘亂而幸災也。異時何以使鄰國守信義乎。戶部郎官孫邦奏。私酷條已免。拆屋茶鹽。尙有沒法。亦乞除之。癸酉。上謂宰執曰。法果弊宜亟改。若行已久而無甚害。且循祖宗之舊也。先是金國欲得趙榮。王威二人。已詔遣還之。於是韓世忠以書與秦檜曰。榮威不忘本朝。以身歸順。父母妻子屢遭屠滅。相公尙忍遣之。無復中原望耶。乙亥。檜奏外間頗有異論。上曰。榮威在僞朝。力捍官軍。金人已割還舊疆。宿壽乃腹心之地。榮威輩避罪奔逃。貪功生事。無故驅掠西州之民。罪不容誅。宜榜諭此意。初。提舉明道宮鄭億年爲敵執北去。遂臣劉豫。爲吏部侍郎。戶部尙書。遷右丞。除資政殿學士。河南初復。右僕射秦檜與億年爲親。乃召之還。除直學士。提舉醴泉觀。奉朝請。至是檜又欲復其僞授職名。參知政事李光以爲不可。乃已。朱勝非聞

居錄曰時宰臣秦檜王仲山之壻也鄭億年母仲山親妹檜子燿復娶億年之女至是頗佑之億年始至除雜學士繼欲復偽齊所授職名參政李光楊前而折之乃止後數月光罷億年竟復資政殿學士仍奉朝請雖士論洵洵而一時給舍臺諫皆檜私黨不復顧逆順之節矣嗚呼億年事逆豫爲執政學士仍奉與謀者欲滅吾宋也欲危吾君也欲傾覆趙氏而爲劉氏也欲吞東南而臣屬之也在律叛逆不原赦不與謀者欲滅吾宋也欲危吾君也欲傾覆趙氏而爲劉氏也欲吞東南而臣屬之也在律叛逆不原赦不

分首從然則億年與檜其罪等舊官其可復乎唐祿山之亂旣復兩京陷僞之官以六等定罪最重棄市次自盡餘流竄故相張說二子均皆當死肅宗以在東宮時說有保祐之功欲貸之明皇曰均皆事賊皆任權要均仍爲賊毀吾家事不可赦肅宗復請以是流均嶺表而均被極刑欲宗之待居厚於明皇之遇張說億年之事劉豫親於張均之從祿山而況居中素無援助之力今失刑如此何以慰徽宗在天平之靈

初右諫議大夫曾統言經制本戶部之職更置一司無益乞罷之上曰經制一司須經久方見利害今纔半歲難遽責以近效若實無益雖亟罷可也至是言者又以經制司所創官吏種種橫費較其所入未必能補如創酒庫亦是陰奪省司之利況所總之事皆戶部本職有經制則戶部亦可廢矣詔付戶部具經制司察州縣所陷錢物并催未到綱運緣路分關遠未見速效今若依舊分隸諸司則經制可罷其庫欲併歸贍軍庫丙子乃罷經制司其諸路榷辦官依舊爲主管常平官徽猷閣待制提舉萬壽觀兼侍講尹焞前爲禮部侍郎已病至是疾甚不能朝遂奉祠而去後四年卒於會稽時金人法苛賦暴加之饑饉民不聊生又下令欠債者以人口折還及藏逃亡而被告者皆死至是將相大臣如宗磐達蘭之徒皆誅死二帥久握重兵嚮者植黨滋衆今則悉爲亡命故所在鋒起平定威勝遼州道不通行一旦太行山義士人懷州萬善鎮州人大恐中原盛傳大駕親征民皆陰備軍器晝而罷市晚視霞起則曰御營烈火光矣初龍神衛四廂都指揮使李顯忠歸朝日常復其父母之讎至是待罪九月戊寅朔詔顯忠有功廊延特與放罪初召太尉東京副留守郭仲荀赴行在仲荀因領劉豫下兵八千以還至是駐

於鎮江。己亥。上謂宰執曰。仲荀善人。但馭衆非所長。姑令駐彼。別選人代之。秦檜曰。孰可當者。上曰。極難其人。當於統制官中選之。檜等言。董先牛皋輩才具。上曰。此皆可用。上又曰。辛永宗與仲荀同來。且令歸前任。蓋所爲誕謾。向在軍中。每遇大閱。則借人馬器械以充數。檜曰。外人不知。陛下察其姦狀。乃謂眷之。蓋小人在外託聲以惑衆爾。上曰。如辛道宗不循理。亦不可用也。丁未。起居郎周葵請令後犯茶鹽人免根問來歷。上曰。犯權貨者不根問經由。此嘉祐著令。仁祖盛德也。舉而行之。則吏不至夤緣。獄不至滋蔓。可速付之省部。先是雷州有海商爲賊所劫。本州西獄禁勘。皆平民所死於獄者五人。大理寺丞朱斐奏之。上惻然。謂宰執曰。二廣地遠。有司如此。冤何所伸。令斐再具奏。其提點刑獄以下官。皆黜責。上曰。古者刑人。則君爲之徹樂減膳。唐太宗三覆之刑。誠以死者不可復生。今後遠地監司。須爲朕遴選。秦檜等仰承欽恤之意。至是又詢雷州獄事。檜曰。已到。乃令刑部詳之。蓋上哀矜庶獄。常記淵衷如此。金國主亶既誅達蘭。遂以右丞相王烏克紳爲左丞相。右丞蕭慶爲左丞。烏克紳嘗副尼雅滿行事。雖爲羣臣所忌。而常以智得免。故尼雅滿以下皆不能及。國人號曰珊瑚變。珊瑚變者。女真語巫嫗也。以其通變如神也。是豈亶之所能馭。故深忌之。初時客星守魯。事在五月烏克紳占之。太史曰。不在我分野。無傷。未幾宋克虞滕諸王同日誅死。既又守陳。事在七月太史以告奉使宇文虛中。虛中語之。烏克紳不以爲怪。是月果同蕭慶被誅。金應天道如此。其詔略曰。希尹心在無君。言宜不道。逮燕居而竊議。謂神器以何歸。希尹卽烏克紳也。又曰。慶迷國罔悛。欺天相濟。既致於理。咸伏厥辜。賴天之靈。誅於兩觀。時烏克紳之黨。皆爲都元帥烏珠

所誅。奉使洪皓嘗與烏克紳持論幾死。烏珠知之故得免。時烏珠謀舉兵以復河南。已決意入侵。蓋金法罷兵則權在國主。用兵則權在元帥。自割地講和之後。不半載間。元臣宿將。誅夷殆盡。烏珠所以力沮和議者。亦達蘭臨死之言。有以動其心也。僉書樞密院事奉使王倫。至金國御子林。留館五日。辛亥。見國主。竄致命。竄悉無所答。令其臣翰林待制耶律紹文爲宣勘官。問倫還知元帥達蘭等罪否。倫對不知。又問無一言及歲幣。卻要割地。但知有元帥。豈知有上國耶。倫曰。日者僉宜蕭哲。以國書來。許割河南。歸梓宮太母。天下皆知上國尋海上舊盟。與民休息。使人奉命。通好兩國爾。冬十月辛亥。詔侍從官各薦二人。曰。朕久在東南。中原隔絕。遺才必多。可令訪求推薦。以見朕兼收並用。求賢無方之至意。成都闕帥癸丑。以吏部尙書張燾爲之。仍除寶文閣學士。時罷四川制置使。上謂宰執曰。燾雖安撫成都一路。如四川前日無名橫斂。不急冗費。可令蠲省以寬民力。上語在己酉今聯書之及燾陛辭。言蜀自軍興。民力久弊。官吏不恤。臣願宣陛下德意。俾一路被澤。上曰。豈惟一路。應四川事。悉以委卿。以成都帥而得行四川民事。自燾始也。戊午。宰執奏統制官雷仲管鎮江府軍馬。上曰。岳飛軍中偏裨。如董先、牛皋。頗驍勇可用。但先好貨。皋嗜酒。皆有所短。未可統衆。秦檜等退而竊歎。上知人善任。使雖軍中偏裨。性行才否。無不洞察。丁卯。宰執奏上皇太后宮殿名。上曰。行宮地隘。只依山修築。至於器用。供帳衣衾之類。朕皆親臨視。仍許宰執入觀。秦檜曰。陛下純孝。篤於奉親之禮。無不周也。壬申。上諭宰執曰。吳玠久在蜀。備著勞績。已優加恤典。然聞其家頗貧。可賜錢三萬緡。仍進其弟軍職。令撫玠家屬。秦檜曰。陛下追念將帥。不忘其勞。凡

披堅執銳者，孰不感而自效也。金人近歲用兵多不利，始知憚中國。時有遼軍萬戶韓常爲瀋州守，一日與其判官宮茵論南北兵戰之事，茵曰：「北非南之所能敵，茵益都人，蓋諛之也。」常曰：「不然，今昔事異，昔我強彼弱，今我怯彼勇，所幸者南人未知北間事爾。」十一月己卯，奉使藍公佐回程，庚辰，纔至燕京，而彼國元帥烏珠亦至，公佐深懼，不免留四日始聽行。殿中侍御史何鑄言：「初改官及初補官，並合赴部注授。」乙酉，秦檜奏舊法初改官，歷親民一任，上曰：「有祖宗成法，自當遵守。」嗣濮王仲偃卒，戊子，司農卿莫將除徽猷閣待制，京畿都轉運兼主管奉迎梓宮一行事務，上曰：「季迨乃朕舊寮，亦見朕於臣下無所偏也。」秦檜曰：「唐龐壽相任濮守，以汚敗自陳，嘗在秦王府，太宗謂曰：『我昔爲秦王，乃一府之主，今居大位，乃四海之主，焉得獨私故人？』壽相流涕而去，陛下英果過太宗遠矣。」右正言陳淵乞凡賜齋而於例有疑者，三省共議，又言莫將未應遽除，次對，案繫年要錄時莫將改充集英殿修撰，須其績著，然後命之，雖往者尹焞亦自卿聯命以此職，由焞先除從班，以疾力辭，老不可留，故以寵之，今將宜除近下職名，庶合公論，淵、沙縣人也。壬申，秦檜奏神宗哲宗實錄已進，今乞專修徽宗實錄，原按此處擬有脫文實錄當實其事，以信後世，豈容置私意於其間耶？開封少尹李景謨奏陽武河埽事，癸酉，上曰：「河事利害非輕，可速擇都水官，朕頃兩至河上，每見一埽所費不貲，如十八盤各有斗門，以殺水勢，一失枝梧，民被其害矣。」金部郎官游損奏：「州縣賊吏監司郡守不卽按治者，許民越訴，詔申嚴舊法，損建陽人，醉子也。」辛酉，詔樞機之地，安可曠官，僉書院事樓炤，趣令還任供職。時侍從官論薦左朝奉大夫張甸等，皆令除郡，壬戌，上曰：「士大夫固以

任中都官爲榮。朕謂百姓國家根本。當以親民官爲重。無內外之限。旬嘉興人也。先是少保開府儀同三司孟忠厚。乞河南一郡。給事中劉一止言。后族業文如忠厚不可多得。但此例一開。有出忠厚下者。何以御之。又有嘗事僞楚人徐偉達者。差知池州。一止言。邦昌僭位。凡仕僞之人。皆諱其官稱。惟偉達至今自謂郎中。豈稍有廉恥者。一郡既可惜。且無以示好惡於天下。上皆爲罷之。中丞廖剛曰。是臺臣所當言者。皆爲劉君先矣。金主亶諭其政省。今後四時游獵。春水秋山。夏冬拉必。原作刺鉢。今改正。下同。皆循契丹故事。拉必者。契丹語所在之意。然契丹先世雖然游獵。未嘗立四時定制。自中興講好之後。復併諸番。境內無事。始於每歲春水獵鵝。秋山射鹿。夏則避暑於長嶺。冬則就暖於陽城。既畢然後歸廣平。靴甸受禮。卒至亡其國。亦緣四時無定。遠近騷動。時亶方親戚內叛。寇盜外擾。不知自警。乃循契丹覆敗之轍。其後果不令終。蓋已基於此矣。十二月甲辰。言者謂翼祖積累深厚。與我宋萬世之基。而保州睦宗。院既陷於敵。其南奔者十數人。而有官者僅四人。望權依西京宗室例。先次注官。丁巳。詔從之。宗正丞鄭鬲奏。乞以常平錢於民輸賦未畢之時。悉數和糴。壬子。詔從之。上謂宰執曰。常平法不許他用。惟待賑荒恤饑。取於民者。還以與民也。秦檜曰。陛下語簡而理盡。無不本於愛民。鬲。侯官人也。初。詔侍從各舉所知。而給事中劉一止。起居郎周葵。皆以宣教郎呂廣問。應詔。廣問。夷簡孫也。李光欲除廣問館職。至是殿中侍御史餘杭何鑄言。二人非知廣問者。因光之囑。迫於勢而舉之。相與以欺陛下也。今光已去。二人之罪。豈容不正。己巳。詔一止。葵。並以奉祠而去。金僉軍之法。自元帥府下諸路帥。帥下節鎮。鎮下支郡。郡下諸縣。縣

下籍民戶丁多寡之數。令備軍械軍裝。以聽點集。用兵以來。皆尼雅滿之徒專之。至是國主亶始令諸賧不得從元帥府。須見裏面使臣所持御畫牌劄。方許僉發。蓋疑其下也。然元帥府距其國都甚遠。苟有緩急。豈能應機而用哉。